

3

IUSTI LIPSI
EPISTOLARVM
SELECTARVM
CENTVRIA QVARTA
MISCELLANEA
POSTVMA.



ANTVERPIÆ,
EX OFFICINA PLANTINIANA,
Apud Ioannem Moretum.

CIC. IDC. VII.

Cum Privilegijs Casareo & duorum Regum.

ILL^{MO} ET REV^{MO}

D. IOANNI ANDREAE
PROCHNICIO

EPISCOPO CAMENECENSI, &c.

Magni animi & virtutis viro,

CENTVRIAM *hancce* LIPSIANAM,

Inssus dedicat consecratq;

IOANNES WOVERIVS *Antuerpiensis.*



I amicitiam, quæ interte, ILL^{ME} DOMINE, & immortalis memoriae IVSTVM LIPSIVM fuit, eiusque principium, progressum, insuper & fructus mecum examino; illud sanè occurrit, mutuam vtriusque pectoris caritatem, in angustum nimis humanæ vitæ momentum incidisse. Imò

post periculum credidimus, quàm vicinæ ingratitude necessitati, imminenti fati properantia LIPSIUM incluserat; cum non aliter viuis cum beneficiis tuis paria facere potuerit, nisi vt mortuus præstaret. Sanè ego proximus, & quem quasi initiatum amoris vestri sacra non excluderent, scio; cum antea vitæ & cunctis hisce mortalibus repudium constanter dixisset LIPSIVS, prætimuisse tantum, ne cum BENEFICENTIA PROCHNICIANA sibi viuendi spatium deesset. Talis enim ista fuit, tantoque impetu iam securum vicinâ libertate senem inunda-uerat; vt, si callidè mentem tuam producere nobis liceat, iudicemus, te cum abeunte tunc LIPSIO festinasse. Verùm, non aliter quàm vehi fuetos vel minimum grauare pondus solet, ire si cogantur; ita sarcinæ quoque huius insolentia,
omnes

omnes solitum adficere benefactis, onerabat. Vindicare se igitur constituit, & Sapientiæ suæ memor, ne intestatus vno die viueret, sic cum gratitudine transegit:

Iam nunc parata est Centuria Epistolarum selecta, quam, si quid mihi continget, in arcâ meâ reperiēs, à te edendam, & ILL^{MO} PROCHNICO ex meâ destinatione inscribendam. O virum ab aureo auro!
In Prefatione DIC, qua ego deberem.

Dicam, nec verbis tuis, VIR SUMME OMNISQUE NUNC PARTICEPS AETERNITATIS, sed exemplo; te ingratitudinis vel supremum superasse ingenium, dum nec mortem beneficijs opponis, nec vulgi iudicio vteris; desinentium vota quod maximis meritis æquiparare solet. Meritò spreuit, ILL^{ME}, magnus ille animus omne erga benefacta artificium; ne vel sic quidem, obstrictum sibi humani generis nomen, vnius priuati debiti compensatione laxaret.

Itaque hac conscientia quoque lætus de-
cessit; &, augurari vti licet, inter inge-
nij scientiaque bona numeravit, nemi-
nem hisce instructum mori ingratum.
Nam temporibus moribusque nostris
ignotam liberalitatis tuæ industriam, quā
denique defunctum superasti, quī pro-
spicere potuit? Reliquias, (ô pietatem!)
& iam sepulti amici ossa, marmoreo con-
dere cippo frustra conatus, in cælum, vt
sic dicam, excurris; & iacenti proximam,
DIVAE QVÆ MATRI sacratam aram,
sumptibus tuis decorari iubes, vt, quod
mortuo impendere non potuisti, divina
reciperent. Stabit cum sæculis monu-
mentum; & ab ipsa Sarmatia auro imbu-
tum PROCHNICI nomen, vt viventis
LIPSI amoribus permixtum, ita sepul-
ti quasi cum cineribus conditum, futura
tempora venerabuntur; omnisque ætas
testa-

testabitur, dignum te fuisse, quicum immortalis ingenij studia desinerent. Sed & dignus tu eras, cui mens tam inclyta absq. fortunâ contigisset: nunc dum regale decus maiores tuos illustrat, altâque ab origine per Duces de Bybel deriuatus in te sanguis natales instruit; quod nescienti collatum, etiam virtutibus præscribitur. Ecce benignitatem fortis tuæ accusare malo, quàm exclamare, ô virum fortunâ suâ dignum! Sæculi me indignitas impellit; contra quam testari numquam desinam, quantum supra fortunæ corporisque bona, animi virtutes emineant. Nam pænè ceterorum mortalium dum prima tibi vota vltro obuenisse conque-
ror, simul adfirmo, propriâ sic luce te ex-
splendescere, vt talem fortunam facere potuisses, nisi accepisses. Olim inter Principes fuit, qui par imperio videbatur, nisi

imperasset. Nos inuidiæ factorum obijci-
mus, ideò sceptrum maioribus tuis perfidiâ ereptum, ne tu dignissimus regnares.
illis enim te imputare malo, quàm ipso-
rum facta pro virtutibus tuis narrare:
quod ijs sufficit, quibus nobilitatis satis
magnum præsidium, languens vita at-
que ignobile est otium. Contrà, te ad
verum decus nitentem, ingenij cultus, il-
lâque studia exceperunt, à quibus facilis
in omnes dignitates decursus est. Deni-
que vt nihil nisi summum eligeres, sacra
placueret; sanctisq; altaribus purum ad-
mouisti sacerdotem. Qui cùm infra di-
gnationem titulus non esset, tamen ita
totius Poloniæ suffragijs certatum est, vt
passim spes suas ambitione donarent, nec
fauentium aliter vota declinare posses,
nisi peregrinatione te eriperes. Sed num-
quam Virtus se deserit; & huius cor-
poris

poris quasi opacitatem, boni nominis fama, tanquam umbra, semper consequitur. Italiam elegeras, & in eâ Romam, Reginam orbis. Sed & ibi popularium tuorum te cura sequitur, Serenissimique Regis fauor inuenit; ut quem Cracouiensis Ecclesiæ clero præposuerat, Regni Neapolis legatione ornaret. Quo in munere, an fidem, industriam, prospicientiam; an magis cum summis æquabilitatem, cum paribus humanitatem, erga inferiores munificentiam, hîc perstringam? Iniuria virtutum sit, coarctare famam; & dignam annalibus memoriam, vnius paginæ angustijs strâgulare. Te vel ideò, quia vitare soles, sequentur præconia; neque æternitas magis deerit virtuti tuæ, quàm nunc dignitas. Cui grande augmentum vti CAMENECENSES Infulæ nuper attulere; ita tamen ad maiora adhuc

adhuc gradum gratiamque superesse,
nos cum benevolentia amici tui con-
templamur. Me enim serio, inter illos
serios numero, *quos nec ambitio impotens, nec
spes sollicitat lucri;* & qui gratis uti amari pos-
sunt, ita colere vicissim. Te modò (cum
voto desinam) P R A E S V L I L L^{us}, ma-
gna & potens patria recipiat; SIGISMVN-
DVS Rex inuictissimus, V L A D I S L A V S
maximi Patris spes, columenque regni,
reducem aspiciant: neque antea tecum
pariare fortuna desinat, quàm purpuram
reddat; si non cum sceptro olim genti
tuæ illatam, sacram saltem, sacratis tuis
meritis debitam.

INDEX

INDEX

EPISTOLARVM

CENTVRIÆ QVARTÆ

MISCELLANÆ.

A	BRAHAMO Bibrano	E.
Equiti Silesio	xcij.	Erycio Putsano suo liij.
Egidio Martinio Syndico ciuitatis Bruxellensis.	lxxxiij.	Eustathio Woloniczio V. R. & N. Lithuano xcviij.
Andrea Chiocco V. C. & Doctori Medico	lxvj, xcj.	F.
Andrea Schonao I. V. & S. Th. Doctori	vij.	Ferdinando de Salinas, Consiliario lxxij.
Andrea Schotto Soc. Iesu	iiij.	Francisco Pola I ^{ro} lxxxviij.
Antonio Richardoto suo	xliij.	Francisco Raphelengio suo xxxix.
B.		Francisco S ^o vertio F. xij, lxx.
Balthasari de Zuniga, Legato Regio	iiij.	Francisco Tregiano, Britanno V. N. lxxvj.
Balthasari Moreto suo	xxx.	G.
Bartholomao Leonardo Argensola	lxxv.	Georgio Vvveno lv.
Bartholomao Petro Lintrensi, Doct. Theologo	xv.	Gerardo Buyte-vvechio xj, xlvi.
C.		Godesfrido Hertelio liij.
Carolo Billéo, Consiliario	lxxj.	Gomesio de Amescua I ^{ro} lxiiij.
Carolo Clusio	xxxviij.	Guilielmo Grenio Nepoti suo xl.
Carolo Duci Croyo & Arschotano	lvij, lxiiij.	Guilielmo Richardoto suo v, xxxiiij.
Cornelio Van-dalio	lvij.	H.
Curtio Pichena	lxxxviij.	Hadriano Saiffenallio xxxv.
D.		Henrico Laurentij Spiegelio xviij.
Dionysio Villerio	x.	Henrico d'Oultremanno, Senatori xiiij, xx, xxxij, lxxxix.
Dominico Baudio	lxviij.	Henrico van Etten, Praefidi Aera-rij Brabantici lj.
		Henrico Vvveno I ^{ro} xxxiiij, lxix.
		Heri-

Heriberto Rosoveyo Soc. Iesu xliij.	Marco Velsero liij, xcviij.
I.	Marquardo Frehero J ^o xliij.
Iacobo Augusto Thuano, Praesidi xxv.	Martino Ant. Delrio Soc. Jesu xxij.
Iacobo Carondeletto lxi.	Maximiliano Vignacurtio U.N. lxxv.
Iacobo Resta U.N. ix.	xxxij.
Jano Bernartio ij.	Maximiliano Vriendtio j, xvij.
Iano Lernutio lxxxi.	lxxv.
Jirmia Pierffenzo J ^o lxviij.	Maximiliano Plouuierio [ita legē- dum non Ploimierio] xxxv.
Joanni Andreae Prochmicio Lega- to Regis Poloniae xcvi.	N.
Joanni Baptista Baronio suo xxxviij, xlix, lxxiiij.	Nicolao Montmorencio, Toparchæ Vendefio xvij.
Joanni Bucherio Doctori Theolo- go xij.	Nicolao Oudarto xliij, xcix.
Joanni Buiffonio Consiliario l.	Nunno Mendoe V.N. & Prin- cipi à cubiculis xxviij.
Joanni Hemelario suo lxxviij.	P.
Joanni Moreto xxix.	Petro Brachio xciiij.
Joanni Seurio lx, lxxij, xc.	Petro La-torrio Quintanadueñas xxij.
Joanni Vergerio Aurano lxij, xcij.	Petro Pantino U. R. viij, xix, lxxx.
Joanni Wouerio suo xlv, lix, lxxxij, lxxxiiij, c.	Petro Peckio Consiliario xxviij.
Iulio Cesari Carocciolo lxxix.	Philippo Arenbergio Baroni Se- uenberge xxxj.
L.	Philippo Boskhiero, Ordinis D. Francisci xxj.
Ludonico Septalio V. C. lvi.	Philippo Rubenio suo vi. xxxviij.
Lupercio Leonardo Argensola xxviij.	R.
M.	Remaclo Roberti xlvij.
M. Antonio Bonciario lxxviij, xc.	S.
Marco Antonio Perez jo V.N. xlvij.	Sebastiano Rolliardo J ^o lxxxvj.

IUSTI LIPSI
EPISTOLARVM
SELECTARVM

CENTVRIA IV. MISCELLANEA

POSTVMA.

EPISTOLA I.

I. LIPSIVS MAXAEM. VRIENDTIO S. D.



CARMEN iam alterum à te habeo mi Vriendti, prius de me (in ijs de Cruce) alterum ad me, quod recen-ter nunc & amanter mittis. Vtrum-que mihi à se gratum. quidni à te scriptum, homine elegantiae & do-ctrinae veteris, & qui, cum Lucretio

— *Musaeo continguis cuncta lepore?*

sed & ab argumento ea grata, quia aut aestimationem mei habent, aut amorem. Hoc postremum eximie, & mittis etiam velut para-rium amicitiae inter nos conciliandae. Ah mi Vriendti, quam se-rò, & quam penè frustra! Nam nolo erres, ego te à primo illo gustu amaui, & certus sum idem mihi à te factum. Conspiratio quaedam inter nos est (palàm video) non studiorum tantum, sed animorum & iudiciorum. Itaque amicitia ipsa iam fuit, sed re-ctior: referenda est & in claram lucem mittenda, te nunc in-uitante. Fiat cum bono Deo, & Fidium illum inuoco (siue San-cum à sanciendo vocari placet) me sanctae & verae Amicitiae le-ges tecum culturum, quamdiu in terris his colam. O multa in

A

ijs tri-

ijs tristitia! ô hoc recens acerbum, de fato nostri Gubernatoris! sed cum sapientiâ ista mitigantur, tum nonnihil & melle hoc amicitiae. quod gustatum regustare mihi sæpè animus, si te quoque habeo promptum & volentem. Confido, imò scio: & aut neminem in Belgicâ hac noui, aut te ex descriptione tuâ (imago ea animi est) mi Vriendti. Alligemur: en dextram, cedò tuam. Louanij, XII. Kal. Mart. ∞. MD. XCV.

EPISTOLA II.

Mechliniam.

IANO BERNARTIO S. D.

DE BEO vltimis tuis responsum, fateor, si morem communem spectem: non debeo, si aut valetudinem, aut decretum iam meum. Paria vltà facere in hoc genere, neque lubet, neque licet. Valetudinem prætexui, & verè: quid si occupationes, & interpellationes etiam addam? Iuro tibi amice, mirari ipsum me, cum dies lapsus est, vires aut mentem mihi ad tam varia constitisse. Sum in hac scænâ, & Fama produxit: sed ego illam defero, & hanc sperno, quam tueri per ista non est tantum.

— *Semita certè**Tranquilla per virtutem patet vnica vita:*

at virtus in secreto etiam est, imò contagia ista vulgi fugit. In Statio te pergere, benè est. de loco isto, in Siluis:

Lib. v.

*Omnia nam letas pila attollentia frondes,**Multaque fumosâ signatur lancea pennâ:*

feorsum à te sentio. Nam tu ad sagittas refers, de quibus Plinius: *Volucres fecimus ferrum, ut citius mors ad hominem perueniret.* Non opinor: ne illud quidem, in armamentarijs signatas ab Abascantio, id est seruatas lanceas veteres, & fumosâ pennâ in signes. Quæ mea mens? Critica. errorem scripti arguam, & *Laurea* legam: quod vitij & in Senecæ Consolatione ad Heluiam olim notabam. Hæret nempe cum priori versu, imò versibus, sententia: & Domitiano blandiens, de more, Statius; Vndique laurus & victoriæ, inquit, ab Euphrate, à Rheno, ab Istro: & fascès & pila laureata, lictorum siue speculatorum (qui litteras tunc victoriales adferebant) & *multa laurea signata nigrâ pennâ, siue atramento.* Neque enim aliò, quàm ad epistolas victoriæ indices hæc retulerim,

lerim, è prouincijs solitas mitti. Hoc placet. tamen in libro meo scripto cùm reperiā, *Nullaque fumosa*: suspicari etiam incidit; an nō mos fuerit, Speculatorum lanceas in clade aliquā & re tristi, pennā atrā insigniri, celeritatis simul & funeris notam. Enimuerò tale Scholiaſtes vetus ad Iuuenalis verſum:

— tamquam & diuerſis partibus orbis

Sat. III.

Anxia præcipiti veniſſet epiſtola pennā.

vbi commentatur: *Antea ſiquid nuntiabant Conſules in vrbe (lege urbem) per epiſtolas nuntiabant. Si victoria nuntiabantur, laurus in epiſtolā fiebatur (puto, ſigebatur?) ſi autem aliquid aduerſi, pinna ſigebatur.* Dixi: iudicabis, & valebis. Louanij, III. Kal. Mart. ∞. 10. XCVIII.

EPISTOLA III.

BALTHASARI DE ZVNIGA, Legato Regio.

BENEFICIUM eſt meminiffe te Lipſij, quid appellare & ſcripto alloqui? præſertim in ijs occupationibus, quæ militares & moleſtæ circumſtant, atque vtinam ſelici mox euentu! Multa ſperare nos hoc iubent, Deus, cauſſa, Principes, Fatum Auſtriacum: ſed tamen ſic produci obſidionem, nec ex voto, nec opinione noſtrâ fuit. Dicam, quod videtur? Vt Teucer ille, apud Homerum, ſub Aiæis clypeo latens Troianos inuadit & interficit: ſic occultos iſti tutores & auxiliares habent, quorum viribus opibusque ſubleuentur. Non neſcitis: ſed tantum remedium eſt, ſcire non videri: vt nunc quidem eſt ſtatus rerum. Si miles tamen noſter perfeuerat, nec aliquid turbat; conſido equidem de vrbe illâ, & ab eâ alijs obrinendis. Sed cura hæc veſtra ſit, quos ad Remp. Deus ille adinouit. nos vt nauæ vndis agitari, nō illas reſpiciunt, ſed in cælū & aſtra oculos tollunt: ſic inter turbas medias, ab ijs animum abducimus, & ad altiora, certè quietiora, applicamus. Libri & ſcriptiunculæ nos habent. inter iſtas Philoſophia vetus, ordine & breuiter à me explicanda: idque in Senecæ noſtri gratiam, nec tamen ſolius eius vſum. Alij quoque ſcriptores lucem mutuabuntur. Epiſtolæ etiam noſtræ pluſculæ breui diuulgandæ, & videbis, & (quæ tua harm quoque rerum peritia eſt) cenſebis. Ill^{me} Domine ſaluū te breui, & publi-

A 2

ca vo-

ca vota in tuto expectamus, & cum suspirio optamus. Louanij, v. Kal. anni noui ∞. 1561. quem feliciter ordire & decurre. Ciceronis locus, de quo quæris, sententiam habet, Duillium non contentum vnus dici triumpho, imaginem aliquam & instar eius vsurpasse in vitam reliquam: idque in publico, cum à cœnâ rediret, *cereo funali* (sic in Cicerone lego) & *tibicine præeunte*. Idem Valerius lib. 111. cap. vi. Flor. 11. cap. 11. & Silius, in his versibus:

*Cui nocturnus honos, funalia clara, sacerque
Post epulas tibicen adest, castosque penates
Insignis læti repetebat murmure cantus.*

Hæc autem ideò triumphum referebant, quia *Faces & Funalia* in eo vsurpata, itemque *Tibicines* ad sacra in Capitolio peragenda, & qui cum alijs eius generis præbant. Vulgò non hæc nota.

EPISTOLA IIII.

Antuerpiam.

ANDREAE SCHOTTO V. R. Presbytero Soc. Iesu.

TRISTIS legi de fato, quod oculis tuis euenisset: etsi nolum hercules te eâ te tristē. Quàm ab honestâ causâ contraxisti? studia & perpetua discendi docendique cupiditas vitium & tabem hanc attulerunt: vt nec meminisse eius possis, nisi vnâ oprimi in remp. litterariam animi operæque. Lacræna illa ad filium, ex vulnere claudicantem, *Mæte, gradum non pones sine memoriâ virtutis*: idem in te. oculi cum negabunt, merita succurrent orbitatis eius causa. Illud te seriò hortor, imò & rogo, vti dum Sol nondum plenè occidit, ea quæ in scrinijs tuis affecta habes, perficias, & emittas in publicam lucem. Scio pluscula tibi esse. certè de SENECA patre cur omittas aut tardes? Vtile illud ad eloquentiam scriptum est, & quod in vno velut corpore præfert tot membra veterum Oratorum: tuus autem in eo labor vetus, & mihi notus iam olim, & laudatus. Quin multa etiam addideris, nec ambigo. quando enim tu cessas? Itaque nostrâ & iuuentutis causâ hæc ede: tum & tuâ, quia gloria te manet, audacter me spondente. Etsi vitæ & votorum tuorum modestia non eò adspirat: sed tamen si hanc neglegis, nos vide. Vide & Belgicam, in

in quâ cum vno iam aut altero hoc agis; & abit à nobis, mi Pater, melior illa omnis mitiorque Musa. Clausula est, ne claudere hæc tua:

Parcentes ego dexteræ

Odi, sparge rosas:

quæ suauiter nos & posteros recreent ac delectent. Vale. Louanij, VII. Kal. Mart. ∞. MDCL.

EPISTOLA V.

Patauium.

GVILIELMO RICHARDOTO SVO. S. D.

IRATVM me fuisse, atque etiam nunc esse, debeo fateri. Quid? tres totos menses vos abfuisse, & nullum verbum? Imò quartus iam mensis præcipitabat, & tunc denique de aduentu vestro Dolam. Gaudeo incolumes; doleo & iterum irascor, sic incuriosos nostri, aut negligentes. Simile in Italico itinere. venisse in Italiam, Mediolani fuisse, Puteanum nostrum vidisse priuatim, & in publico audisse, ex eius litteris dudum didici, requiro etiam nunc vestras. Vnas diu post sanè accepi, quæ hoc significarent tantum, Patauij vos esse: cetera prioribus & vberioribus litteris notificanda. Eas non vidi, quibus creditæ sint, vos videte. Ecce, habes causas iræ, & vel ipso te iudice non iniustæ: nec tamen Achillæam illam putes, * *εὐπρότερον ἀδ' ἀμυντος ἐνὶ φρεσὶ*: — non

** firmiorē
in pectore,
quàm ἀνι-
μα.*

Irasci facilem, tamen vt placabilis essem:

maximè erga tales, quos corde amo, & nec offendant cum offendunt. Vnum hoc tantum, Emendate. Gratum porro, Patauium allubescere, ipsam (vt commemini) gratam amcenamque sedem, sed studiosorum ingenia siue mores exasperant: nec ea licentia pro boni cuiusquam gustu, non pro eorum item vsu. Sed eò ventum est, artes & studia titulus fiunt, & satis est hunc inscribi. Nostræ hîc res languidæ, lentæ, cum tædio bonorum, & panè d' operatione. Quando enim, aut quis exitus? Ordo & compositio apud partes nostras sunt, aut crescunt: nos qui fuimus, aut deteriores sumus. Abijcio publica; in priuatis, solitudo & studia me habent, illa quidem etiam inopinata. Nam Baldvinius noster mihi & rebus nuncium remisit, & condidit se in cœ-

* Mirum,
sed verum.

tum D. Francisci, Deo consecrandus. * *Θαῦμα, ἀλλ' ἔστι ψευδής*: res ita gesta, & quidem subito, pridie nuptiarum quas ancilla parabat, & patrauit. Nobis molestiæ, discursus, scripta, rescripta, & quæ non ignoras. Nam inuitissimo auunculo hæc gesta. De studiis porro, EPISTOLAE meæ iam lucem videbunt, tributæ in *Centurias quinque*. Plures non libuit addere, & vel sic satis exposui me ad ictum. Vestra in ijs nomina: ego vt in animis vestris, quia commercuisse videor, rogo vel posco. Vale mi Richardore, & vel hoc interim scribe, te valere. Louanij, vii. Kal. Mart. ∞. 1522.

EPISTOLA VI.

Patauium.

PHILIPPO RVBENIO *semper-suo* S. D.

* Iouis plu-
uia super
latam ter-
ram.

MEDICVS à me abit, ego scribo: nōne hoc lætum? Sanè tristior mihi hæc hiems fuit, & assiduus per eam

— *δὶς ὁμῆρος ὑπὲρ χθονὸς εὐρυπέδοιο.*

Sed nec publicè aliquid, quod gaudeatis audisse. Quid de vobis? increpabo etiam, & hercules tardi in scribendo fuistis, aut, quod malim, infelices in mittendo. Tres menses totos nihil à vobis auditum: denique incipiente quarto, Dolam venisse, tum diutulè post, Patauium. Binas in vniuersum vestras vidimus: neque illas quidem vberes, quas initio aduentus in Italiam scribitis dedisse. Vestri hîc neglectui eas, aut nos (vt liberè dicam) habent: & alioqui illigantur, & animis distringuntur ad Ostendam. Inauspicatum inceptum! cui nec nunc finis, nisi in spe, atque eâ languenti. Italiam autem placere tibi gaudeo mi Rubeni; & magis placebit, opinor, magis intrata. Nam limitem adhuc eius insedistis, imò nec eius propriè, sed Galliæ; si cum antiquis terminare lubet & loqui. Velim autem, vbi tempestiuum erit, de ipso te mihi scribas, quem sedulò curo atq; amo, ecquid destinaueris, manere, redire, quam vitæ viâ inire. Apud nos, si sic pergitur, Scythica barbaries breui, & quod non dico. Deum mecum testor, fastidire me & patriam (venia dicto sit) & vitam panè addere, sed CONSTANTIA vetat, & in extremo hoc spatio gressum firmat. Edidi CENTVRIAM vnam ad *Germ. & Gallos*; tres ad *Belgas*; vnamque *Miscellaneam*: his quattuor vltimis nomina etiam

etiam vestra, ut antea animo, inferuntur. Videbitis, si tamen hæc ad vos perferentur. De Seneca, ait alijs, nihil addo: * — εἰς ἡδονήν * non bona
 λῶν (ait diuinus vir) ὑπὲρ βίου εὐχετάσθαι. Valerudo me ligat: & πα-
 νε illud iam placet federque

* — μεγάλη παιδείσις ἐν ἀνθρώποις σιωπῇ.

Deum precor, mi Rubeni, telongæuum, & in melius æuum, quale ingenium tuum merebatur. Louanij, vi. Kal. Mart. *magna in hominibus doctrina, silentium.*

∞. IOCH.

Balduinum nostrum, statim à discessu vestro, * ἀποτάξασθαι τῷ κόσμῳ * abiunctū
 συμ, καὶ πάσαις ταῖς βιοκαταστάσεσιν ἢ μερίμναις, credo te audisse. Agit
 etiam nunc in cœtu Diui Francisci, hac vrbe. *à mundo, & omnibus vita uoluptatibus aut curis.*

EPISTOLA VII.

Cracouiam.

ANDREAE SCHONAEI I. V. & S. Th. Doctori.

LANGVOR me habebat, nec ab eo promptus eram ad scribendum: tamen me fecit tuus amor, mi Schonæ, quem in litteris ita palam, quàm si in ore atque oculis, ostendis. Itane procul, & in illis quoque regionibus ego, id est litteræ amatur? Nam quia libasse eas censeor, vos in me inclinatis: gaudentem, & libentius quod eundum est euntem, quod spem relinquam doctrinæ in Europâ hæsuræ, quæ vos etiam in vltimo eius limite adspexit, imò arctiori amplexu sibi iunxit. Deus bone, quis bono & veteri æuo de vobis hoc sperasset? cùm horror illic & squallor, nec nisi Martis sedes, & incolis cordi * — πόλεμος τε καὶ κῆρυξ * bellum
 λοιπὸν αἶνῃ. Quàm mutastis? & humanitate, elegantia, omni cultu animi, prouocare audetis lætissimam quamq; gentem. Mirus Prouidentia ordo! & cælestis ille agricola hæc illasque partes excolit, & velut nouales quosdam agros, alternis ferit. Quid Græci, quid placeant sibi Itali? Græcia & Italia nuper in Galliâ, & nunc in Germaniâ aut Sarmatiâ reperiantur. Maesti estote, applaudimus: & tibi priuatim mi Schonæ, qui vtraque oratione, solutâ & ligatâ, potes pollesque. Vidi enim; & ipse ille qui attulit Comes Teuczinus, lumen & decorem infudit, nobili stirpe atque animo iuuenis, & qui crescit in laudem vestri regni. Hac quoque parte vos beatos! apud nos in omnia alia studia nobiles versi, & inuoluit eos * — πολέμῳ κλόνος αἶν ἁπλως. Sed frui Comite *belli sine sine carceris.*

vestro

vestro diutiùs, mihi votum fuisset, linguâ diserto & prompto, mente & iudicio bono: sed viacū trahebat. me languor sistit, non aliquis nouus, sed ille vetus, & qui in tam pertinace luctâ deijcit, vel supplantat. Bonâ fide, ego ire me sentio ad metam: quid mali aut noui?

— omnes vna manet nox

Et calcanda semel via leti.

Tu longum longumque vale mi Schonæ, & optimas ibi artes propaga. Louanij, postrid. Idus Mart. ∞. I. CII.

EPISTOLA VIII.

Bruxellam.

PETRO PANTINO S. D.

CENTURIAS à me cape, & in ijs te lege. Sæpiculè, sed non toties quoties in animo te memoro & gesto. Noni lubet profari *ἐν τῇ ἐπιστολῇ*, neque me decet: sed tamen quedam inter Epistolas sunt, quæ famam habere nunc & olim possint. Neque enim omnes: & quasdam non iudicio meo edo, sed alienæ ambitioni (apud te liberè) aut & amicitia dono. Tu si es, quem cupio & censeo, & addam, scio, comporem me iudicii tui fac: id est censuræ. Non est sera emendatio, & altera editio est in manu. De publicis silco, & linguam mordeo: tamen populariter ruinas video, & ille Iupiter

* *Ordine
corripit,
qui causâ
est, qui ne-
que causâ
est.*

* *Μάρτυς δ' ἐστίν, ὅς' ἀτρίως, ὅς' ἔστι.*

Feramus, & vno verbo, PHILOSOPHEMVR. Vale V. R. & C^{me}.
Louanij, Kal April. ∞. I. CII.

EPISTOLA IX.

Mediolanum.

IACOBO RESTAE V. N.

AMICA atque diffusa scriptio tua, etsi in morbo, ad respondendum impulit: neque animo contractiùs, etsi manu fortasse fiet. Nam hanc ægrè, illum alacriter ad te moueo & mitto, libenter apud tales hæsurum, & vel ætatem acturum. Prudentia & virtus tua (non blandior) ex ipso characterismo scriptiōis tuæ innotuit: neque opus testimonij vel productione Puteani nostri fuit. Itaque amicitiam libens volensque tecum pango

pango: fouendam deinceps litteris, colendam etiam officijs, quæ intercapedo quidem hæc locorum admittit. Nam bonæ & antiquæ fidei in his talibus sumus: vtinam & ingenium, aut opera eius, quæ tu æstimas & attollis! Enimuero qualiacumque, cara tamen habeo, quia me carum vobis talibus reddunt. Vt perseueres mi Restâ, ego rogo, & ambire me quod ambiebas sub signo. Louanij, Kal. April. ∞. 1611.

EPIST. X.

Tornacum.

DIONYSIO VILLERIO. S. D.

HEVs tu, inclamo. Itâne de salute meâ sollicitus, vt nec verbo inquiras? Ad extremam lineam pænè redactus fui: & vbi à te cura aut solarium? Sed, quod ipsa scriptio excitatior tibi dicat, iterùm meliusculus sum, & virium aliquid ac spirituum recepi. Antuerpia me vidit, nunc Bruxella, sed & Hallæ, ac votum hîc Diuæ Virgini (disce è Carmine) persolui. Vides me arma suspendere, & otium moliri. Toto certè animo, in hoc turbido & ambiguo statu rerum: cùm meditari & firmari satis est, aduersum imminetia aut præsentia mala. Quid priuatim? vidistin' qui molacebant? improbus & imperitus aliquis (vtrumque verè dixerim) ab Italiâ: qui glaucomam ob oculos obijcit, velo libri antiqui. O meum risum! scio, & publicè testatus sum (nam respondi) nihil eius esse, & mantellum diligentiore inquisitione huic mendacio detraxi. Totum sanè scriptum, si quis inquirat, — *apina tricaque, & si quid vilius istis*. Tamen, vt dixi, respondi: sed ita me Deus, cum pare impare cõpositus, & Græco verbo, *χρῆσται ἀρετῆς ἐ συμφορῶν*. Indignor, non homini qui scripsit (ambigua sanitas eum excusat:) sed qui legere & æstimare etiam præ se ferunt, quadrante non emenda. Ipsam rem dico: & cùm cogito, pænè pœnitet respondisse. Eò ventum esse? vt pro benefactis & promeritis conuicia & calumnias referamus? Nam cum poëtâ:

— τὸ μὲν λαχόμεν ἡλέως ἡμεῖς.

Beata in secessu vita, sed & in tenebris: quoniam reuera pauci qui, non dicam præmia, sed iudicia laboribus nostris donent. Feramus: & cum Theognide sentiamus,

B

* Εὐ εἶρ-

* Olla & petra non conueniunt.

* hac talia præmia non spera.

* *Fac bene,
sed tibi fac.
quid fama
pramia
quaritur?*

* *Εὐ ἔρδων εὐ ἀφάττει. τί κ' ἀγχαλον ἄλλον ἰαλλεῖ;*

Nobis, inquam, viuamus, Deo & nobis morituri. Valere te cupio, mi optime Villeri: nam de rep. nec verbum lubet addere: à te tamen audire. Louanij, Idib. Iunijs, ∞. 1611.
Wingio Canonico mihi peccato salutem dico.

E P I S T. X I.

Lugd. Bat.

GERARDO BvyTEWECHIO S. D.

LI B E N S intellexi de vxoris vtero grauido, libenter audiam (Deus breui faciat) de soluto & leuato. Sit hoc gaudium tibi, sit tuis, & ciuem aut ciues paullatim patriæ dones, bonos è bonis. Sed quid tu ita nihil de alijs? an non Epistolas meas vidisti? in ijs vnā alteramque ad te, aut de te? Plures non libuit, temporum metu, & ne beniuolentiæ specie noxam noceam. Quid autem de ijs ibi censent? quid Scaliger? quid etiam agit? Breui & libellum pugnatorium videbis, quo Italo respondi proteruiter incurrenti. Inuitus hercules, sed amici protruserunt. nam libello quidem eius, si examines, nihil ineptius aut imperitius: tamen applaudunt quidam, quibus suaue sit vmbra aliquam luci huic fieri. Iudicia! & tempus est desinere me omnis scriptionis, si hæc obtinent. Vale mi amice, cum Tuâ, & futuro Tuo. ita Deus (iterum rogo) donet. Louanij, Idib. Iunijs, ∞. 1611. Parenti vtrique saluere & gaudere.

E P I S T. X I I.

Antuerpiam.

FRANCISCO SWEERTIO F. S. D.

LI B E N S tuas litteras hunc vidi, è quibus quæ apud partes nostras feruntur aut iactantur omnia didici. Nam Deme- trianas cum lego, ipsos & eorum sensum videor audire. Neque ambigo apparatus & vires aliquas esse: an tantas, an in tempore, & quod caput est, feliciter exferendas, suspendo, & optimo magistro Tempori committo. Quod de Italo meo scribis, & te auidè exemplaria expectare, videbis breui (nam & brevis libellus est) ac simul eius imperitiam. nam impudentiam omitto, quæ mundo innotuit: per me autem, illa. Equidem nihil minus libenter

benter facio, quàm repugno, etiam læsus, etiam in facili & iustâ causâ : sed hîc æui gratiâ aliquid dicendum fuit. quia plerique fauent contra nos dicentibus, & sine examine, pedibus in partes illas eunt. Retrahendi sunt, & vel inuitis oculis fulgor veritatis inferendus. Audaçter dico, qui mea leger, quales sumus, illum & me norit. At de Britannicis iudicijs, risi. Etiam N. (doctus & industrius vir) me miseratur? Ego illû, si seriò ita sentit : & omnis doctrina vetus & vera, nugæ & ludi sunt; aut talia habenda à modicè doctis, quæ scripsit LVCIVS meus dicam, an Apuleij? Satis hîc. ego in scripto repressi, & Europæ ostendi futilia hæc iudicia nec nauci esse : nec benè Pygmæum imponi in colosso. Tacitus & ego (liberè, liberè dico) non sumus ad hos arbitros aut Censores. Sed iterùm de republicâ. quæ me hac ætate sollicitum habet : tu si quid audies (& audis) scribe, sine præstationis periculo, & vt audies tantùm. Vale mi SWEERTI. Louanij, VIII. Kal. Iul. ∞. IOCH. Tuam saluto, & prolem crescere voueo ac valere.

EPIST. XIII.

Tornacum.

IOANNI BVCHAERIO *Doctori Theologo.*

POPVLAREM tuum, & nostrum auditorem Vacquerium, libens vidi, magis quia à te veniebat, & litteras etiam, id est pignus affectus tui, ferebat. Amo & æstimo te iamdudum, nec à temporibus iudicia mea pendent, quæ Ratio format, illa æterna, & à fluxu casuum euentuumque non suspensa. Vbicumque es, quocumque munere aut fato, scio te BVCHAERIVM esse, id est virum seriò probum & doctum, & amore talium dignum. A me præsto, tu redde, ab affectu quidem merenti. Iste, quem vides, vester est : commendo, nec onus tamen impono, qui scio te in externo solo esse, & alienæ sapè gratiæ indigere. Sed vultum atque animum exhibe : sufficit : nec Deus ipse vltà poscat. De Galliâ autem vestrâ, quæ ista sunt? quis non misereatur gentis, in quiete inquietæ? etsi causas tamen intimas nos dissiti parùm scimus, neque cupio equidem, nisi quatenus posteris opus sit tradi. Dies hoc dicet. te Reu^{de} & Eximie Domine, inter ictus Fortunæ stare cupio, & te nixum ac Deo, spernere quicquid as-

sultat, vt fluctus quosdam aquæ abeuntis, & alludentis non lædētis, vbi robustior materia occurrit. Louanij, Kal. Iulij, ∞. 1611.

EPIST. XIII.

Valentianas.

HENRICO D' OVLTREMANNO, Senatori. S. D.

ET libens, & iudicio feci, quòd tuum nomen Centurijs nostris inseruerim: boni militis, & vel inter Triarios, vt sic dicam, accensendi. Non amor hoc solum in me, sed eruditio tua & ingenium postulant, clara & rara inter meos Belgas. Itaque meritò feci, & doleo nō pluries fuisse: quia nouum & nuperum scilicet inter nos commercium hoc litterarum, etsi amore non nouo. Quod autem nunc scribis de Arriâ illâ Pæti, & laudem eius & factum meum probas, ô quàm mihi gratum! O quàm non plebeix mentis talia hæc iudicia! Nam sunt qui aliter, inter graues etiam viros, & nihil nos mirari nisi nostrum, id est Christianum, volunt. Quæ & ipsa herclè miranda & supermiranda fateor: sed quæque suis finibus & æuo claudenda, & aliâ atque aliâ lege vel adspectu laudanda sunt. Vt inter gentiles, quis ex utroque sexu, quis ex omni natione, super hanc Arriam iure se attollat? Et stili mei penicillo factum hoc vnum eius satis expressum censes: ego ambigo, & dicam magis adumbratum. Certè illa lux præstrinxit ingenij aciem, nec plenè etiam admittimus, nedum vt efferamus. Simile in Martialis vltimo versu tu iure notas: nec est pro robore fæminæ in omnia constantis & inuictæ. Sed ô tuum ingenium, & simul vbertatem, in reformatando! testor Genium, admiratus sum. Triginta quattuor sensus (tot adnoto) pro vno substituiti: & quosdam argutos, & altos. Placent maximè isti,

Si ferrum hoc refugis, hoc mihi Pate dolet.

Hunc cape, libertas hic tua Pate sita est,

Pate feri. an trepidam vis iuuen & ipsa manum?

Nec alij degenerant: etsi Martialem excuset, quòd robore iam expresso, affectum illum & castum amorem coniugis voluit etiam notatum. In Coreti nostri fato dolui, non dolui. Nemo bonus optet pessimo hoc æuo esse diuturnus: & nescio an de altero optet.

optet. Monumentum ei à te positum placet : atque ecce versus etiam meos repono, sed alterius rei, quos hîc inclusi. Te nunc animo, etsi ab alloquio auerto. Vale V. C. Louanij, vii. Idus Iul. ∞. 1611.

EPIST. XV.

*Duacum.*BARTHOLOMAEO PETRO LINTRENSI *Doctori Theologo.*

EPISTOLAM tuam, quam affectus solus expressit, accepi, & curam in eâ mei amaui. An possim aliter ? vice parentis in me afficeris, & sollicitè de valetudine non quæris solum, sed iuas. Consilia enim suppeditas, nec à ratione absona, & vsurpanda profectò, si imbecillitas illa & defectio virium etiam nunc me haberet. Sed nuntio tibi, quod gaudeas, meliusculè esse. Antuerpiam, Bruxellam, Hallas profectus fui : & vel ipsa peregrinatio, vel Diua illa Virgo, quod libens credo, me recreauit. Sanè Patronam eam iam olim adoptaui & colui, & sensi variè auxiliarem. Votum quod ei voui & solui, hic habes. De scriptis meis, polliceri haud multa possum, nec in igno labori adhuc subsistere : tamen conficere quædam animus est, iamdiu affecta. Interuenit etiam nescio quis Italus (transfuga & malarum partium, ut audio) qui publico scripto me lacesiuit. Aliquid reposui, & me mittente breui videbis : etsi non magnum aut valdè serium, sed talibus vel ipsorum causâ respondendum est, ut desinant vanitatis, & quod non sunt ne esse se putent, aut putentur. Quod ad *Catonem* attinet, certum nec illum nec prisca xui auctorem esse, imò nec Aufonij in eo stilum aut ingenium agnosci. An ille tamen, quem sagaciter eruisti, videndum ac pensandum est. De me, certè nihil nunc adfirmem : hoc tantum, coli te in isto animo, & amari. Louanij, vi. Idus Iulias, ∞. 1611. cum hostis castris nostris propinquus esse nuntiabatur, id est nobis : etsi de consilio eius nihil etiam liquebat. Nostri in tuto, si tueri se satis habent : in pugna discrimen rem mitti ego nolim, & ratio fortasse mecum.

MAXAEMILIANO VRIENDTIO.

APAGE, plurifariam in epistolâ, etsi amicâ & gratâ, peccas. *Scipione* isto te niti dicis. tunc? qui alteri trepidanti apud me potes *scipio* esse. Peream, iterumque peream, si non te inter primos meos *Belgas* ab elegantia ingenij & morum aestimo, & quod sequitur, amo. Nempe ostendisti, inquis: & me in *Centurijs* illis, ut capite censum, habuisti. Erras mi *Vriendti*, iudicio inter *Classicos* te censeo: sed quid factum? vnam epistolam ad te scribere memini, ea quaesita nusquam comparuit, & *Audeantius* qui mihi à manu est, bonæ fidei iuuenis, querelam & pœnè dolorem in eo meum dicet. Men' tui pudeat? quem iactare & ostentare apud exteros etiam velim, debeamque: & meruisti. Emendabimus, & quamquam à te vitam & famam habes, tamen si non te, affectum erga te (ita viuam) ad posteros propagabo. Mitte, sodes, exemplar epistolæ illius, si tanti fuit ut seruares. *Italo* in me iniurio nuper respondi: videbis, &, scio, ridebis. Tuum *Carmen* in amatum mihi *Symbolum* & *ANTIQUOS MORES*, nimis libens legi: ama, ama & illos ô *Vriendti*, & me, pectore eos teque amantem. Saluto *Hardwynum* nostrum. *Louanij*, ipsâ horâ pœnè quâ tuas vidi. prid. Idus Iul. ∞. *IOCIJ*.

EPIST. XVII.

NICOLAO MONTMORENCIO, *Toparchæ Vendesio*.

DVPLEX beneficium accepisse me interpretor, & scriptio-
nis tuæ, & doni quod misisti. Ipsa profectò scriptio grata,
primum sed firmum testimonium animi tui sic in me affecti.
Quid de dono dicam? breuiter sed fideliter, carissimum esse & à
se mereri. Materies, quæ pietatem, id est caput virtutum, an om-
nem virtutem dicam? tangit. Quisquis eâ caret, aut neglegit,
quid veri non dicam *Christiani* hominis, sed hominis habet? Ad
eam nati omnes, nos quoque peculiari Dei gratiâ instituti su-
mus: teneamus & amplectamur, vnicam quietis hic ancoram,
vnicum ad perpetuam salutem viaticum & viam. Ego verò tan-

to ca-

ro carius hoc tuum habeo, quod uti fruique cottidie eo cogito, & domi vel in ædibus sacris habere hoc precationum vel meditationum instrumentum. Hortatore me non eges: es nobis & omnibus: testari tamen possumus, laudabilius aut utilius operam tuam poni non potuisse, non si Patriæ aut Principi vitam & sanguinem impenderes: ô quàm melius Deo, & cultui eius propagando, hunc animum, hunc stilum! Nobilissime Domine, valere te, & semper hoc agere, Deum precor. Louanij, Idibus Iulij, ∞. 1607.

EPIST. XVIII. *Amstelrodamum.*

HENRICO LAVRENTII SPIEGELIO S. D.

CERTE animum meum tetigit tua scriptio, & corde profecta amicitiae commemoratio, quæ inter nos fuit. Fuit: imò est, atque erit, quamdiu alter nostrum erit. Significas autem de consorte vitæ & thori, quam iterum tibi is adiunctum: & quid dicam aut suadeam? Priorem tuam vidi & noui, probam, modestam, & tui planè ingenij: de istâ (si iudicio elegisti) idem mihi sperare datur, & Deum rogo vota nostra adimplere. Magna res est, ut inquis, in istud mare se dare, in quo fluctus, venti, procellæ interdum: & ipsa res coniugij, priusquam animi coeant, molestias & auersiones suas (interdum & contentiones) habet. Mirum cogitatu, quòd Deus homini solatium & leuamen faminam dedit; sæpè autem contrà est, & nescio quo naturæ vitio in pœnam & noxam abit. Absit ut tibi eueniat, qui miti ingenio amorem prouocas: & si melioris animi aut sanguinis aliqua contigit, cælum in terrâ hac (vaticinor) habebis. Ut tua nunc ætas & prudentia sunt, iudicio elegisse debes: affectui si obsecutus es,

*Non illigatum te triformi
Pegasus expediet Chimera.*

Deus hoc nolit; & in extremâ ætatis metâ spatium decurrere det cum gaudio, & ex prole etiam, si in Fati tabulis ea scripta. Quid voues de coniunctione & colloquio iterum nostro: utinam esse possit, utinam vel spes sit! Sed cum tempora video, quæ supremus ille Arbitrator disponit & ordinat, vereor ut hîc videre
inter

inter nos vetemur, non tamen amare & animisungi, quod facio, & à te fieri deponco. Vale mi amicissime Spiegelii. Louanij, vi. Idus Sextil. ∞. 16CII.

EPIST. XIX.

Bruxellam.

PETRO PANTINO V. R.

EN libellos nostros; inspice, & ride. facies certè in altero, ubi res & verba eò ducent, &, fallor, aut paris mei stupor. Lulumus hoc irritati, non tamen irati: quod scriptio ipsa dicet, in quâ lepidi aut amœni aliquid, vix asperi aut amari. Quid autem exigas aliud? non fuit ille hostis cum quo statim & collato pede pugnaremus: velitandû verbis fuit, & velut præpilata ista dictorum spargenda. Reuera enim nihil ille nisi ^{* φῶσμαι καὶ μόλῳς}: nos dispunximus, ventum eduximus, iacet & flaccet. De meis ista: in tuis, querebâris nuper de onere, quod nouum munus imponit. Videris deponere velle: nec dissuadeam, vt ^{* φιλεύδιδον & φιλήσου} illud ingenij tui noui. Sed deponere; id est cum pace & veniâ Principum: nec abiiciendi ius tibi cense. Tua hoc prudentia moderabitur. quæ vtinam & in publicis nostris luceat! Nam ista quò eunt? quid si Galli etiam se miscant? Timeo, quod prouidi omnes: & eueniet, si vera quæ de occultis illis cõtionibus narrantur. Si quid certum habes, significa, me ama, & vale. Louanij, v. Idus Sextil. ∞. 16CII.

* inflatio
& viru.

* tranquillitatem
& quietem amans.

EPIST. XX.

Valentianus.

HENRICO D' OULTREMANNO S. D.

CARMEN tuum in Senecam accepi, bonâ fide, bonum. Vtar, sed quando? quando, inquis, Seneca tuus prodibit? Definire non possum, vt hæc sunt tempora, sed & vt mea valetudo. Nõnne illa vides ad Martem omnia, non ad pacatas nostras Diuas? Iamdiu quidem ea turbida, sed nunc maximè,

Nunc mare, nunc siluæ

Threicio Aquilone sonant.

Vides exercitus & instructas vtrunque classes: & nos in medio aut propinquo, ab euentu pendentes. Nõnne hæc sunt, quæ

— *vite*

— *vite rationes vertere possint,*

Fortunasque tuas omnes turbare timore?

Sunt, si vulgum spectes : à quo tamen iamdiu electione & iudicio me excreui, Virtuti & Constantiæ propior, & externa ista leui & spernente oculo delibans . O si valetudo tantum mihi firmior ! nihil me turbet,

Non si terra mari miscbitur, & mare calo.

Hæ cogitationes meæ aut interna exercitia sunt, mi d' Oultremanne, quibus me firmo aut erigo : & sine prouocatione aut instantiâ, in Fortunam accingor.

Quò me fata trahent, virtus secura sequetur.

Sed cum Enniano Neoptolemo, *Philosophandum, verum paucis.* Libellum hunc vides : an & is pro philosopho ? An non melius ex alto despicere, & nec audire quidem pueros istos vagientes ? Fortasse. sed nec illud inutile, semel qui simus ostendere, & illos ad Delphicum illud ducere, vt *Se norint.* Feci, iudica, & serio amantem ama. Louanij, XIX. Kal. Septemb. ∞ . 10011.

EPIST. XXI.

Lucemburgum.

F. PHILIPPO BOSKHIERO, *Ordinis D. Francisci* S. D.

FATEOR & agnosco culpam, quæ videri potuit, & non fuit. Silui ad tuas, sed quâ causâ ? morbi an languoris, qui tenuit & ad beata loca (ita sperabam) pænè traxit. Deduxit inquam, non traxit. nam cur inuitus è vitâ abeam, in quâ manere nihil inuitet ? Procellas & nimbos vides, vt in noui orbis quibusdam damnatis insulis, sine pausâ perpètes ; vides & vitia magnis auditibus crescere : vides ipsas delicias nostras & meliorum mentium, dico litteras, cursu non gradu abire. Itaque pransus paratus eram, vt ait ille : Imperator tamen in statione etiam manere iussit ; & nutui eius audiens esse debeam, non solum decreto. Eidem tu mi Boskhieri, qui corpore dissuègeris, nec vultus aut sermonis mei copiam habere doles. Cur autem ? in exiguo ista sunt : animis adesse atque hædere possumus, & testor te meo carum esse. Scripta tua faciunt, in quibus non imitatio, sed imago mei, & pænè ego. Affectus in eo tuus elucet : sed & ingenium, qui tam feliciter quod vis potes . Adolescentem à te commendatum vidi, af-

C

fatus

fatus sum paucis : sed in ijsipfis paucis agnoui ingenuam mentem, & melioribus natam . Qui has fert, dedi & libellum à me ferendum, nouitium nostrum fœtum . Ridebis pugnantem . Lipsium: quo nihil (verè dicam) mitius: sed, vt poëta ait,

Sapè etiam instanti læsa repugnat ouis.

Et caussas rescripti alias publicè dedi, leges, & me amabis, & quod adhæret, precibus iuuabis apud Numen, cui cortidie facis. Ita salue R. P. & mihi percare. Louanij, XVIII. Kal. Sept. ∞. IOCII.

EPIST. XXII.

Gracium.

MARTINO ANTONIO DELRIO *Presbytero Soc. Iesw*

Tv ad extremas Germaniæ oras, ego nuper ad illas Fati vltimas relegatus videbar: iterum viuo (sic loquendum est) & semper in te meus amor. EPISTOLAS nostras vidisti? te in ijs, etsi alia duabus etiã Centurijs seruantur. Nam partiri me vides, & in quamq; Centuriam plures annos velle insertos. Quid autem hoc tui silentij? ægrotas, fastidis, an (quod abhorreo) contemnis? Vidisti in illa Itali, qui proteruè me laceffit? hîc Rescriptum meum habes, breue sed forte, aut fallor, & tibi ac cuicumque bonæ mentis iustum probumque. O petulantiam simul, & insciam! De æuo quid sperem nescio, cum has exerrationes video, & probatas etiam, quibus ego probari me pretium censebam. Quid est? mens me aut illos deserit? an bonâ fide, & liberè, melior ille doctrinæ Genius Europam nostram fugit? Hæc priuata: publica in metu, & nobis proprio. Hostis adfuit, equitum peditumque vi succinctus: vigilarunt Principes, & ille abiit, alibi vires (utinam pari fortunâ!) explicaturus. Vobis quoque Belona vestra, sed fatali hostium ignauia parum etiam damnosa. Deus ita porro donet, & optimos illos Principes saluos auctosque velit: te imprimis mi Pater. Scribe, scribe, aut irasci me non dicam, sed posse. Louanij, XVII. Kal. Sept. ∞. IOCII.

EPIST.

EPIST. XXIII.

Bruxellam.

PETRO LA-TORRIO, *Quintanadueñas.*

SCRIPTIO & animus tuus mihi grata: è quibus illa in me affectum, hic in virtutem & sapientiam præfert. Perseuerare te, in isto maximè, id hortor mi La-torri: quo fine in vitam venisse nos, & diuinâ illâ imagine ornatos, non ignoras. Consulis me de itinere tuo, an mansione. Breuiter, mihi mansio placeat: & vbi melius, quàm apud domesticum illum tuum magnum doctorem? Auunculum dico, cuius prudentia, virtus, etiam doctrina mihi nota. Ad illius Scauolæ latus hæreas, & affectum eius tibi pignora: quod non aliâ re magis facies, quàm studio & promptitudine discendi. Quid si etiam (sed de eius consilio) de vinclo aliquo iugali cogites? Quod ætas tua non abnuuit, sed nec vtilitas: ac sæpè, vt noster Tacitus, *matrimonium ad maiora nitenti decus ac robur fuit.* Sed de consilio, vt dixi, eius à quo pendere debes, & vt cum Lucretio hoc dicam,

— *ad cuius numen nutumque moueri.*

Habes sensum meum, sed compendio: multiloquium & occupatiunculæ & natura mea refutant. Louanij, vi. Kal. Septemb. ∞. IOCH.

EPIST. XXIIII.

Antuerpiam.

HENRICO VWENO I^{to} S. D.

IVRE extollis liberalitatem Arschorani Ducis: rara est, & apud nostros præsertim populares. qui quiduis magis in pretio fortassis habent, quàm id cui pretium non reponant. Sed ita mores & iudicia: cum quibus pugnare me iubet, quisquis ad scriptiorem vocat. A quâ, vt ista omittam, valetudo tamen satis auocat; non illa nunc quidem abiecta, sed non iterum per studia (satis sensimus) abijcienda. Libellum nostrum non displicuisse, gaudeo: hoc scio, æquis & iniquis arbitris hominem illum repulsum & reuictum. Alius exorietur, & iam audio: eamus, & hoc fine laboremus. Omitto: de rep. magis angor animi. Grauiam relicta discessu, an fugam dicam, nostrorum hîc audimus. Adfuit mihi

C 2

cx

ex Italicis copijs vir nobilis & doctus, qui narrauit visa. Quid autem de Brabantia nostra speres, si illam & quæ adhærere (Buscumducis, & reliqua Geldriae) amittimus? Consilia nostrorum iamdiu non capio: qui spem totam in Pluto reponere videntur, sed vtinam non cæco! A Gallia pax & serenitas iterum nunciantur: palam quidem. quæ in animo nubes aut nimbi aggregentur, nunc suspicio, actiones postea dicant. Valere te, cum Tuâ, mi Vvrene amicissime opto, & Robianum illum nostrum saluere. Louanij, vi. Kal. Sept. ∞. 1611.

EPIST. XXV.

Lutetiam.

IACOBO AVGVSTO THVANO, *Senatus Presidi.*

FRATRIS tui filium, & in eo THVANOS vidimus, id est, magnorum illorum virorum non stirpem solum, sed mentem. Multa in eo comitas, virtutis & doctrinae amor, & qui breui sermone se planè in pectus nostrum immisit, & ut sic dicam, illatebrauit. Nec tui affectus nos celauit, etsi olim cogniti: sed sic perseuerare & viuere, id quoque, gratum, & à tali teste, audire. Vtinam illa tua consors viuat! quam abisse, nunc denique mihi auditum. De inuacitudine olim aliquid: sed exitiabilem fuisse, hoc fugiebat. Scissem, & solatij aliquid à me habuisses: an & eguisses? Nam tuus IOBVS domi, & à te, omnia dicta aut dicenda suppeditabat. In historia tuæ gentis & Regum te pergere gaudeo, & quàm materia & silua rerum cottidie crescit? Illa nupera coniuratio prodigiosa fuit; extincta ab Hercule: quando nostra hæc bella? Lenta, pænè dicam perpetua:

Et vereor ne tarda prius per membra senectus

Serpat, & in nobis vitæ claustra resoluat,

quàm ponere aut remitti videamus. Te & vestrum regnum obiter semel vellem, & acre atque internum votum est: an damnaboreius, nescio: sed cupiens sum, & tui amans, Vir Amplissime, cum Casaubono, quem saluto. Louanij, vi. Kal. Sept. ∞. 1611.

EPIST.

EPIST. XXVI.

Madrítum.

LUPERCIO LEONARDO ARGENSOLAE S. M. *ex animo* D.

O AMICAM tuam scriptionem ! ô elegantem & eruditam ! Et pararium tu etiam alium quæras meo amori ? Mihi crede, vel alter hic titulus iungat & adstringat : quid uterque , & sic eximius ? Inus, imus quò nos trahis , & amicitia ac fidei dextram reddimus porrigenti. Tibi tantum ? imò & fratribus tuis duobus, quos ab eadem duplici notâ commendas : & ut nuncies ijs de affectu meo mutuo, hoc rogo. Mi Luperce, tales Geryonæ plures in Hispaniâ nobis sunt, regnum teneat, sed in litteris : quoniam illud sceptrorum magnanimo dicto spernis. Sed quò pauciores ibi, magis fortasse lucetis, sicut in nocte clariora illa alstra. Quod autem hortaris me ad edenda porrò quæ concepi & affeci, ac nominatim vestrum Senecam : velle non abnuo, utique de isto, quem amo & æstimo super omnes (audebo dicere) Sapientia doctores. Gloriamini, & quamquam Hispania illa multa pacis decora tulit,

Nil tamen hoc habuisse viro præclarior in se,

Nec sanctum magis, & mirum rarumque videtur.

Itaque iure operam ei damus, & adminiculamur, quâ possumus : sed inualetudo tardat aut sustinet, tum & ætas mea frigus iam & ignauiam habet. Quid etiam ? assidua tristitia hæc temporum, bellorum implexa series, animum non erigit : imò sapientiâ & constantiâ opus est, ut à lapsu teneamus. Sortem nostram, etsi diffitus, audis : & nisi adamantinus es, miseraris. Vobis gratulor in illâ pace ingenium atque has artes colentibus : & ut diu liceat, Numen precor. De consilio tuo scriptionis, & ut mare illud Pacificum siue Mortuum (ita eleganter iocaris) nauiges ac teneas, omnino probo, ac consuadeo : ad nostrum istud Arctœum si venis, pericula sunt, & nec Vlysses tutò nauiger :

— ita perfurit acri

Cum fremitu, seuitque minaci murmure pontus.

Tuta, tuta, id est vetera, & me eorum amantem, ama. Ego te & tuos fratres, certò & fide antiquâ. Louanij, IIII. Kal. Sept. posttridie quàm tuas vidi, ∞. IOCII.

C ;

EPIST.

EPIST. XXVII.

Bruxellam.

NUNNO MENDOZAE V. N. & Principi à cubiculo.

RESPONSVM hîc habes ad amicam, similiter elegantem, & eruditam (hæc iungenda sunt) Lupercij epistolam : qui à se meretur amorem, sine ullo interprete aut proxenerâ. O virum veteris Genij, & melioris æui ! Has scintillas epistola eius iacit, quibus me quidem in amorem sui accendit. Sed respondi, & titulum adieci, quem tu in magno ponebas, AMICI LIPSIIANI: verè ita sum, & ero, qui sic virtutem, doctrinam, & elegantiam amant. Plures modò Hispania vestra nobis donet ! quod fiet, cùm Deo visum, & Parnassus ille qui in Græciâ exaruit, frondes & aquas suas in Iberiâ proferet & funder. Opto, opto: nos & vos beatos ! Quod scribis porrò, in ipsis castris mentem & affectum tuum ad me isse, gaudeo: & repono tibi seriò, nec immemorem tui aut incurium Lipsium egisse. Sed heu, quàm parum adhuc ex voto militares nostræ expeditiones ! Quid in Fatis sit, nescio: sed in causâ optimâ spem talem non defero, & quamquam tarda aut ambigua ea videtur, vindico & ad bonos bonam traho. Deus adfirmet, & te Ill^{me} Domine, seruet. Louanij, III. Kal. Septembr. ∞. MDCLII.

EPIST. XXVIII.

Mechliniam.

PETRO PECKIO *Consiliario.*

LAETAM mihi tuam epistolam ! ex animo fateor : à tali, & sic scriptam. In alijs curis studijsque fuisi, sed felicitas & altitudo ingenij tui fecit, vt optima semper amares; nec hoc tantum, sed haberes & potireris. Rarâ hodie sorte. & ferè qui ad res aut negoria se donant, artes aut elegantias, id est animi illum cultum, neglegunt: tu vtraq; iunxisti, & quid nisi Mercurium cum Minervâ? Nam Marfyam me appellare, dedecet : & ille eloquij & simul lucri Deus foro potiùs, meâ quidem designatione, præsit. Sed extra omnem iocum, prudens simul atque elegans es: & tales nobis ad reip. clauum sedeant & gubernent. Veteres vestri Iuris consulti nōane tales fuere? omnium confessione, qui vetera no-

ra norunt: nec ego de bono aut felici sæculo spero siue spondeo, nisi iterum antiquemus. Diuisio ista artium scientiarumque ab imbecillitate nostrâ est, & eius confessio: vos isti, melior progenies, iterum connectite,

— *quod numquam sine perniciali
Discidio potius est seungi, seque gregari.*

Quid te hortor? si dehorter, tamen facias, & vis optimæ naturæ, id est melior in te vel apud te Genius, pervincat. Quod autem & meis libellis eò te duci scribis, benignitatis tuæ est.

— *sic Cereri sua dona merumque Lyao
Reddimus, & diues præda tamen accipis omni
Exuvias Diana tholo.*

Non, inquam, iuuant te nostra, sed delectant. Quo fine & ista accipe, recenter in Italum quemdam (si nomen non imponit) rescripta. Ille in me, ut videbis, petulanter incurrit: excepi, opposui, & scuto saltem me defendi. En nostra præmia! quando rudem accipimus, an nobis damus?

— *suspiro ruris amæni
Riuos, & musco circumlita saxa, nemusque.*

Liceret frui menses an annos patcos, ante mortem! Sperare vix dat ista Belgicæ

*Fortuna, seuo læta negotio, &
Ludum insolentem ludere pertinax:*

& tu quoque, opinor, vides & doles. Sed ite tristitia. in amore tuo acquiesco, quem vultu & sermone nuper, nunc scripto affirmatum, rogo te, iterumque rogo perseverare, in amore & cultu tui meriturum. Louanij, VIII. Idus Septembr. ∞. 1621.

EPIST. XXIX.

Antuerpiam.

IOANNI MORETO S. D.

ITANE filiam tuam abijisse? abijr. Dolorem dedisse? dedit. Ferenda tamen hæc sunt mi amice, ut omnia quæ diuinitus immittuntur, & Æternæ illi legi seriò subiicienda hæc voluntas. Nemo hominum eripuit, nō vis alia aut casus: ille tantum, cum quo nec pugnare possis, nec iustè de eo queri. Ius suum tenet in dando, & adimendo. Plures libros habes, sed in ijs quoque Fa-
tum

tum idem potest polletque: vtere tamen & fructu (longum spero) dum indulget. Habe, ut amissurus; amiseris, tamquam habeas. Quomodo? suavi memoriâ retinendi sunt; & hoc ipsum quod fructi sumus, in lucro & beneficio ponendum. Ingratus ille, qui præteritorum oblitus, præsentia tantum cogitat aut futura. Imò, quod Philosophi dicebant, certissima illa voluptas est, quæ fuit. Amplius mi Morete. Deus sine solatio te non reliquit: non fuit tibi vnica. Ut igitur tunicam si amississes, aliam sumeres & te eâ tegetes: sic nunc fac, pro filiâ ereptâ aliam substitue, imò & filios, & certam iam posteritatem nepotes. Amabas quæ petijt, sed & reliqui sunt quos ames. Itaque ut concludam, dolere tibi licet (quis parenti abnuat?) mætere non licet; lacrymare, sed non plorare. Inter exempla roboris, vnum Plantinum tuum meumque cogita: quem ego in eiusmodi casibus non foretrem solum, sed pænè durum vidi, * ——— *ceci xiegs m oldesv.* Imitare, tuam solare: quod & ego conatus sum epistolio adiuncto. Louanij, vii. Idus Sept. ∞. 1601. Aula hic fuit, Præfex Richardotus in meâ domo.

* ut cornu
amiserit.

EPIST. XXX.

Antuerpiam.

BALTHASARI MORETO SVO.

TRISTIS audiui de morte Hadrianæ sororis tuæ. Illiûsne, quæ ante paucas septimanas vegeta & valida hîc fuit, quæ florem primum adolescentiæ suauiter ostendebat? illius. Vides mi Morete, quàm fata ordinem non seruent, & quos voca ac spes nostra vitæ longæ destinabant, eos abripi, & superstites relinqui languentes aliquos aut senes. Philosophemur, & de nobis quoque cogitemus, hodie fieri posse, quod intra decennium aut lustra aliqua solet. Nihil est tam certum, quàm incertum illud mortis. Itaque Ægyptij olim sapienter, qui *Domos* has nostras, *Hospitia* appellabant; *Sepulchra* autem, *Domos*. Nam mora quàm brevis sæpè in illis est: quàm in istis certa & æterna? Imus, & ibimus: pauci cogitant, nisi cum in metâ sunt, & iam iuerunt. Tu hæc & plura tibi, sed & parentibus subijce: matri maxime, quam scio dolere in hac iacturâ, vel potius mætere. Iacturâ, pænè eius propriâ: & solatium vel auxilium in hac habebat, maiusque

que sperabat. Sextum Tomum Annalium accepi, atque illud sollenne, Gratias dico. Vale. Louanij, vii. Idus Sept. ∞. MDCLII.

EPIST. XXXI.

Bruxellam.

PHILIPPO ARENBERGIO, Baroni Seuenbergæ.

SICUT aspectus tuus nuper gratus iucundusque mihi fuit, & videre hanc indolem ad alta & honesta omnia natam: sic nunc tua scriptio, quæ me in iudicio illo & honestissimâ opinione tui vehementer confirmauit. Genus utrimque inclytum, & stemmata Regum Principumque præfers: sed quàm caipsa illustrare aut ornare studijs Virtutis & Prudentiæ potes, ad quæ adspiras? O nobilissime adolescens, huc te dona: & cetera externa aut aduenticia esse cogita, hæc animi ipsius propria, & æterni illius æterna bona. Et iam viam ingressus es, quæ rectâ eò ducat, imò multum in eâ progressus: sed hoc (da veniam) monenti mihi crede & obsequere, ut non ad delectationem aliquam nudam ista referas, sed ad finem fructumque duplicem, quem adsignaui: Virtutem dico, & Prudentiam, summa in humanis bona. Sicut floribus alij ad odorem aut ad spectum utuntur tantum, apes etiam ad mellificium: sic sedulæ mentes debet, in fructum & usum traducere studia hæc litterarum. In quibus, ut tua nunc ætas & conditio est, Historiarum lectio vel primum locum sibi vindicat, utile ad rempublicam, & consilia actionesque dirigendas, instrumentum. Adhibe. & Iustinum, me suatore, lege velut variarum rerum, gentium, temporum compendium: tum & Plutarchi Vitas, in quibus summatim Græca & Romana habes. Liuium deinde, Polybium, alios licebit adiungere: & cum æuo crescente non peritria solum & iudicium, sed & amor crescet legendi cottidie & discendi. Hæc olim palæstra & velut gymnasium Principum erat, ante susceptam rempublicam, in susceptâ: & ut alia exempla omittam (sexcenta sunt) vnus Theodosij Iunioris eo suggestum. Is de die quidem, iam Imperator, militiæ, Senatui, iudicijs, & vno verbo negotijs vacabat: noctu autem studijs librisque se dabat, candelabro ita affabrè & ingeniosè facto, ut sponte oleum in lucernam instillaret; nec ministris aut interpellatione opus haberet, ad lumen alendum aut producendum.

Vide Socratum in Prasat. Hist. Ecclesiastica, & lege.

D

dum.

dum. Rarum magnumq; exemplum est, vobis magnis imitandum: fac Perillultris Domine, & in tenebris istis reru quasi sidus te datum cense, ad lucendum & dirigendum. Mea scripta, quæ Ill^{mus} Parens tibi dedit, siquid eò facient, gaudebo: & magis, si te persecrari in optimè cœptis audiero, nec abduci ab eâ, quæ mûdo huic imperat, Vanitate. Louanij, iv. Idus Sept. ∞. 1661.

E P I S T. X X X I I.

Valentianas.

HENRICO D' OULTREMANNO, S. D.

OTVAS epistolas! amor eas insidet. ô tuum carmen! venustas & eruditio commendant. Mi d'Oultremanne, iamdiu est cum vulgo te excerptum vidi, sic sublime ferri magis & magis cognosco, cum admoveamur. Parco dicere, non sentire. O patria, quæ ceteris abundas, quàm virorum hodie sterilis aut inopes! Videmus, dolemus: & posterì etiam, vereor, dolebunt. Nam litteræ, aut cultus iste omnis animi (Phœbum me puta) intra lustra bina aut terna, non nisi nomen & umbra erunt. Eò magis tu & similes (etsi quàm pauci similes?) eminentis, & arcto vinculo itis me iunctum: neque nos

Supremâ citius soluet amor die.

Hæc benignè, sed & candidè: & ne vnquam mihi aliquid ex sententiâ, nisi hæc Ex ANIMI SENTENTIA dixi. Sed heus, tunc ad nos? inuito, & rogo. videam hospitium quod melior ille animus insidet, mortale immortalis. Aula hîc iam nunc, & alij hospites, non ab Helicone, aut nostro fonte illo madentes. Res non ex voto, vt scis, tamen vultu constant; & vt cum poetâ dicam,

Gloria mixta malis, afflictaeque ambitus aula.

Terror hîc nobis, & discrimen etiam incumbunt: CONSTANTIA alleuat, & Prouidentia alligat:

Crux est si metuas, vincere quod nequeas.

Ad Carmen tuum redeo, quod auribus meis inerrat: edi & viuere dignum, seu viuo ipse, seu non viuo. Nam seposui & adgre-gauì ijs, quæ à morte etiam velim (& sola illa quidem) vulgari. Tu mi d'Oultremanne,

— cui liquidam pater.

Vocem

Vocem cum citharâ dedit,

his talibus, verè scitamentis Musarum & bellarijs, pascere atque erigere nos perge. Pascor & erigor enim, quò rariores istæ Diales epulæ à meis Belgis. Nam ab exteris, non nego, offeruntur interdum. Tu me semper, semper amaturum, ama. Louanij, prid. Idus Septembr. ∞. IOCII.

EPIST. XXXIII.

Bruxellam.

MAXAEMILIANO VIGNACVRTIO V. N.

EPISTOLAM tuam libens vidi, legi, etsi querelis mixtam, sed quas amor tuus in pietatem & virtutem, & me quoque, temperarit ac lenirit. Doleo equidem in Aulâ te sic iactari: sed Aulam cum dixi, quid miri est? Mare qui intrat & nauigat, fluctus expectat; qui Aulam, hos motus. Illud suauius, cogitare de Franc. Balduini, magni sanè viri, scriptis eruendis & concinnandis: fac mi Vignacurti, & rem publicam ac posteritatem hoc munere auge. Quod in extremo autem de meâ etiam illâ Præfatione est: non offendor libertate: absit: sed audi tamen quod res est, & ratio approbet, talia illa scribi non vt testimonia, sed incitamenta. Monemus magis qui esse debeant, quam testamur sic esse. An nouum fit? Traianum tu illum (etsi egregium Principum) credis tu fuisse ad Plinij laudationem? Idem in alijs: & Reges aut Principes cum laudamus, non adulamur, sed per ambages & flexum ducimus, quò nos & bonum publicum velint eos ire. Ego tuum ingenium, & in purâ virtute afferendâ purum animum amo; vti nam æuum ita sit aut fuerit, vt induamus & vſurpemus! Spem non video, & tamen tecum & te amo: tu me mi Vignacurti. Louanij, xi. Kal. Octobr. ∞. IOCII.

EPIST. XXXIIII.

Bononiam.

GVILIELMO RICHARDOTO S. D.

VLTIMAE tuæ me delectarunt, bonæ mentis atque etiam dictionis plenæ. Amplecteris virtutem, & quæ eò ducit doctrinâ, & præcepta nostra facta tecta habes: quæ nuper in litteris repetij, affectus magis mei testandi, quam vſus tui causâ. Etsi

D 2

cur

cur non repetam atque ingeram? Sicut matres, quæ pueris bellaria & fructus in sinum ingerunt, sollicitè succingunt ne excidant: sic nos satagere conuenit ne pereant, quæ optimè monita olim insinuauimus, & nunc per litteras renouamus. Quod probas & gaudes de responso in LVCIVM, fecimus & forte an iam uideris: haberes certè me mittente, nisi sarcinas istas cursores tabellarij ferre grauarentur. Sed respondimus * *μεγαλείως & ὀφθαλμῶς*, ut in istos decet, qui non nisi remoræ Bonæ mentis sunt, & Virtutis ex professo hostes. Itaque ut leones, aspiciamus & contemnimus:

* magnificè
& genere
id.

* — κύνες δ' ὑπὸ καρχαλώωσι

Πυκνὸν ὑλακπύοντες.

* canes autem
cum gannu-
ra videbis,
latrantesq;
unā.

Fratrem tuum reducein auidè expectamus: pater hîc adfuit, domum meam honestauit, & hospitem magnum mihi dedit. Ad publica ibat cum Principe, ô utinam lata! Sed quid tibi dicam? patria iacet, affligitur, & per seditiones istas (quæ iam in morem, & pænè dicam laudem verterunt,

Pro curia, inuersique mores!

periclitatur aut perit. Deus sustentet, te mi optatissime Richardote nobis seruet, & oculis atque amplexui meo iterum sistat. Louanij, x. Kal. Octobr. ∞. 1611.

EPIST. XXXV.

HADRIANO SAISSEVALLIO, Gallo, domi nobili, S. D.

PARANTI abitum, quod petieras, mitto, atque adeò partem animi tecum mitto. Fateri debeo, comem te, & cum modestiâ suauem, in omni conuictu fuisse: quod gratiam tibi vel amorem apud me aliosque peperit, & pariet quò hæc & te feres. Ista à Naturâ habes, bonâ tibi parente: perge Disciplinam addere, & serijs seuerisque etiam studijs animum formare. Germaniam insidere te suadeam, & probitatem illic natiuam videbis & grauitatem: adsume utraque, non in tuâ gente semper (ut nunc æuui) reperienda. Habet hoc commodi peregrinatio, quòd fas per eam miscere mores & temperare. Ut autem in Musicâ è diuersis vocibus concentum quærimus, & probamus: sic in vitâ, è varietate harmoniam. Sed & alius fructus. Ingenia quædam transla-

translata proficiunt. & vt fœminæ interdum, antè steriles, alijs viris iunctæ concipiunt: sic illa fœcundantur mutatione, & sub alio alioque doctore. Perge cum Deo igitur: qui te meo voto sospitet, & bonum clarumque reddat.

TESTIMONIUM.

QUICVMQVE HAEC LEGETIS,
OFFICIA, CVLTVM, SALVTEM DEFERO.

VIRI boni est virtutem amare & adiutum ire, sicubi ignota ea est, vel testimoniij & subsidij eget. Quod promptè in isto V. N. HADRIANO SAISSEVALLIO, atque etiam meritò, facere me profiteor: quippe qui cum ab annis pluribus nouerim, consueuerim, & virtutis semper, antiquæ pictatis, doctrinæ & humanitatis reppererim peramantem. Quisquis noscet propiùs & accedet, idem mecum fatebitur, nec ei testimonium istud scriptum. Sed sicui subitò occurrit aut obijcitur, vt solet; præsertim cum nunc peregrè ad mercatum optimarum artium eat; hunc rogo fidem nobis habere, istum amare & fouere, affectu illo & auxilio dignum. En me sponsorem, non pœniturum eum si quis benignè complectetur aut faciet: me etiam creditorem, & in accepti tabulas beneficium hoc relaturum. Scripsi & signaui

Louanij, vi. Kal.
Octob. ∞ .MDCII.

Iustus Lipsius Professor, &
Historiographus Regius.

EPIST. XXXVI.

Lugd. Bat.●

CAROLO CLVSIO S. Maximam D.

OMEVM Clusium! iure sic appellem, & in hoc exsultem. Constanter & acriter valdè me amas, nec scriptio solum tua, sed res & munera adfirmant. Iterùm dico, Meum. Quid autem ego? hilum in affectu non cedo, & semper Clusius mihi in animo, sæpè in ore. Deus fecisset, vt habitatione iunctiores fuissimus: multa conuersatio & voluptas comitata essent. Nunc verus illud obtinet, Deum sequi & obsequi. Quæ de re Christianâ publicâ in Pannoniâ nuntias, haud læta vsquequaque sunt, aut mixta: imò nūc terrores meri, & fugæ, & cædes. Illa Alba-Regia

D 3

nuper

nuper recepta, iterum erepta est, promiscuâ omnium qui inerant cæde, aut seruitute. Tartarorum vis ingens in Daciam irruptura sperabatur: copijs nostris exiguis, & lentè etiam paratis. Hęc longinqua: in propinquo nobis turbæ, nec bellum solùm sed seditio affligit. Eritne finem his videre, & semel optatam illam faciem Pacis? Numen faciat: ego te illic & amicos. Quod ad scripta tua reliqua, doleo in morâ hominis, nobis amici. Monebo hercules, & vt publica ea faciat publicâ omniû nostrûm, qui doctrinam amamus, causâ. Illud in clausulâ iucûdum, de vigore oculorum tuorum in hac ætate, mirando mihi & inuidendo. Heu, vbi ego sum: quattuor lustris minor cæcutio; & nisi vitrea auxilia subleuent, vix legam aut scribam. Panè indignor: & magis, quia veteres hac alleuatione vsos non lego. Atquin & illi nōne assidui in studijs? Quid dicam nescio, nisi sortem sic nostram esse: ferendam igitur, & te mi Clusi ætatem amandum. Louanij, IIII. Kal. Octob. ∞. IOCII.

E P I S T. XXXVII.

*Antuerpiam.*IOANNI BAPTISTAE BARONIO *suo* S. D.

EQ V I D E M gaudeo patrem in tua vota, & mea consilia, consensisse. Non tamen quia tua vota, sed quia de plano ita iudico, id fore ex re & vsu tuo. Adnitere, ne opinio hæc nos fallat; & peregrinatio tibi sit, quod debet, morum & vitæ formatio ac magistra. In primis autem, mi Baroni, modestiam retine, & ad te subinde, inter vana aut vaga illa redi. Sicut currus in præcipiti aut decliui fune retinentur, & se sistunt: sic animus debet, vbi quæ allubescunt aut inuitant. Talis Italia erit, ô pulcherrima & cultissima terrarum! sed Sirenas & Circas etiam illic cogita, & esse quæ videas, sed & vites. Plura à me audisti, aut & in meis legisti: non iterò. fiduciam in ipso te habeo, quem Natura ad Virtutem & Modestiam genuit: ne degenera, & ipsum te ac nos audi. Ecce litteras ad nostros illos, quibuscum viuere te iuuat atq; expediat: aliud si in te tuâ possim, pete, & factum putam seriò te amo. Louanij, III. Non. Octob. ∞. IOCII.

Deum ductorem & tutorem tibi precor imo corde. Scribe de viâ,

viâ, si vacat, & cum illic eris : non deero respondere, & consilia-
ri atque auxiliari, si opus.

TESTIMONIUM.

EXTEROS & non plenè & certò nōtos tralaticia humanitas no-
stra commendat : quomodo non istos, qui è domo, disciplina, &
velut sinu nostro prodierunt? In ijs est IO. BAPTISTA BARONIVS,
vir nobilis, ingenio & moribus laudatissimus, & cui ego vel liberos
meos (si Deus dedisset) similes esse exoptem. Quadriennium circiter
apud me egit, ad aliena loca it visendi discendique gratiâ : comitor
eum benivolentiâ, & hac etiam commendatiunculi apud amicos. Vide-
te & excipite libentes, obsecro, vel meâ causâ : paria fecero in re simili
aut aliâ, sic iuste & honestè rogatus. Testor & signo

Louanij, III. Nonas
Octobr. ∞ .1611.

I. Lipsius Professor, &
Historiographus Regius.

EPIST. XXXVIII.

Bononiam.

PHILIPPO RVBENIO SVO S. D.

ANTE dies octo scripsi, iterò in occasione, quia Baronius no-
ster ad vos abit. O quàm libens ! tam libentes illum vos
videte, & suscipite : quod eius & meâ causâ confido facturos.
Velit contubernio etiam vobiscum iungi, & pater cupit : pote-
stis, donec Roma vos alteri subdit. Facite, me petère. Adolescenti-
toni nosti, commodum & comem. De patriâ, ille dicet, aut fa-
ma iam dixit. Ores tristes! * νέκρως καὶ πόλεμος. Medicina tamen il-
linc expectatur, an non sera? Comitum Fontanum venturum
mussant, nostros abituros : sed adhuc mussant. Interea hostis
Grauiâ poritus, Buscoducis imminere dicebatur, solitariâ iam
& penè desertâ. Pars exercitus in seditionem (sollempni iam mo-
re) lapsa, ferrum & ignem nobis minatur. Hostes iudicati sunt
decreto Principum : nondum vindicari. Undique nobis terror:
quem pellere Philosophiâ præceptis conor, & Senecam ad Hel-
uiam matrem (de Exilio est) publicè eo lectum. Ite tristitia. in
priuatis ijdem sumus. Lucio illi Apuleiano respondimus, vidis-
se po-

* Iacet Pa-
troclus.

se potestis. Alia vix cogito, subduci tempus est & viuere nobis ac mori. Louanij, III. Nonas Octobr. ∞. MDCL.

Hæc scripta etiam D. Præposito sunt, ad quem ego nuper vberimè: saluere nunc opto.

EPIST. XXXIX.

Lugd. Bat.

FRANCISCO RAPHELENGIO SVO S. D.

EXCVSARE te silentium tuum mi Raphelengi video, an & probare? An ipsi tibi, non dicam mihi? Ab effectu hæc querela est: & nisi ille esset, non requirerem affatus istos litterarios, qui me fatigant, nec sinunt iuris aut quietis meæ esse. Sed amo te iam olim: & quia hoc, curo: & vtrumque, desiderium excitat audiendi de absente & sciendi. Sed mitto præterita, & dono: excusa vnâ re, vt emendes. Epistola quidem hæc tua copiosa, & ante oculos mihi posuit peregrinationes tuas omnes, & plerasq; actionum. Quid secutus sis, video: otium & quietem, quâ ingenuæ mentes capiuntur, internâ tamē semper aliquâ actione & motu. Fratris mors reuocauit: id est Deus. pare, & fatis obsequere, & personam sustine quam imposuerunt. Deserere te hoc munus, ab auo iam trāsmissum, mihi non placeat: nisi nimis sapere tibi placeat, & idcō nō sapere, quia nimis. Vbique locorum quies esse animo destinato potest, in Baijs medijs, in Alexādiâ, aut Româ: & semper ab externis ad se redire fas, qui illa non estimat, & hæc amat. Ego munus meū in publico fungor, colloquia varia & vana etiā habeo: vna ambulatiuncula in horto aut mœnibus me mihi reddit, & in Elysij campis, id est tranquillitate, reponit. Qui locis ista alligat, fallitur: etsi eligere mallet, si copia esset: sed mores, opes, fata prohibēt: & ijs obsequi igitur, sapientia est, & cogitare se hominem nō Deum esse. Ipsi Genij munia sua & leges habent, nec errant liberè aut otiantur, siue operantur. Sed de peregrinatione iudicia tua scribis super Italiâ, Germaniâ, ô mihi proba! Omnino ita est. conueniunt in illo genere, qualitate aliâ differunt quam exponis. Pauci hæc ita iudicant: tu macte. Sed & Belgicam nostram quod ante oras omnes terrasque Europæ ponis; nec aberras. illa superat, si homines, industriam, comitatem, mores, bona terræ nata aut inuecta respicis: superat, inquam,

inquam, nec Europæ solum tractus, sed orbis vniuersi. Vnam Sinarum ditionem excipio: si vera, quæ de eâ famâ feruntur. Scire iam potestis, quia vestri, strenuâ & felici temeritate, ad ea quodque loca, ut audimus, equis ligneis vehuntur. Utinam pax inmodò hanc nostram respiciat! quod vix iam vouemus, adeò non speramus. Alioqui huc te vocem, & viuere & mori in genitili tuo solo, in oculis nostris, aut non longinquum, velim. Vide, & sustine etiam: si fortasse Deus, præter spem aut speciem, aliquid misertus nostri donet. Nam mihi crede, in electione cuiuscunque loci discrimen est: aut inibi, aut à te, aliquid mali turbæque erit: exemplum à Plotino Platonico cape. Ille vir sapientiâ inclytus, eius & quieris suæ studio, Romam reliquit, Campaniam elegit, aëre, copiâ, fructibus, delicijs celebrem: & vbi pax immota (illo quidem æuo) & nec metus belli erat. Iuit, insedit: quid factum? Consilia humana Fatum vicit, morbus totum corpus inua sit, membra & nerui riguerunt, oculorum orbes caligarunt, & putre denique corpus sanguinis corrupti vitio contabuit. Vbi es humana prouidentia, aut electio? Vides, mi Raphelengi, hominem humana vbique pati: locum non excipere, sed animum vincere. quem fas semper exerere, & quietum ac modestum sine peruicaciâ aut arrogantia sapere: quod facere te hortor, & pro amore in te rogo. Itaque de domo aut alijs, nihil festinare suadeam: maturè & circumspicè omnia. quia, ut ille ait,

* — *ῥεγνῶν μὲν οἱ ταχέως, ἐκ ἀσφαλείης.*

** haud-
ta celeris
est pruden-
tia.*

Vale mi Raphelengi, cum fratre Iusto, & sorore. Louanij, XI. Kal. Nouembr. ∞. 1611.

De Polliene nostro, triste quod nuntias. De morbo audieram, à te de morte. Singulariter amaui: sed quid est? decuriam amicorū hoc anno amisi, siue præmisi. nam & ego sum in cursu.

EPIST. XL.

Bruxellam.

GVILIELMO GREVIO *Nepoti suo ex sorore S. optat.*

ACCEPI primas tuas litteras, quibus ostendis aliquid in studijs doctrinæ te promouisse. Pro ætate, non queror: industriam adiungi velim & incitatum animum, qui ad optatam nobis metam te sistat. Quid metam? semper hinc in viâ sumus,

E

& nul-

& nulla ætas, nullum ingenium, ad vltima Scientiæ aut Sapien-
tiæ perducet. In Deo hæc perfectio: sed nos nempe imago eius
sumus, & ideo conniti pro captu & viribus debemus accedere
proximè, & referre illum in nobis ac circumferre. Nam in exem-
plum nati sumus, atque etiam auxilium: iuuare nos, tum alios,
& æstimare vnius corporis membra esse. Magnushic orbis est:
sed vna ciuitas. conspiremus in mutuos vsus, & ad hanc rem à
pueritiâ apreimur. Tua nunc hæc ætas est: in palæstrâ es ad di-
scendum & exercendum: excitare ô meus sanguis, & me quoque
ad instar aliquod propone. Vides tot annos non mihi vixisse? la-
borasse & operatum esse reip. voce aut scriptis? Sequere. atque
vtinam diem videam, quo spes alluceat te per hæc & illa vete-
rum vestigia iturum: mea, & pænè me, impendam, vt appara-
tum & instrumenta habeas, id est libros & doctores. Etsi de do-
ctore, iam curauimus: habes virum præter vulgus doctum, &
tui amantem: audi, sequere, obsequere, magis quàm ipsos quibus
vitam debes. Nam nasci vulgare est: benè institui, altera vita est,
& quæ ad Æternam illam ducit. Vota apud te DEVS OPTIME
MAXIME concipio, vt quoniam me prolis exsortem voluisti,
hunc è Sorore (nimis olim carâ) nepotem ad veræ doctrinæ &
virtutis studia ire patiaris, aut potius impellas: nobis solatium &
gaudium, tibi gloriam, alijs lumen & exemplar. Fiat, & tu con-
tende, aut iam nunc abdo te & sepono. Louanij, prid. Non.
Nouembr. ∞. 1611.

E P I S T. X L I.

*Frankfurtum.*MARQUARDO FREHERO 1^{to}.

MELLI mihi fuit, ex interuallo regustare tuum amorem.
Coràm feceram, cum Frankofurtum me fors duxisset, et-
iam mox per litteras: abiunctio deinde longior, & meæ an tuæ
occupationes interpellarunt. Si vis, illuc redeamus, & exserat se
amor qui in pectore hæret, & ab eo numquam exsulauit. Tua
interea vidi, & in ijs te redamaui: præsertim illa Historica, quæ
blattis & tincis tu inuidisti, & è situ eruta illustrasti. Vtile opus,
magis quàm hæc recentia, & turbida quædam velut musta,
passim nobis à crudis studiorum ingenijs propinata. Ad metam
litteræ

litteræ properant, & nimia sæcunditas ista vires exhaurit, si lustrum etiam vnum alterumque ea manet. Constantij SAPHYRVM iam nunc lustrari; nec de gemmâ aut sculpturâ scio, te in eâ artificem & variè cælatorem agnosco. Bene, quod nostro VELSERO inscripseris: & cui amanti magis aut intelligenti? Vir magnus est, vel maximis comparatus; & BOÏCA eius iam vidi, nondum legi. Nos nescio quid philosophamur, quò ætas & Genius ipse meus vocant: nec scio an alijs, sed nobis (ô quàm decorè aut vtiliter per hæc tempora!) philosophamur. Te amamus, & amaturi sumus, melioris animi & iudicij virum: tuam etiam MARGARIM, tuâ, Vtenhouij, eius causâ. Talis illa mulierum non mereatur? dissuauior: sed castè,

— *fuge suspicari*

Cuius vndenum trepidant ætas

Claudere lustrum.

Louanij, postrid. Non. Nouembr. ∞. 1731.

EPIST. XLII.

Antuerpiam.

HERIBERTO ROSWEYO Soc. Iesu.

LEGI tuas, & quæ è Batauis adiunctæ. Ad has in tempore respondebo: nec enim est quod properari poscat: & ipse scriptor mihi notus, non quidem ab illâ primariâ notâ, & amicitiz tesserâ, id est Pietate. De Oratiunculâ illâ meo nomine vulgatâ, quid miri est? sic lubet ludere, imò non ludere sed rem facere, Typographis dico. Eorum instinctu, & malitiâ deinde se præbente, præclari isti fœtus oriuntur: quorum illum nuperum quàm in ipso penè partu exstinxerim, Epistola in ea ad Senatum Francofurtensem, iam publicata, dicit. Simile in isto, inquires. Non faciam, quis finis sit? magis prouocem his oppositionibus: nec meum est, sed Principum, his falsimonij mederi. Gladio aliquo iustitiæ rescindenda ista, igne Decreti abolenda erant. Viderint, qui habenas tenent: ego per ista non deterior, ne turpior quidem apud eos, qui sanâ mente sunt, nec nobis iniquâ. Aliorum scabies facilè suscitatur his frictionibus, fateor: pruriant, garriant, me pausarium non habebunt. Sed de Oratiunculâ illâ, scito etiam non nouum esse, est ipsa, quæ ante decem annos publi-

blicata, à me refutata aut reiecta publicè in ijs De Cruce, AD
LECTOREM. Vale V. R. & P. Rectori ex animo à me salutem.
Louanij, poſtrid. Non. Nouembr. ∞. 1611.

EPIST. XLIII.

*Brugas.*ANTONIO RICHARDOTO *Suo* S. -D.

EPISTOLAM pro te vidi, & ſcito me doluiſſe. Nam auide te
exſpectabam, iamdiu non viſum, & in animo tamen ge-
ſtatum: atque ita me Deus ille in ſuperis locis, vt ego te hîc con-
ſpici cupiebam. Cauſæ tamen dilati aduentus (non enim omiſ-
ſi) quia iuſtæ videntur, querelam deſino: & gratulationem po-
tiùs nuptijs amatæ ſororis tuæ ſubiungo. Deus velit eas lætas
fauſtasque nunc & in poſterum eſſe, & proles etiam, familiæ ve-
ſtræ fulcra. Floret ea, & cæleſti quòdam fauore adſurgit: ſit lon-
gum, & vos quoque pergite mereri. Apud me non es, ſed meus
etiam nunc es: itaque curo, & monita mea interuenient, ſpe-
ro, ſemper grata. Ab animo certè meo debent. Vidisti Italiam
& oras exteras, multa in frontem pulchra & ſplendentia: redi
identidem ad vera & interna bona, atque ijs te exorna. Aula te
nunc habebit, aut habet: aula: id eſt, quantumuis compoſita, in
quâ vana & ſplendentia multa ſunt, ſed fallacia, & ſuco quo-
dam circumlita, introrſus vacua aut praua. Noſce, & te excërpe,
& vera ac ſolida illa affecta. Oquàm me, magis te, iunet, ſi Se-
necam interdum legas ſeriò & ſcrutère! Quàm ille te firmet
contra lapſus, & res omnes pretijs ſuis doceat æſtimare? Scio in
hac ætate non omnia talia guſtum habere: ſed te volo eſſe exi-
mium, & à meâ diſciplinâ proſectum, incedere velut exem-
plum. Bella eſt elegantia, & comitas iſta morum: quis neſcit
aut negat? ſed Sapientia ſi adiungitur, & eius mater aut pro-
les Modestia, quantum decus accedit? ſic vt auro, à gemmâ.
Satis. audi & ama iſta, ac me tui peramantem. Louanij, xvi.
Kal. Decembr. ∞. 1611.

EPIST.

EPIST. XLIIII. *Mechliniam.*NICOLAO OVDARTO *semper-suo* S. D.

MIRATVM me in lectione litterarum tuarum dicam? licet. Iratum? non licet: & tamen pænè debui, in opinione de me, tam alienâ à me, & quæ in somnio caput hoc numquam inuasit. Ego migrem? ego Leodicum? Nam quâ causâ? Res turbidæ sunt, scio: nisi mutamur, deteriores etiam futuræ: quid tamen ad me eximie, vt ante alios, & præter alios, de abitione cogitem, id est fugâ? Ego verò à vitâ potiùs, quàm vt sic ab honesto, & illâ CONSTANTIA, quam stilo illultraui, & factis non obsecrabo. Heus tu, quisquis tibi auctor (bonâ veniâ etiam illius, quem reuereri me scis) à vano sumpsit, aut à se pænè dicam, sumpsit. Nihil rei, nihil sermonis, nihil cogitationis. Possum me purgare planiùs? Vnum hoc nunc tamè habe. Si res prorsum ad vltima, id est ad incitas eant, libenter me Leodicum sedè refugij lecturum, urbem Deo & religioni iam olim amicam, in me pronam, & quod inuitet, viris aliquot egregijs prudentiâ & doctrinâ infessam. Habes de istâ re, & quidem Sibyllæ dictis veriora. De publicâ, piget scribere, an & pudet? Vbi consilia? vbi vel umbra prudentiæ, in re præsertim militari? Ridentur vetera, & nos eorum amantes: sed ij qui amplectuntur, quàm nos rideant, & verberent etiam, vides. Audi iterùm aliquid, quasi à Sibylla aut Marcio. Quamdiu in nouis istis, id est vilibus & prauis manemus, melior & altior Fortuna nos despiciet, nec Victoria alas suas huc verteret. Vgebunt illi, *accipiter velut molles columbas*. Omitto non læta: cum Pantino sentio, nec sentio: remedio locus est, si morbum agnoscit æger. Si non, Belgica per me esto

Victima nil miserantis Orci.

Vale mi optime, & constantem me inter omnes fluctus (ita videbis) constanter ama. Louanij, XIII. Kal. Octobr. ∞. MDCLII.

E 3 . . . EPIST.

EPIST. XLV.

Antuerpiam.

IOANNI WOVERIO SVO S. D.

VENISTI? mihi nondum, nisi videro. Ades, amplectar te & teneam, & animos ac sermones vnà misceamus. Quando facis? anni mihi, dies: magis quàm pupillis istis

— quos arcta premit custodia matrum.

Gaudeo Italiam, Hispaniam, Galliam, denique & Batauiam vidisse: in hac vltimâ illum quem amo. Et amari te ab eo nuntias, volenti & credenti. Sed ista & alia coràm: reperies me capite semicanum, aut certè mento: animo fortem, corpusculo, vt soleo, id est Augusti verbo *betizantem*. Veni, veni, refice hoc, & illum auge: quod rogate me dicam, an iubere? Vtrumque, neque vindiçtâ etiam te manumissi. Domum meam nosti: caue in aliam, & hoc quoque ego ac mea (nostis illam lunonem? ne offende) iubemus. Louanij, postrid. Kal. xbris, ∞. MDCLII.

EPIST. XLVI.

Harlemum.

GERARDO BUYTEWECHIO S. D.

LAETVM auditu de tuâ prole, mihi qui amicus sim, quid tibi qui pater? Euge! hæc crescat, viuat; & aliam, ac melioris quidem sexus, Deus ille communis omnium parens donet. Ecce fructum & gaudia coniugij mi Buytewechi: sed & curas suas trahent, & habe istam vt vsu, non mancipiò datam, si sapis. Homo hominem genuisti. EPISTOLAS meas non displicere illic, hoc satis est: probari omnia, ægrè id mihi probes, in isto æuo, & dissentiente plurifariam sensu. Sed satis, non carpi: & si faciant, quid ad me? Animum & me bonum fuisse cùm scripsi, hoc scio: & suis quæque temporibus aut hominibus aptasse. quod vnum in Epistolâ arbitror requiri, à prudente quidem & æquo censore. Alij abeant, valeant, vapulent vel cum LVCIÒ nostro. Sed heus, vos nunc nōne feroces? omnia rident, terrâ, mari: vtinam nos vnà, & verus illud corpus iterùm simus. Io. Wouerius valdè mihi amatus iuuenis te quæsiuit Lugduni nostræ, non reperit: exspecto reducem, & is quoque (ne nescias) ædes meas in-

scdir.

sedit. Fructum rettulit, virtuti amicus, vanitati extraneus, & qui rectâ viâ ad Sapientiae ædem tendit. Vellem vidisses. At Nic. Mi-caulium nostrum nec vltra videbis, qui abiit

Illuc, unde negant redire quemquam.

In flore æui fuisse scis, in viâ ad honores, & merebatur: Deo visum eripere, & apud se (ita sperare Pietas eius iubet) habere. Nos trahimus animam, & animo etiam stamus; corpusculo languidi, nec de firmitate aut diuturnitate eius spondentes. Sed hæc quidem, non dicam cura, vix cogitatio me vltra habet: sto succinctus, & cum innuerit ille Imperator, viam carpo. Sandelinus ille noster nuperrimè apud me fuit: ô si tu vnâ! sed libens vidi, & in eo Bataviam, semper mihi caram regustaui. Valere te cupio mi Buytewechi, quod ex te est, ex quâ est, ex quibus tu & illa estis. Louanij, postrid. Kal. xbres, ∞. 1611.

EPIST. XLVII.

Bruxellam.

REMACLO ROBERTI S. D.

MALE & per errorem hoc consul Grauiensis, quod binas ad te dedissem. ego verò nullas, neque occasio fuit: & abeunt salutem ad te ferendam mandaueram, & siquid haberes de republicâ vti significares. Fecisti in his litteris: atque vtinam lætiora fas nuntiare! Hostes abierunt è prouinciâ spoliata aut vastata, cum prædâ & famâ: nos quid? sumus qui fuimus, id est tardi, frigidi, & quæ nec ad te stilo committam. In animo isto dolet, qui video fundamēta status huius labi aut ruere: in promptu tamen remedijs, si consilia alia essent. Sed omitto: ego seriò mecum philosophor, nec meditatione solùm, sed stilo. Per vetera Sapientiae præcepta eo, & animum ijs ad virtutem & robur firmo. Reuerà etiam, cum altiùs mentis oculos sustuli, quid aut quantula hæc Belgica nostra est? cultissima terrarum fateor, quas sol videt: sed terra, sed regiuncula, & non dicam cum Vniuerso, sed cum Terrâ ipsâ comparata, portiuncula exigua & velut punctum. Quot tu mutationes, clades, cædes, in noto & ignoto orbe cotidie committi censes? Vulgaris ea mens non attendit: quæ in se non abit, nec scit Mundum hunc ciuitatem sibi esse. Mihi est, & amplector, & curo: ac si mala fata hanc partem premunt
aut

aut perdunt, multum soli superest quod colam, & ubi tolerem hoc quicquid reliquum est vitæ. Queri aut angere, stultum est: specto, exspecto, & Deum sequor. Is te mi amice, tuam & tuos feruet, & mutuum inter nos amorem. Louanij, postrid. Non. Decembres. ∞. MDCL.

EPIST. XLVIII.

Antuerpiam.

MARCO ANTONIO PEREZIO V. N.

ADMIRATIO simul & dolor me inuasert, cum de inopinato obitu soceri tui, & amici nostri, intellexi. Heu, quid homines sumus? quam fragilis materia, ut leui casu rumpenda? Profecto exempla ista cum e proximo incurrunt & nos feriunt, merito animum ad conditionem & cognitionem sui aduocent, & quam totum hoc viuere lubricum sit, breue, nihil. Annus iste vnus in domo tua funera duo habuit: quis scit an ante exitum non etiam habebit? Vouco, sed non spondeo: & omnibus euenire, quod illis, potest: cogitemus, & in ista armemur. Vnde? à constantia, id est à Deo, cuius supremæ voluntati nostram hanc subiungi par est, & æquis oculis animisque spectare, quicquid iussit. Imò & subire quicquid iussit: non aliter quam cælum, stellæ, aër, maria, & omnia illa magna opera parent conditori. Cleanthis illi versus, pro verâ & Christianâ sapientiâ sunt scripti:

Duc me parens, celsique dominator poli,

Quocumque labitur: nulla parendi est mora.

Adsum impiger: fac nolle, comitabor gemens.

Hoc faciendum cum alijs, tum tibi Vir nobilis, qui inter huius æquanimittatis & constantiæ exempla, in familiâ Patruj tui es ductus. Vis aliquid illustrius? ille vir mihi semper visus verum Philosophum agere, & vitâ, non sermonibus, exprimere cum atque referre. Obsecro te, in hoc tristi casu oculos mentis nunc ede flecte: & post Deum, robur ab illo etiam sume. Fateor cum incommodo familiæ ereptum vobis hoc fulcrum, & prudentia eius vario vsui domi forisque etiam esse poterat: quid tamen est? nonne supremus ille pater & rector etiam viuít, & curam tutelamque suorum gerit? facit & faciet: magis, si in illum spem & cogitationes tuas mittes. Iam vos ipsi eò aui & experientiæ venistis,

venistis, vt per vos sapere, regere, & per vestigia maiorum virtutem colere, rem non negligere, possitis. Itaque minore dolore hoc ferendum, quòd tunc ablatus ille director est, cùm operam eius neque ætas, neque prudentia vestra, nimis requirebat. Vnus est Baronius meus, cui immaturus perijssè videri potest: sed nec potest, quia scio te in locum eius vicemque venturum. Duo nomina, Fratris & Patris, simul sustinebis: atque vt facias, amanter te rogo. Etiam illud, vt tu atque vxor optima animum erigatis, & solatium non à ratione solùm, sed à liberis etiam vestris capiatis: quos Deus plures dedit. formate & dirigite in eius gloriam, & vestrum & familiæ gaudium atque honorem. Ita fit, & idem Deus illos vobis, vos illis longum seruet. Vale Vir Nobilis & Cl^{me}. Louanij, vi. Idus Decembr. ∞. 1611.

EPIST. XLIX.

Bononiam.

IOANNI BAPTISTAE BARONIO suo S. D.

INOPINATA multa homini, & sæpè tristitia: in te disce. Parens, heu, tuus vltimùm tibi visus abiit: & subito abiit, dolore & admiratione nobis relictâ. Et si istâ quidem vix mihi. scio enim Parcâ adsiduè super caput stare, & ictu aliquo percellere nec expectato. Sicut in aquâ pisces ludunt, in aère aues volitant, securæ insidiantium: at illos hamus adducit, istas rete inuoluit: sic fit nobis, & aliquem è magno grege adsiduè venatur & capit pallens hæc Diua. Solare te à communi lege, ad quam aptari nō Sapiencia solùm suadet, sed Necessitas cogit. Si æquanimus fers, simplex dolor est: si aliter, alter. Bononiæ te nunc esse, speramus: si es, fruire optimo illo veteris tui contubernij consortio, & dolorem alloquijs etiam illis mitiga aut merge. Rubenium ama & adhære: bono tibi erit, hoc mihi crede. Ceterùm amisso hoc fulcro, non diu peregrinari aut animo indulgere ego suadeam: veni, tua cogita & cura: sed & de Tuâ aliquâ cogita, si animus & amici ita suadebunt. Certè in Italiâ desiderare te nolim, etiam illâ insidiatrice aliquâ: per Germaniam redi, & hanc obiter lustra. Ista mihi nunc visa: sed sic vt te audiam, siquid melius inijsis: tu Rationem semper, & cum illâ tuos. Louanij, v. Idus Decembr. ∞. 1611.

IOANNI BUISSONIO *Consiliario & Syndico
Ordinum Hannonia.*

EPISTOLA tua subita & inopinata ad me venit, sed, Fidem testor, grata. An non à te esset, quem animi tacito iudicio & sensu iamdiu æstimavi, & addam amaui? Bona & certa de te fama hoc fecit: nec nisi opinio Virtutis tuæ affectum illum mouit, nunc augendum & asserendum à tam amicâ tuâ scriptione. Quàm volupe mihi est accessisse: vel eo fine, vt inclusum illum meum aperirem, sine occasione non reueladum. Vt pyrites gemma ignem in se habet, sed non nisi attritu exserit: sic in me, habui amorem, sed tacitum, litteris tuis nunc eductum. Non fallam te vir optime: qualem vel epistola hæc mihi adfirmat: non, inquam, fallam, & te, Virtutis ac Doctrinæ sacerdotem, cum vtraque illâ ferio & fortiter amabo. O vtinam in miserâ patriâ multi hoc ingenio, & habitu sint!

— *quis pudor, & Iustitiæ soror
Incorrupta Fides!*

Quàm plerique vela gratiæ, commodo, deterioribus affectibus pandant, scio te mecum videre, & dolere. Belgicum ingenium è Belgicâ migrat, & Felicitas etiam illa vetus viâ migrat, fortasse non nisi votis reuocanda. Sed à re, id est à te non abeo: animo animum tuum amplector, & *Dexterâ* hac fidem *Sancitæ amicitie* consigno: nouam, sed vt ille ait, animis deinceps non annis æstimandam. Ita esto. & Fides iterum aduocata *Epistolam* claudat, quæ exepit. Louanij, XVII. Kal. Ianuar. ∞. IOCII.

HENRICO VAN ETTEN, *Præsidi Ærarj Brabantici.*

QUEM hîc vides, virum eruditum & in Theologiâ acrem, causam scriptioni meæ præbuit: voluitq; cõmendari in re, quam ipse dicet. Rogo audias, & si æqua aut publicè profutura (neque enim aliter) exponet; rogo & audientiam & fauentiam ei accommodes. De inualetudine tuâ nuper aliquid, sed obscure & per

& per nebulam audiui : credo podagram fuisse , atque vtinam fuisse. Reliqua in te integra : ætas, corpus, animus (quod caput est :) & hic præcipuè nobis colendus. Quò magis adolescimus, id est maturescimus, videmus nihil in homine, præter interiorem illam partem, colendum : & reliqua adiuncta, vt verè & fortiter dicam, nugas & fumos esse. Quid si nec esse? solum illud æternum EST ; & nos cùm ei accedemus, & conabimur Virtute assimilari. Illa æterna, & in parte nostri æternâ : quò eo? Exorbitò? vix apud te, quem scio & meditationum, & lectionum, & sermonum talium esse. Quid tuus Filius nunc in Galliâ? ibi hæret, an reuocas? Ipse quoque maturescit, & admoueri reip. (vtinam tranquilliori!) vtiliter potest. Fauco illi, te Nobilis & Cl^{me} Domine æstimo atque amo: deberi mihi alterum vtroque nomine puto. Louanij, xvii. Kal. Ianuar. ∞. IOCII.

EPIST. LII.

Augustam.

MARCO VELSERO S. D.

HISTORIAM BOÏCAM tuam vidi, etsi non te mitente. Hoc culpo leuiter, illam toto pectore & ore laudo. O dignum prisca gloriâ gentis scriptum! dignum optimis his Principibus! dignum & te mi Velsere. Exemplum præiustit hodie ad id genus scripti : quod iacuisse à mille amplius annis boni arbitri fateri debemus, vtinam per te excitandum! Sed præiustit, iudicio, industriâ, stilo. Vna Præfatio tua de opere præiudicat, plena prudentiæ, & decoræ gravitatis. Hæc ego amicus, sed non vt amicus: boni peritiq; iudices omnes dicent, quos in hoc æuo optem tibi magis, quàm præstem. Quòd autem meum breuiter nomen inserueris, pluris æstimo, quàm si ab alio, & alibi diffusam laudem. Gratiâ tamen an dicam, ambigo. si enim à iudicio tuo est, debuisti: si ab affectu, ego debeo. Vt cumque, amo te amantem, etiam nec amantem. ea est tua Virtus. Louanij, postrid. Natalis Christiani, ∞. IOCII.

EPIST. LIII.

Coloniæ.

GODEFRIDO HERTELIO S. D.

LITTERAE TUX tardè mihi delatæ, etsi viæ haud magno interuallo. Vide autem an non promptè respondeam, iam nunc vt eas legi. Amo enim vos tales, mi Herteli, bonâ & erectâ indole, ad bona & recta euntes. Itaque & coram vel iuuare voce & lectionibus solco, vel animo fauere certè, & monitione etiam, vbi locus, excitare. Idem litteris, sed breuiter facio. Vidisti viam, quâ ad Honorem & Virtutē eatur? insiste obsecro, nec praua aut plebeia iudicia diuertant: quæ nimis hodie ad vanitatem aut leuitatem inclinant. Eadem ad superbiam & confidentiam: cui nullum fulcrum aut fulmentum, nisi ab insitiâ est, & destinato optimorum contemptu. Quàm te iuuabit grandiore, & xui iudiciijque maturiore, solidiora hæc amplexum esse? fruges, non flores captasse tantum? Facere te hortor toto animo, & eodem amo: quod etiam hoc *Testimonio*, vt cupiebas, expressi. Louanij, v. Idus Ianuar. ∞. MDCLII.

QVI HAEC LEGETIS,

SALVTEM ET OFFICIA MEA DEFERO.

INTER exteros, qui in hac studiorum sede egerunt, GODEFRIDVS HERTELIVS, gente Germanus, fuit, commendatus mihi ab Illi Viro Matthæo Wackhero, sed qui ipse se vitâ & moribus magis deinde commendauit. Vixit enim hic circiter triennium modeste quod ad vitam, industriè quod ad studia: & vtrobique vel bonam vel excitatam indolem ingeniumque ostendit. Iuris studia scopum habuit, adiumenta & directionem etiam litteras: atq; his causis honorem inter consortes studiorum affectus, Collegio studiosorum juris præsuit Decani titulo ornatus. Ab his inijs ad altiora progressurum, spes & votum nostrum est: fauor modo bonorum adiuuet. quem impetratū ei cupimus, atq; vtinam aliquid faciat gratia nostra! Rogamus, & saluere vos iubemus, qui hac legistis. Louanij, vi. Idus Ianuar. anni ∞. MDCLII.

Iustus Lipsius, Professor, &
Historiographus Regius.

EPIST.

EPIST. LIIII.

*Mediolanum.*ERYCIO PVTEANO *suo.*

VIDI, vidi Septalij nostri ad Aristotelem, ô gratum mihi & æstimatum opus! Fateor amasse virum, in te & me amicum: sed nunc pernouisse, qualem prædicabas. Fruere illo, me invidente: cui hoc mali fati est, non habere consortem studiorum aut sensuum meorum, & solitarium pergere hanc viam. *Stoïca Philosophia* valdè nunc exercet, quam Senecæ illustrando præmitto, & scorsim edo. Alio ævo bona hæc fore, opinor aut scio: quid isto, quod in dies magis (apud nos quidem) ab omni Honesto abit, nescio: & periclitor tamen, & Bona docebo atque ingeram, etsi non alio quàm conscientiæ huius fructu. Ill^{um} Borromæum sic in me esse, intra me gaudeo, & laudibus de illo tuis applaudo. Sed tu Romam? excursus opinor causâ, nec mansionem te cogitare. I & redi, vbiubi semper meus. Lo-
uanij, XVI. Kal. Febr. ∞. DCIII. S. D. Audeantius tuus.

EPIST. LV.

Antuerpiam.

GEORGIO VVENO S. D.

PRÆTER opinionem Antuerpiæ manes, non præter animum meum, qui hoc probat, & consilio statuisse parentem tuum censet. Ætas tua iam maturescit, ingenium adest; forma iudicium apud illum, quo meliorē directorem nec votis optes. Cùm feceris, & in viâ rectâ fueris studij præsertim, cui manciparis, Legalis: age, ad nos redi, & reliquum illum cursum decurre, cum tuo & reip. bono. Nam & hanc in oculis tibi esse cupio, & ciuem te adstrictæ Belgicæ cogitare. Habes & in contubernio patris cognatum Bylium, bonum adiutorem, & honestis omnibus artibus iamdiu tinctum. Ab hoc quoque hauri & discere: atque ut possis, Modestiam retine (habere enim mihi adhuc visus) nec opinio vlla te inflet, pestis omnis profectus. Sicut in Iberiâ equas à vento Fauonio concipere aiunt, sed euanido fœtu: sic in istâ re fit, & qui ab Opinione blandiente grauidi, serium nihil

F 3

pariunt;

pariunt, tumidi tantum vtres. Audi me, & ama. Louanij, xvi. Kal. Febr. ∞. MDCLII.

Ciceronem te non deponere, hortor, & stilum interdum ad eum conformare. Parenti scribere nunc prohibeor: breui faciam. Saluta hunc, & illam: atque vnà Robianum & Schottium, ex animo.

EPIST. LVI.

Mediolanum.

LVDOVICO SEPTALIO V. C. S. D.

O NVNC denique Septalium mihi norum! ô virum in animo isto magnum, & probum! ô mihi etiam amicum! Nam hæc omnia Commentarij tui me docuerunt, nunc denique inspecti, etsi nondum te mittente. Sed vidi, & mediusfidius digna omnia summo illo viro, cui lucem præfers, & Philosophiæ simul ac Medicinæ; cuius vtriusque multa pars & arcana in libris ijs tractatur, & Septalio interprete egebat: id est vtriusque illius perito, & Philologiæ simul: quam decorè & vtiliter his quoque iuisti intermixtum. Itaque eruditum & elegans simul opus est; & quisquis in hoc Senatu nostro talis est, iudicio meo *confiscet consentietque*. Maeste amice! & veteris Italiæ gloriam asserere, & ostendere magnas illas animas viuere in posteris etiam & spirare. Utinam pluribus! & longa atque immota ista Pax vestra exciter ingenia ad optimas artes, non ad lasciuiam aut vanitatem, quò eunt. Atquin & mihi partem laborum tuorum inscripsisti, & ea ipsa quæ *de Labore* erant. Gratum censes? ita, vt nullum munus suprà possit: & quid super immortalitatem sit? quam etsi à meis quoque scriptis sperare leuiter possim, fidentius iam cum tua accedunt: tua, quæ *ære perenniora* censeo: & talis meus in te amor erit, debitus nunc, antea delatus, aut tuo certè relatus. Salue, & ita ego sim saluus. Louanij, xvi. Kal. Febr. ∞. MDCLII.

EPIST.

EPIST. LVII.

Lugd. Bat.

CORNELIO VAN-DALIO S. D.

NVMQVAM ego te ini Van-dali, nisi in litteris istis vidi, & iam autumo nouisse. Quid? exteriorem te? minimè, sed ipsum te, id est interiorem animi faciem, ita me Deus, pulchram & Honesti illius amantem. Itaque iam nunc amo, & fauco: horrorem etiam in optimâ viâ, quam inisti, recto & indefesso pede pergere, tuo bono, aliorum exemplo. Quidni exemplo? supra vulgum aliquid vos tales estis, quos Deus ut lumen præluceat voluit, & ingenij dotes has frui dedit: ne aliò vertite, nec insitas scintillas & *inuisumata* per neglectû suffocate. Scribis cogitare te aliquid in Agellium, & subsidium postulas. Illud laudo, & scriptorem ego habeo purissimæ latinæ, & planè ad comœdiam antiquam: istud non abnuo, sed nunc differo, à valetudine & orio negatum. Illa tristis, hoc nullum est: perge tamen, nec differ. & quid Tiresiam etiam quæris, cum Phœbum illic habeas? Adi, & consule: scio posse, imò & velle. Louanij, xv. Kal. Febr. ∞. LCCIII.

EPIST. LVIII.

ILL^{mo} ET EXCELL^{mo} Principi CAROLO
Duci Croyo & Arschotano.

NON epistolam à te, sed thesaurum accepisse mihi visus sum (ex animo scribo) in tam effusâ declaratione benivolentiæ tuæ, ô quo meo merito paratâ! Itaque ego illam inter reposita & cimelia habeo, atq; habebô, quamdiu in humanis rebus ero. Gratitude referre me quî sperem, aut quî possim? nisi solo animo, quem tu magne Princeps non vinct; & si ille quod vult possit, beneficia tua profectò æquet. Nunc voluntatē in solutum deferò, atq; etiam ipsam rem, quanta ea ab ingenio aut stilo meo (hæ meæ opēs & dotes sunt) manare vnquam potest. De republicâ vix aliud scribere licet, quia nihil in eâ aliud. Languemus, medicina quæ solet: hostiles minæ & apparatus. In Embdanâ regione omnia illis prospera, & confectum pænè iam bellum.

bellum. Propugnacula & arces, quæ Comes struxerat siue munierat, spatio trium septimanarum omnia expugnata: & ipse regione suâ exactus, ad Imperatorem iuisse dicitur, suppetias rogatum. In Hiberniâ pergunt Angli reliqua sibi subijcere, coloniâ etiam nouâ deductâ, & opido ad mare Hispanicum exstructo. In Galliâ turbæ, ut aiunt, & coniurationes: atque illa nobilitas, nescio quo fato, videtur nunc ad res nouas & fidem exuendam prona. An is quoque inter fructus bellorum ciuiliū est? Nostri seditiosi in suos aliquot sæuierunt, & atroci morte affecerunt, conuictos (ut aiunt) consiliorum cum Principe & occultæ pactiōis. Leodici Princeps Elector expectabatur, aut iam venit. Alia in publicis non habeo: in meis totus in Philosophiâ sum, sed in Stoicâ: & Senecam, vilem vitæ magistrum, conor illustrare. Valetudo moram sæpè facit, per hiemem ferè mihi tristior: quæ ut benigna te, Ill^{me} & Excell^{me} Princeps, longum respiciat, intimum est meum votum. Louanij, xv. Kal. Febr. ∞. I. C. C. I. I.

E P I S T. L I X.

*Antuerpiam.*IOANNI WOUERIO *suo.*

DEVS benè. gratias grates agimus, pro salutē præter opinionem quorundam reddidit, etsi ex omnium voto. Meo, hoc scis. O quàm timuimus! nec fatum mihi ab annis aut lustris tristius fuisset. Anno enim toto pectore te, quia Honeſta amas, ad quæ à Naturâ videris mihi factus. Sequere illum in te Deum; nihil abripiat, quacumque specie aut illicio: fuge iudicia & vota communia, aut abducent ab illo & illis. Videre te & amplecti validè & calidè cupiebam: sed tempero, atque etiam tibi impetro quiescere, nec ante veris teporem te commouere. Ego ad Senecam aliquid molior, & *Manuductionis in Stoicam Philosophiam libros tres* præmitto. Item, *Physica Stoica libros tres*. Opus istis, aut totus Seneca seponendus. Quid sperem tamen his hominibus hæc me probaturum? paucis, & perpaucis: & hoc ideo, quia bona & non in pompam erunt. Vanitatis nunc regnum. Tu vale magis magisque mi Woueri: & scribe ad responsum; sed cum exceptione, Si vacabit. Scis quàm sæpè, imò semper, distinear: & iuro

iuro tibi confici me; quòd confectus non sum, mirari. Louanij,
XIIII. Kal. Febr. ∞. IDCIII.

EPIST. LX.

Bruxellam.

IOANNI SEVRIO S. D.

DIGNITATE te auctum ab optimo Principe, animo meo gratum est: & gratius, te nuntiante. Significas enim hoc ipso, censere te lætitiā conceptum ex eo à me iri: nec falleris, concepisti. Mereri enim te arbitror, & posse ac velle patriæ prodesse, & Principibus operam nauare. Certè mi Seuri dona à Naturâ, id est à Deo, habes: sed & probitatem obseruasti: illa exsere, & hanc adhibe; tuo & publico bono fiet. Legatum non volentem te dimittere, hoc opinor: atque vtiā ille optimus optimum aliquem, & tui similem, in locum possit surrogare. Multa requiruntur: & quædam etiam, quæ fortasse non opus requiri. sed præsens hic status rerū suspensiones mouet, & circumspicere omnia cautè iubet. Quando autem abis? quodcumque, à me nō abi, & animo semper, interdum & litteris iungamur. Sed & cum consorte aliquâ tuâ nunc iungere: quò ætas vocat, & certa nunc dignitas inuitat. Ipse bonus ciuis esto, & relinque qui post te sient. Ego philosophabar in his turbis nostris, aut & periculis: nam paullatim ad limitem hæc loca adinoueri, non ignoras. Loca etiam per se parum tuta aut firma: quid refert, si Deus tutela nostra est? Ego ita confido, & vt tua sit, corde cum precor. Louanij, XIIII. Kal. Febr. ∞. IDCIII.

EPIST. LXI.

Leodicum.

IACOBO CARONDELETO (*quod Deus approbet*)
recens Præposito Leodicensi designato.

MAGNUM equidem gaudium sensi, in dignitate quâ recēter es auctus. Merebaris eam, aut aliam vel grandiore, virtutis & prudentiæ tuæ prærogatiuâ: & tacito murmure fortuna à nobis accusabatur, quæ in comitijs suis alios anteferebat. Nam voto etiam nostro, vt hoc nunc edam, in patrio nostro solo exspectabaris: & aliquid allaborasse me scio, sed illâ cæcâ non
G fauente.

faunte. Iam oculos aperuit, honorem tibi non dedit, sed soluit: quo ut diu frui utriusque Reipublicæ, sacræ & profanæ, bono possis, Reu^{de} & Generose Domine, intimum meum est votum. Deus audiat, & coram gratulari me aliquando, periculorum securum, sinat. Louanij, XI. Kal. Febr. ∞. MDCLII.

EPIST. LXII.

Louanij.

IO. VERGERIO AVRANO S. D.

ADES, ades cum isto tuo impetu (ita scribis) & palam mihiingere non honesti studium tuum solum, sed profectum. Bonâ fide, epistola tua istum præfert, & simul ingenij tui acumen, & à calo aliquem ignem: quem fateor me amare in iuuentute, & ut signum, imò ut spōsorem optimi animi habere. Hunc excolamus, mi Vergeri. primùm illis sapientiæ diuinæ studijs; deinde & ornamentis siue adiuuentis, quæ huic omnis antiquitas adinoui. Subit me delectatio Græcos illos veteres Latinosque legentem, pietatis nostræ assertores aut propagatores: subit interdum (dicendum est) & miseratio, cum video non pari splendore aut dignitate tractari. Age, tu & quibus Deus benigniùs fauit, excitamini, & iungite per imbecillitatem aut imperitiâ disuncta. Sed ad tuam rem, & scriptionem. Consulis me de epistolâ ad Antistitem vestrum. Dicam? bona & arguta est, & tale ingenium tuum ubique præfert: hoc industria tua addet, ut colorem & phrasim præcæ eloquentiæ magis dicas. Natura ubi talis, non ambige vel leui operâ de successu. modicâ, inquam, conformatione opus, & velut Mercurio, qui digitum in viam intendat. Alij laborent, & imitentur: tu cum Pindaro scito, * τὸ δὲ φύσιν ἀπὸ τοῦ ἀνθρώπου. Ad solum Tullium te vocant: vocent, nec me volente audies; quia Genius aliò trahit. Sicut in humano genere vultus multiformes, & alius aliter pulcher aut decorus est: sic in eloquentiâ scito, nec omni industriâ pariabunt. Lenis aut mitis aliquorum oratio erit, & ut stagnum; aliorum, flumen referet; quorundam, torrētem. Vis vno verbo? ignem, aërem, aquam, terram in stilo reperies: ut aliquid horum regimen in corpore & mixtione istâ tenet. Hoc fateor, & suadeo, connitendum esse ad optima, & arte ac ductu quodam adhibito:

* Natura
quodq; opti-
mum est.

bito: sed non vt vis Naturę adferatur, & ne fiat, vt veteri prouerbio moneamur, *inuicē* aliquid *Minerud*. Vbi sola imitatio est, & huic adhæremus: quid sit? persona scænica. & vt quidam magnorum virorum habitum, atque incessum, aut gestus imitantur, cetera & interna dispares; sic dictiunculas aut clausulas aliquas Tullij, si fortè, referimus, ad vium & Venerem eius non adspiramus. Itaque audi magis hæc, etsi magnorum virorum monita, quàm ausculta: ætas tibi dicet, vera me dixisse. Tu interea age, quod cœpisti, & cælesti isto liquore perfusus, ad aquas etiam Heliconias accede; sed ignem tamen tuum retine, à cælo, à cælo infusum. Scintillam etiam eius in affectum mei exsere: ego fouebo & augebo in Amicitia legitimæ flammam. In Musæo nostro, VII. Idus Martias. ∞. IOCIII.

EPIST. LXIII.

ILL^{mo} ET EXCELL^{mo} Principi CAROLO
Duci Croyo & Arschorano.

HEVRIA tua (quæ antiquorum Heuerléa est) venit ad Te ILLUSTRISIME PRINCEPS, politâ manu desculpta: & qualem aut opere, aut mente, iam deformasti. O visendam HEVRIAM, & dignam exteris in imagine & adumbratione etiam ostendi! Factum est tuis auspicijs: prodit & se promit: sed Tuis primùm oculis, vti par est, se exhibet, versu aliquo nostro obiter insignita. Neque istæ curæ Te nunc dedecent: qui ante octodecim annos, bello & militiâ, REGI PRINCIPIBVSQVE fortem felicemque operam nauasti: & fidem in illos, caritatem in patriam, pietatem in Deum affatim ostendisti. Honestum igitur otium si exerces, quid mirum est? Neque tamen, nostro voto, diu exerceas: iterumque Patriæ subueni, heu, laboranti & imploranti. Deus illam respiciat, PRINCIPIBVS TIBIQUE inspiret bona consilia, simul & facta. Louanij, IX. Kal. Mart. ∞. IOCIII.

IN HEVRIAM

Ill^{mi} Principis Prætorium

CARMEN.

MOE STA Ô BELGICA nostra tolle vultus,
 Tolle, & lumine lætiore lustra
 Magni PRINCIPIS hoc opus, sacratum
 MYSIS & VENERI, & venustiorum
 Quidquid est hominum. superba gaude
 His adantia Palatij, & Hortis,
 Hisce Fontibus, hisce & Arboretis,
 Xystis, Limitibusque, & Ambulacris.
 O dispar facies vetustiori!
 Ante scabra loca hæc, & absque cultu
 Horrida, ardua, iniqua, sabulosa:
 Nunc quam splendida, quam polita rident!
 Ades GRAECA tu vetus, vetusque
 Ades ROMA: mea ecce BELGICA aude
 Se conferre. & an ausit anteferre?

EPIST. LXIIII.

Panormum Siciliae.

GOMEZIO DE AMESCUA 1^{to}. S. D.

EGO ad tales litteras, & à tali, si leam? differam, aut contem-
 nam? O vel cogitationem in me iniuriam! & vide quàm
 hoc factum. Binas tuas, id est, priores ante annum & sesqui da-
 tas, alteras ante menses octo, nunc denique accepi, nunc, horulâ
 antequam ista ipsa scribo. Rem dico. in mensâ eram, tuæ dantur,
 lego, allubesco, manum à cibo ad calamum transfero: est hoc
 cessare, aut adspernari? Talem dignitatem non debeo, tale inge-
 nium non possum: quod vel vtravis epistola satis mihi osten-
 dat. Sed in priore affectum tuum promissis, & laudes meas tan-
 gis: illum toto pectoris ostio admitto, has semiclauso, & ut a-
 micæ proculos illos solent. Velim agnoscere, conscientia mea
 rejicit.

reijcit, nec nisi conatu talem adfirmat. At tu non quæ edidi solum amas, sed in futura etiam immines, & aues quæ peperit, & quæ parturio, scire. De illis, *Epistola* meæ vltimæ dicent, quarum *Centurias quinque* pronuper dedi: in ijs vnam, quæ de *Vitâ meâ* est, & *Scriptis*. Si tanti est, vide. Postremum hoc meum opus; mentior: successit opella, *De Bibliothecis*, & *Dispositio in Italiam* quendam, qui proteruè incurrerat, comiter aut & comicè à me reiectus. Non sum pugnax, ipsa Pacis proles: sed cadere debebam, nisi leui manu perulcum hunc arietem reiecissem. Deedendis autem, nunc cum maximè in manibus habebam *L. Annæum Senecam* vestrum: quidni vestrum? origine, ingenio, eloquio Hispanum aut Hispaniensem, & certè æternum tractus illius decus. Hunc auidè & iucundè illustrabam, breui *Commentario*: sed & seorsim *Philosophiam Stoicam*, quâ tenebrosâ, frustra facem alluxerim illi. Iuabat, inquam, hoc opus, quia sapientiam animo, non scientiam solum, infundebat: & mores cum ingenio & linguâ pariter formabat. Si viuo tres quattuor menses & valeo, ibit in lucem. *Monita & Exempla Politica* affecta etiam habebam: de *Institutione Iuuentutis* libellos tres: *Admiranda Judæica, Egyptiaca, Iberica, Gallica*: tum *Historiarum compendium*, si Deus dabit. Nam nos quidem

Tollimus ingentes animos, & maxima paruo

Tempore molimur:

sed ille stat vitæ laborumque arbiter, & producit, aut incîdit. Ecce ad priorem epistolam habes: estne aliud? etiam, caput scriptoris, sic seriò amantem seriò me redamare. Louanij, XVI. Kal. April. ∞. MDCLII.

EPIST. LXV.

Madritum.

BART. LEONARDO ARGENSOLAE. S. P. D.

CERTE frater Lupercij es, & quidem germanus. Quàm vel in amore mei conspiras? nam de laudibus, omitto: quas dictare iste potuit, debet pudor meus adspernari. Sed amorem talibus ingenijs non ego reddam? facio, & tam ex fide, quàm Virtutem & Doctrinam amo: cuius vtriusque vos veros alumnos in animo laudo & agnosco. O Hispania vestra stirpes has

* *præter
multorum
sensum.*

plures proferat! de quâ tu verissimè, sentire eam longæ Pacis ma-
la, Luxum, Cupidinem, & quæ sunt aliæ virilium animorum
pestes. Dicam tibi liberè meum sensum? sed * *ὦδὲ δόξαν ἀλλοτρίαν,*
scio. Nouus orbis victus vos vicit, & insitum antiquitus robur
libauit, aut fregit. Numquam alius fructus mollium diuitia-
rum fuit: vide omne æuum, & dices. Nos ipsi Belgæ quid nisi
pœnas iamdiu luimus auiti luxus? & lucemus: ita astra etiam mi-
nantur. Et opes quidem abiucere à nobis, vitia manent: fastus, la-
sciuiæ, & extremum malorum Impietas, quæ Belgas à Belgis di-
uellit. Nam nos, meo hoc tractu, in religione quidem antiqua-
mus: vtinam cetera sic puri! Ac de studijs optimarum artium,
ante annos aut lustra aliquid fuit: nunc scito, * *πάντα ταῦτα ἐν ῥέ-
λωσι καὶ παιδιᾷ ἔσθ'.* Possunt aliter per continua & infausta hæc
bella? quæ atterunt, non finiunt: nec licet optantibus vel semel
perire. Benignior Deus aspiciat,

* *hæc om-
nia in loco
aut ludi-
brio esse.*

— *qui solus opem, qui summa medendi*

Iura tenet:

& idem me nunc ægrum sospitet, te valentem mi Argensola ser-
uet. Louanij, xv. Kal. April. ∞. I D C H I I.

E P I S T. L X V I.

Veronam.

ANDREAE CHIOCCO V. C. & Doctori Medico S. M. D.

AM O te de hac viâ & primâ tuâ scriptione, amo mi Chioc-
ce. Quid ita? quia optimum & interiorem tuum animum
mihi ostendit; non mei & doctrinæ tantum, sed, quod caput,
Virtutis & Sapientiæ amantem. O bona & recta tua in hanc
rem iudicia! ô meritas inclamationes in vanos istos litteriones!

* *cuiusmo-
di plures
Nutrit te-
ra hæc ni-
gra impro-
fiores &
agrytius.
* *ὄντως.**

* *οἷά τε πολλοῦς*

Βόσκει γὰρ μέλανα πολυαπείρας ἀνθρώπους.

Ego, bono Deo duce (hac parte * *ἐδάμασεν*) ab adolescentiâ spreui
falsam hanc lucem: ad solida iui & scriptis meis miscui, quate-
nus occasio aut argumentum fuit. Parabam magis facere, & to-
tus in *Stoicâ Philosophiâ* illustrandâ, & ab inferis ad eò reuocandâ,
eram, ad Senecæ mei lucem: sed Deus intercessit, & signum (ni-
si fallor) discessus clarum mihi misit. Sum quinque iam septi-
manas

manas non in solito illo & veteri languore, sed in pectoris morbo: qui atterit, tabefacit, & vitæ hanc lampada, itemque laborum, alijs tradere impellit.

Linquenda tellus, & domus, & placens

Musa:

neque inuitus faciam, nullâ in parte magis Philosophus, quàm in meditatione hac mortis. Ede illa ipsa, quæ iam affecta, inquires. Ita & alij amici increpant. sed mihi sedet Virgilij consilium, felicius patrandum, nihil edi, nisi à viuo me, & manu meâ missum, ac perfectum. Ignis edat, quidquid ego non edam. Itaque multa sub terram feram; eruenda alijs aut tenebris obruenda, non refert: non vixi infructuosus aut inglorius: & Sapientia ac Virtus viuet,

Ipse suis pollens opibus, nihil indiga nostri.

Ecce de inco sensu. addam de amore in te nouello, sed serio & acri: paucos me è scriptis meliores simul & doctiores agnouisse. Itaque amo, amo. Fas mihi sit, & vitam & valetudinem sub tali Imperatore (agnoscis Medicinæ veteris vocem) agere ac moderari: libens velim, & vel in manibus ac sinu tuo mori. Plura non possum, seriò æger. Memoriam mei tibi commendo, & fiduciam amoris quem tuo præsto. Louanij, xvi. Kal. Maijas, 1638.

EPIST. LXVII.

Lugd. Bat.

DOMINICO BAVDIO S. D.

SVAVE simul & triste mihi fuit tuas legere. Suaue, ab affectu in me veteri & fido, & quem sine fidei hercules iniuriâ non mutes. Nam & ego firmiter & fortiter te amo. Triste autem, ob casus aut fraudes quibus iactaris: neque nunc in portu aliquo anchoram iecisti. O nostri Baraui, quid agitis? reuelate oculos, & noscite & admittite, aliter aduocandum. Indignor, & ^{ἄρδεις} ^{ardet mihi pectus.} cum Homero, cum ista ingenia & artes neglegi aut contemni video, quæ omnibus infulis erant exornanda. Quò minus? ad veterem squallorem & tenebras: atque vtinam augur fallam. Eò minus triste mihi, abire & abiungi: quod morbus

nunc

* vorator. nunc cū maximè minabatur. Morbus nescio quis * ἀνιψαλος,

* Qui sine
radice cāmi-
nuit vires
animi mī,

* — ὅς ἐ μέλιστα

Τηλεδόνι συγάρη μέλιστα ἐξείλετο θυμόν.

Sed Deus ille, auctor mei, videbit: & alteram sententiam, vtram-
cumque me volente, feret. Adolescentem probi oris & in-
genij, tinctum optimis artibus, Com. Van-dalium, libens vidi,
& amare non solum fauere cœpi. Crescant istæ stirpes feliciū
arborum, vtinam feliciore tuo! Vale mi Baudi. Louanij, po-
strid. Non. Maijas, ∞. 16CIII.

EPIST. LXVIII.

Ipras.

IIRMIÆ PIERSSENAE 1^{to} S. D.

LITTERAE tuæ mihi pergratæ, & magis Carmina, quæ inge-
nij tui & affectus in me (iste etiam elucet) monumentum
publicasti. Sed & priuato versu me compellasti: ita me Musæ, ad
illarum Genium factæ, & quod in ipso morbo (is me nunc men-
ses duos habet) leuamen fuit legisse. Ah mi Pierssenæ, quàm a-
lieno à Musis tuo Musæ hæc pangis! quàm pauci, non dicam
amant, æstimant, sed vel simulant æstimare! Trahunt pedibus
hæc talia, & vel sumias pluris, quàm litteratos censent. Senecæ
dictum vanitatis arguitur: *Numquam ita in virtutes cōiuratum iri,*
vt non Philosophiæ nomen sacrum & venerabile sit: ridetur. Ego
iam pridem hæc scio, & ideo tolero, vt solemus vetera & familia-
ria iam mala. Quid Deus Europæ nostræ destinet, nescio: vti-
nam ne Honestum à nobis auferat, & litteras doctores eius aut
præcones. Quæ fama sine ijs est? & sequitur, *Contemptu famæ,*
contemni virtutes. Sed de tuo frustra querar: fatali hæc lege eunt:
te magis hortor, animo stare, & rectum clauum tenere, vel Ne-
ptuno insaniente. Constanter ego facio, nec iudicia hæc aliquid
in me mutant, nisi fortasse scribendi edendiq; libidinem: quor-
sum enim ista imperitis, aut ingratis? Neque tu solus oleum & o-
peram perdidisti in nuncupatione: alij pariter, nisi siqui sunt inge-
nio & ore ferreo ad exprimendum. Age, exurge, ad meliorem
tui partem vertere: atque illa te à terrenis & vilibus ad cælum
ducat. Vale mi Pierssenæ. Louanij, XI. Kal. Iunias, ∞. 16CIII.
cū tuas vidi.

EPIST.

EPIST. LXIX.

HENRICO VWENO S. D.

DOLVI discessisse nuper, cum ipse aduenisses. Scis (sine blanditiâ) quàm amore & sermone tuo delector: in quo isto, & suaue semper aliquid & prudens, & probum etiam ac Virtuti amicum. Mi Vvene, hoc caput est. hanc nisi amamus & colimus, malo fato venimus in hanc vitam, cum pœnitentiâ aut pœnâ finiendam. Sed heus, an non ego breui finiam? rescribo enim omnia, quæ ad Robianum nostrum optatiora vobis scripseram: vt Luna hic morbus est, imò plus aliquid quàm illa, nec in septimanas, sed in dies atque horas mutat. Hoc biduum pessimè habui, nec voto, sed opinione tamen, propono mihi meum finem. Melancholia est, inquires. Sapientia est, & nihil melius quàm crebrâ tali meditatione ducere animum ad cōtemptiōem animæ. Multi necessitate aut impetu ad eam alacres venerunt. Nihil est, non nisi ex iudicio & ratione certa illa tranquillitas oritur, ad quam me compono. A libris abstineo, vix has litterulas tales scribo. Vale mi amice. Louanij, postrid. Kal. Iunias, ∞. 1603.

EPIST. LXX.

FRANCISCO SWEERTIO S. D.

VNA cum tuis iniunctas è Germaniâ accepi, à nouo aliquo amatore: cui nunc tamē non respondeo, & vt puellæ, pro-canti paullum me subduco. Valetudo nunc non est his talibus, varia, & anceps, an & præceptis etiam dicam? Interdum cadere mihi, & ire palam ad finem videor: interdum exoriri, & melius habere. Leuiter fero. *quis enim queri potest, se in eâ conditione esse, in quâ nemo non est?* Homo natus sum; & ex quo natus sum, ducor ad mortem. Triste hoc cogitare, inquires. Non mihi. & quid si non cogitem? eò minùs ducar? Sicut qui in naui sunt, dormientes ac vigilantes vehuntur, cum sensu, sine sensu: sic nos eò pro-uehimur, & aliquando abripimur aut mergimur, velut tempestate. Philosophiæ satis est. ad Gruterum si scribis, de valetudine insperge, & amicam salutem adde. Viringo quæ dicta voluisti,

H

lulisti, factum. Tu me ama; & siquid scitu dignum habebis, fac
consortem. Louanij, 1111. Nonas Iunias. ∞. 10CIII.

EPIST. LXXI.

Leodicum.

CAROLO BILLEO, Equiti, & Ser^{mo} Electori
à Consilijs interioribus.

DOLOREM, qui animum tuum percutit, mœstus ipse animi-
audiui: & quamquam amici non desint, quos plures vir-
tus tua & fortuna habet, qui verbis aut litteris solentur; tamen &
ego venire in partem volui, & officium meum vel superuacuum
offerre. Atque vtinam superuacuum! vtinam ad animum iam
compositum verba faciam! quod etsi à prudentiâ tuâ sperem,
vix ab affectu, quo illam consortem vitæ & thori meritò es pro-
secutus. Optima fuit, suauissima fuit, fœcunda mater, sedula li-
berorum & domus tuæ curator & custos. Quidni in amissâ do-
leas, & talem; numquam habiturus, desideres? Permittit et-
iam Sapientia aliquam hanc confusionem & dolorem: sed ali-
quam. frænât enim mox, & ad rationem reducit, & in eâ tran-
quillum pacatumq; sistit. Quid enim diu aut immodicè lugea-
mus, quod non posse, sed debere euenire, præsciuius? Nâ mor-
talis erat: neque amnis aut perennis aliquis fons, sed torrens, qui
impetu currit, & decurrit. Verissima imago est: vide hanc vitam.
Collectu humorum aliquo nascimur, raptim cum quo labimur:
& alij breuius, longiusq; progressi, finimus. Atqui triste illud
finire. Triste, si verè tale esset: nunc mutamur magis, quàm desi-
nimus, imò nos Christiani, diuinâ clementiâ, in meliorè sortem
imus. Quis æs aut metallum perire dixerit, cùm liquefcit & sta-
tua ex eo funditur? Non perit, sed honestatur: & idem in nobis,
qui ex informibus & infirmis in splendidam illam imaginem
Dei transimus. Itaque abeat dolor: imò læticia (det mihi veniam
affectus tuus) succedat, ipso affectu còducente. Nempe amasti
illam, & amas: quidni optimè igitur illi esse velis, inter beatas æ-
ternasq; mentes? Nec tamen tota à te abijs: respice liberos, quos
numero tibi, & ex utroque sexu, reliquit. Habes grandiores, è
quibus fulcra & nepotès iam speres: habes minores, è quibus so-
latia & gaudia, cottidiano occurfu & sermone, captes. Hos pecto-
ri in-

ri inferre, ori interdum admove: & in istis vivere illā, & te affari, non falsò crede. Sed à domo etiam tuā, ad rempublicam, cui natus & destinatus es, redi. Illa altera tua vxor est, huic iungeris, nec à curâ eius potes auelli. Hanc amplectere; & magnis illis cogitationibus, affectuum scintillas preme, siquæ exurgent. Cogita & Principem, tui amantissimum, & tui profectò egentem: vince dolorem vt huic vaces, & magnitudinem animi indue sublimi viro dignam. In theatro positus es, conijciuntur in te oculi: sustine personam, nec desice circa extremū hunc velut actum. Quid enim tibi blandiar? vt diutissimè viuas (& ita voueo) tamen pauca lustra supersunt, & sequēris illam præmissam. Ecce, Amplissime & Nobilissime Domine, haud magnam, sed à magno affectu epistolam: quem in te & tuos constanter seruabo, quamdiu Deus in terris me seruat. Vale, & illo ipso faciente, firmare: quod pectore cum rogo. Louanij, vi. Idus Iunias, ∞. 16CIII.

EPIST. LXXII.

*Insulæ.*IOANNI SEVRIO, *Graphiario in Senatu rationū Insulensi*, S. D.

TITVLVM hunc tibi antea gratulatus sum, nunc rem & possessionem. Fallor enim, aut illic agis: debes meo iudicio; & hoc quoque (verbo olim monitum) consoitem assumere, rei & domus tuæ curatorem. Quid in istâ ætate differs? Ea labitur, vita labitur: & sæpè post moram pœnitentia succedit, & indignatio, Quare non feci? Fruere annis, ô fugacibus! & ego iam & olim sensi; iam maxime, qui multos egi, & præter meminisse quid seruauis? Aliquid in publicum laboraui fortasse: sed annorum nota, non ipsi exstant: neque hæc omnia mihi in magno, qui abiens video, NEC TANTI HVMANA esse. Epitaphia hæc inca inscriptio erit, si Deus & amici volent: ego iussi quidem, nec Timonis aliquo animo, sed Zenonis. Heus, inquires: etiam nunc de Epitaphio? non conualuisse te audimus? Audisti fortasse, & ego tale aliquid nuntiem: sed quàm infirma hæc firma nostra sint, quàm labi nos in ipso statu faciles, nimis sum expertus. Blandiens ventus non me inducet, quin tempestatem & nimbium mox exspectem. Extra Philosophiam, & communi

H 2

linguâ:

linguâ: meliusculè, sed ambiguè valeo; & dies, imò horæ pænè, alternant. Tu vt animo inprimis, deinde & corpore valeas, illo me ames vnâ cum Remaclo nostro viro optimo, meum est votum. Louanij, III. Idus Iunias, ∞. IƆCIII.

EPIST. LXXIII.

Bruxellam.

FERDINANDO DE SALINAS, *Consiliario*
Senatus Principum.

ABEVNTEM Riuium nostrum, veterrimum è meis discipulis, & addam felicissimi inter eos ingenij & profectus, elogio an testimonio apud te prosequi, animus adegit magis, quàm res exegit. Quid enim apud te opus, qui nosti? qui notum amasti? qui amatum te & beneficentiâ iuuiisti? Nec enim me celauit, aut debuit, quâ liberalitate nuper eum affeceris, & ad culmen illud honoris euexeris, quod tibi meritò inscriber. Laudandum te vndique. qui optimas artes ipse colis, cultores alios subleuas, & instar Dei illius, bonus ipse bonos optas, imò facis. Opportunè in hoc æuo, quod talia calcat aut præterit: opportunè in isto eius (Riuium dico) articulo, qui in viâ & salebrâ hærebat, nisi à te eductus. O fac porro! Vt enim fruges non bonitas soli tantùm gignit, sed cæli Solisque fatus & temperies educit atque elicit: sic ingenia & artes, non à Naturæ tantùm velut solo alenda, sed vestrâ procerum benignitate, & velut cælesti aurâ, fouenda atque attollenda sunt. Certè iste noster per aspera adhuc iactatus, viam non deferuit: spero mitior fors ridebit, & Comici illud expetet,

Fortiter malum qui patitur, idem potest potitur bonum.

Hoc ego amico meo opto, & te, Nobilis ac Clar^{me} Domine, in virtute tuâ, & comite eius dignitate, diu viuere & vigere. Louanij, prid. Idus Iunias. ∞. IƆCIII.

EPIST.

EPIST. LXXIV.

Romam.

IO. BAPTISTAE BARONIO *suo*.

Vix posui tuas, & respondeo. Amor in te meus fecit, ille perpetuus (ne ambige) & paternus. Sed ego ipse quam pænissimè nuper defeci? Iteri in extremâ Salutis lineâ, pedem reduxi, & iterum valere videor, sed languori etiam vicinus. Fragile vasculum sum, vt rem dicam, & fractum audietis, priusquam frangi. Tu autem Romæ? Neapolim isse te tuæ, an Richardoti, mihi significarunt. Sed & mansionis decretum profers, non pro tuorum hîc arbitrio, vt nuper coram Antuerpiæ audiui. Ego quidem haud dissentio, & facilè æstatem hanc tibi donem, sub Autumnum suadeam redire. Non Roma, non Romanus aliquis (Romanam fugio dicere) vltrâ teneat: & cum manes, apud te etiam mane: nec laxa nimis aut diffunde. Vt vinum vigorem & florem seruat, sed clausum; apertum exhalat: sic tibi fiet; virtus apud secretum manebit, vanesces si vulgaris. Paucis & bonis assuesce, atque ijs notis: cetera liber esto, & præsertim in spectionibus illis antiquis. O suaues, ô viles! mihi si liceret, fructum capiam quem non cepi. De Ill^{mo} Baronio, gaudeo sic in me esse: cum scribam ad eum (sed materies expectanda est) per te fiet, atque aliquid etiam de te inspergam. Publica hîc, vt semper ambigua, turbida: voluntas in Britannia noui Regis pariter anceps, recta; & partes nostræ sibi, & nos vindicamus. Quies & pax his regni auspicijs conuenit: seruaturum puto, saltem temporariam: ego affectum in te, mi Baroni, æternum. Vale. Louanij, Kal. ijsis Quinctilibus, ∞. 16CIII.

EPIST. LXXV.

Gandauum.

MAXAEMYLIANO VRIENDTIO.

LIBROS Carminum tuorum diutulè ante litteras accepi, quas adiunctas tamen fuisse suspicor, missui illi condimentum. Et si quo condimento opus eiusmodi bellarijs? quæ, mihi crede Vriendti, veterem Græciam ac Latium sapiunt,

H 3

ô sua-

ô suauia mentibus, quæ melioris doctrinæ gustum ac sensum habent. Illæ quidem hæc tua

Iurent Albano Musas in monte locutas.

Alia iudicia assis ne æstima, quæ quid sint Veneres aut Charites nesciunt, & quidquid ad Moneram non facit absunt laudare. Nos & dilecta ingenia oblectasti, Belgarum gloriæ addidisti:

— *sume superbiam*

Quæ sitam meritis:

imò non sume, & in Modestiae finibus siste. quia si vlla dona à Deo, ista ingenij, & maximè vaticinij sunt: illi adscribamus, &

Qui dedit hæc hodie, cras si volet auferet.

Vt non ille palam, ætas occultè faciet, & cum in annis grauis eris, lentitudo & frigus aderit, nec felix stili iste calor. At in me amando maneat, nec vel æuum refrigeret, meo quidem voto, imò & exemplo. Louanij, III. Non. Quinctil. ∞. IDCIII.

EPIST. LXXVI.

Bruxellam.

FRANCISCO TREGIANO, BRITANNO V. N.

LITTERAE tuæ, mihi pergratæ, etsi grata & non grata quædam dicunt. Illud displicet, in Aulâ te hære, vbi vada & Syrtis, an & Circe aliqua etiam occurrat? Nec vna, ut fateris: & vides & rides ineptias, qui à vitreâ illâ Deâ alliciuntur, tanguntur, & quid nisi in pecudes, si non feras, mutantur? Amadim suum, & tales scriptores legunt, loquuntur, cogitant: id est * φλυα-
* nugæ & ineptiæ.
* corrupte-
las & preses-
* felicitas.
* Es gratia
vitalis, cū
sua iustitia
lytā, atque
amitium
votum in-
strumētū.
* Achais,
non iam
Achini,
* Vna non
duos noscu-
vacatū. rias & φλυασιαις meras, an & * δ' αφοραὶς & ὀλέθροις animorum di-
cam? Atque hic est * ὄλβος, quem illi putant,

— κ' χάρις ζω —

θαλμος, ἀδμελέι

δ' αἶμα μὲν φόρμυγι, φαιφά —

τοισί τ' ἐν ἔντεσι αὐλῶν.

A me abeant, à te etiam, quæso — * ἀχαῖδες, ἐκ τ' ἀχαιοί. Fateor varia studia finesque esse, & cum Thebano vate,

* μία δ' ἐχ' ἀπαντας ἀμμε δρέσει

μέλτα:

& fateor etiam, optimæ Sapientiæ studium rarum esse: sed ta-
men ad hoc te voco: ego, an altius ingenium iamdiu tuum? Cer-
tè Deus

tè Deus tale dedit: cui si cultus, vt cœpit, accedit, & cursus per viam rectam: quid non sublime & *ῥαυμασίν* de te spondeamus? ** Admirabile.* Scripta, quæ vidi, asserunt: & hæc facient, quæ videnda iam misisti. De Republicâ nostrâ quæ nuntias, spem quàm rem bonam habent. Sed ista ** βεβδύτης* nostrâ, quâ sollenniter iam utimur, ** Tarditas.* quid in bello præsertim magnum pariat? Scio nec ** αεγπτεται* ** Præcipitantiâ.* oprabilem aut laudabilem esse: sed tamen maturitatem & quæ Delfinum ancoræ suæ iungat. Fabium in defensione non abnuâ; in aggressu Achillem, Alexandrum, Cæsarem præoptē. In vestrâ autem ** νάσω πολυμάλω*, quid nouus ** σκηπτῆχος* faciet? utrū ** ὁδὸν* ** In sulâ pecorosa.* ὁρῶν δ' *δίκης κ' ἀληθείας*, βαδίσσει, ἢ τὴν σκολιὰν δ' ἀπάτης; Sub initia ** Scepti-ger.* egre dijudices, vbi multa temporibus & hominibus danda, contra animi etiam sensum. Legatum nostrum comiter & (pro more gentis vestræ) splendide acceptum audio: cetera modò respondeant. quod breui videbimus: & quando ipsum te, mi Tregiane? cui gratias ago debeo quæ pro narratiunculâ facti admirandi: admirandi, sed & per me in loco ad posteros (meretur enim) propagandi. Vale: & longior eram, nisi auocarer. Louanij, Kal. Sextil. ∞. IOCIII.

EPIST. LXXVII. *

Romam.

IOANNI HEMELARIO suo.

HEVs tu, semper te amo, sæpè cogito, rarò scribo: & omnia causas suas habent. Amor ab amore tuo est, & ab indole optimâ, quam semper in te vidi, & magis exultam, & virtuti asseram, magis amo; cogitatio ab eodem; scriptio rarior ab occupatiunculis, item quæ à valetudine, ita me Deus, tenui & negotijs non subsistente. Otium & quietem flagitat, non solum poscit. Vnius te monui olim, & moneo: in hac ætate vigente & floridâ, plusculum animi & fiduciæ sume: & te atque alios item noris: te, qui sis; qui non sint, illos. Neq; ad elationem voco, quam odi portis inferni deterius, cum Homero hoc dicam: sed ad animi iustum mediumque tenorem, in quo virtus. Rubenium meum vides? modestia ipsa est: animum? scit cæleste aliquid se esse, & lucere debere, atque eò contendit. Homine in te Deus fecit, nec ex istâ ingenuorum plebe: cur ordinem deferas, & subsellia potius

tiùs quàm sellam curulem eas incessum? Non meo voto aut iudicio facies: erige te, & pietate volente, fidus in hoc mundo esto. Genus vitæ elegisse Sacrum scribis. Semper te eò destinaui, & gaudeo spem meam affirmasse. Ego alta cogito, alta: id est cælum, quò me languores perpetui isti ducunt, non enim trahunt. At tu valetudinem integratam gratularis. Falsus es. non est quæ fuit, neque erit: sed viuimus tamen, & metæ vicini non tam reduximus, quàm frānauius præcipitem gradum. Abire etiam non metus aut mora est: à prauis, à turbidis. & Deus ferreo sæculo me inclusit, & quod mitius metallum non spondet. Publica eunt, vti consilia sunt: nam Fata iniustè accusemus. Vale mi optime Hemelari, & amande semper ama. Louanij, XIII. Kal. Septembr. ∞. MDCLII.

E P I S T. L X X V I I I.

Perusum.

M. ANTONIO BONCIARIO S. D.

LITTERAS tuas, amorem & elegantiam spirantes, accepi, & animo caras fuisse, libens profiteor ac testor. Nam amari à nobis Italiam, quis nescit? & viros certè, siqui in eâ, vetere & nuperâ etiam illâ Italiâ, exhibent se dignos. Tu ille es mi Bonciario. quod epistola tua mihi dicit, vna nec diffusa, fateor: sed vt Colossi magnitudo vel in breui sigillo se ostendit; sic ingenium & doctrina etiam in tenui & extemporaneo scripto. Itaque & ab hac causâ te amo: quid cùm Bencium meum, qui hèn fuit, velut auspice amicitie adhibes: quomodo non vltro me in vincula ista donem? Facio serio: hoc præfatus tatum, amare me iuxta tecum, aut supra, posse: paria officijs aut scriptionibus vix posse. quia & sæpè ita distringor, vt non liceat; & langueo etiam, vt non libeat hæc vsurpare. At, vt dixi, amabo, & id iudicio: certiore illo, quàm tu in laudes meas iuisti, quas inerrare auribus meis patior, sed non in longum, notitiâ mei reuocâte & abnuente. Sicut tamen Stratocles, opinor, olim Atheniensibus cùm res prosperas nuntiaffet falsò: increpâtibus deinde dixit, Quid enim mali si meâ operâ biduum lætiores egistis? tale aliquid mihi euenire fateor, & breui lætitiâ perfundi elogiorum talium; sed breui, & perfundi. Ego nunc totus in *Stoicis* & *Senecâ* eram, post ancipitem

pittem sanè morbum:& breui illa videbitis, si mea Parca menses etiam aliquot parcit. Tu vale, Vir inter paucos mihi deinceps amande, atque æstimande. Louanij, XII. Kal. Septembr. ∞. IOCIII. statim à tuis litteris acceptis.

EPIST. LXXIX.

Neapolim.

IVLIO CAESARI CARACCIOLO S. D.

ILL^{ME} DOMINE, Litteras tuas accepi, & generosam indolem, & beniuolentiam in me spirantes. Gaudis sum. nam animum meum seriò afficit, cùm vos è stirpe nobili & altâ, dignos eâ video, & non incumbentes maiorum famæ tantùm, sed à se trahere & propagare eam aptos. Fatemur sanè, ut à radice & stirpe bonâ fructus tales, sic à nobili semine germina talia expectanda esse: sed quanto optabilius spectare, quàm expectare? In te ego video, qui iam olim optimis artibus, & quæ ad Honorem & Virtutem ducant, imbutus, perseveras easdem colere, atque eos etiam amare & æstimare qui colunt. Hæc res me tibi conciliauit, & locis dissitū coniunxit, affectu quidem. nam ut corporibus, non datur, non dabitur, ut mea quidē valetudo est, haud facta ad peregrinandum, imò nec ad diurnandū. Annis graues non sumus, sed laboribus fessi aut fracti sumus: & respicimus exitum, ut ij solent, qui in custodiâ molestiore tenentur. Nil circa nos, nisi bella & turbæ: & inter dispare agimus, quod liberè & verè apud te profitemur. Scripsi iam nunc ad ANNAEVM SENECAM, & Stoicam totâ Philosophiam libaui: eo certè fructu, ut mihi robur impresserim, dum alijs idem paro. Sicut in naui qui transfert & vehit, idem vehitur: sic mihi factum in Scriptore, quem natum seruaturumque censeo bono generis humani. Vale Ill^{ME} Domine, & Honesta ac me ama. Louanij, Nonis Septembr. ∞. IOCIII.

EPIST. LXXX.

Bruxellam.

PETRO PANTINO V. R.

REDITVM ego & salutem ex animo tibi gratulor, belli & morbi periculis euoluto. Vtinam de patriâ sic loqui liceat: quid loqui? utinam sperare! Sed heu, vndique ἀτυχήματα, eò ^{* Infertur} tristiora, ^{nia.}

^a Mala cō- tristiora, quia causam ^a δυσβολίαν nostram, an ^b ἀβουλίαν, habent.
^b filia. Illa nuper ad Hoochstratam, quàm ^c ἐπιονείδισα : ista ad Buscum-
^c Nulla cō- ducis quàm ^d ὀλέθρα ? Et hosti quantum accedet, nobis decedet
^d filia. eā captā, quisquis planè ^e ἀφρον non est, vider. Ego tibi de me fa-
^e Pudenda. teor, ^f ἀθύμως ἔχειν, cūm continuas istas ^g διαπαρεχέας video : & nec
^f Exitia- erigi quidem nostros ad emendandum. Consiliorum eandem
^g lia. viam imus, frigemus, tardamus, & planè ^h καθάπερ ὑπὸ μανδί ex-
^h Mentis aperi. γόγου κατέυδομυ. Mi Pantine, fato premimur : ⁱ τό γὰ μόντιμον, οὐ
ⁱ Dissidere. ^j Φευκτόν, ergo alia curemus. Quid? ego animum & me, à Senecā:
^j Malos quem iam denique paro edere, & Stoicam illam ^k ζοφώδη doctri-
^k amentis. nam in lucem redegi, ^l οὐκ ἀπώγως. Intricata res : peruici. *Vestram*
^l Taquam sub man- dragorāia-
^m cetum. ⁿ Fatalē, πῶ
ⁿ vitabile. ^o Nebula-
^o fam. ^p Non sine
^p labore.

EPIST. LXXXI.

Brugas.

IANO LERNUTIO *semper-suo.*

LONGAM, liberam, & verè amicam tuam epistolam : & om-
 nibus his nominibus, inprimis ipso Lernutij, gratam. Am-
 plector te, sed animo: brachijs si possim, & ore adfari, quàm om-
 nia in notæ fidei sinum hunc effundam? quàm me reuelem, &
 quidquid in aumario pectoris huius condo? Nunc quoque in
 parte faciam, sed parciùs : & scis chartæ non omnia tutò credi.
 Audi à principio, vestigia epistolæ tuæ legentem. Commendas
 primò Robertum Schilderum: dignum, & ex sermone agnouit.
 Adolescens est mente & studijs bonus, & qui ad optimas artes
 pleno gradu incedit. Quàm pauci nostratium cum ipso! quàm
 ludibrio aut contemptui est nomen hoc omne litterarum? Vi-
 des mecum & doles, feres etiam vt fortes decet. Meliora tibi ne
 sponde: ad vltimas inscitæ lineas imus. Interea tamen nos ali-
 quid etiam pangimus, & in litore isto sulcos ducimus: quo pri-
 uatim aut publicè fructu, non habeo adfirmare. Imò bellè tibi
 est, inquis. Non pessimè, fateor. si de magnis opibus aut gratiā
 præsumpsisti; muta, medijs in istis sumus. Vultus aut sermo
 quorundam arridet: qui capiunt pauci sunt, & quod sequitur,
 seriò ament. Vnum tibi dicam, interpretare. filios si habeam,
 litterulas me auctore non discant. Addis in epistolā de meis
 quādam,

quædam, & putas, liberè. Non liberè, sed amicè & decorè: atque obsecro aliàs vsurpa. Scribis in Politicis cetera exacti operis videri, abesse de Legatis. Verum est, & poterat locus ijs esse inter Administros. Sed quia temporaneum hoc munus (olim quidem) neque illi apud Principes aut Respublicas perpetui, abstinui dicere: & quia rem totam istam non maximi vsus censeo, quidquid aliter iudicare hodie consenserunt. Et in Notis tamen dicere destinaram, ac collecta ista habeo: sed augendi aut recolendi eas animus abiuit. Ais dein de Epistolis meis, & de vnâ illâ * insertâ. Quid dissimulem? rem tetigisti, ambitiuicula mea fuit, & quæ sita gratia illius, qui in aperto nondum mihi rettulit, nec referet, vt tecum quoque opinor. Quid tamen est? benignitas mea orbi innotescat, & quàm æqui in aliena ingenia sumus, etiam fortasse super æquum. Non mihi fit: fiet aliquando, & confide Genio nostro, viuet ac vincet. De annis ætatis meæ cauillari etiam quosdam. Quid hoc est, & qui possunt? In illâ de vitâ, palàm & verè scripsi tali anno & mense menatum: calculatore non opus ad hoc æui, quot eos inscribam. Sicubi autem alia aut * aberrans scriptio, non memini, nec puto: si tamen, emendetur. Item de valetudinis crebris querelis, risum habet. Ab alijs etiam audio: atqui, ô boni, miserationem debebat. Non facimus maiora ista verbis; res vtinam non clamet, vtinam non ipsa scripta colorem ab affecto animo & corpore ducant! Hoc fine, & excusandi mei, interdum infero: quid si etiam contra importunos, & irrucentes istas muscas? Hæc scribere, hæc facere me volunt, suadent, iubent: arripio illam ægida, & rationem qui non audiunt, hoc scuto terrente depello. Sed cogitent etiam, seorsim & apud plures non iniuste dicta: quæ nunc in vno fasce adspecta fastidium habent, nec leguntur vt diuisa. At de Busequij morte, scio errorem: sed adnotabitur. & tamen famam Epistolæ, non historiam iui insertum. Estne aliud? propria etiam tua, sed amica, sed iusta (agnosco) querela, de primis libris meis non semper ad te missis. Gaudeo requirere & poscere, & culpam excusare nolo, sed emendare. Habes hîc *Epistolas*: habebis *Politica*, quæ iam recuduntur. Habebis & magnam *Senecam*: in quem vtinam dignum aliquid moliti simus! *Stoicam* tamen *doctrinam* seorsim illustrauimus, & ipsum breuibus Notis, & (In-

* Editura
libri xviii.
Kal. No-
uembr. pro
xv.

uidia audiat) alibi bonis. Omnibus placere, nec spero, nec opto quidem: mihi hoc opus vnâ causâ, quòd fortiorem aut meliorem me fecit. Salue, & ama me ex animo, qui eo tuus sum, mi anime. Louanij, xi. Kal. Octobr. ∞. MDCLIII.

EPIST. LXXXII.

I. LIPSIUS IOANNI WOYERIO *suo* S. D.

FELICITER, acclamo, mi Woueri: vtinam præsens possem! Sed vel sic absens facio, & corde itero: nemo magis ex illo. Equidem iamdiu tibi felicem talem copulam destinabam, & merenti: vt tua probitas & modestia, atque etiam ingenij & morum elegantia est, quâ vel imperitos meliorum tuarum artium & partium ad te ducas. Benè est, habes. Nam de dote, vberem audio; de parentibus, honestissimos; de ipsâ aliquid ipse dixerim, & probè memoriâ tenco vidisse. Suauis mihi visa, morata, proba: si nihil horum esset, apud te fiat. Iungere, fruire, & nouellas stirpes, paruulos Wouerios, nobis pange. At me quòd velut auspiciem nuptijs tuis optas, vereor vt fiat. Mea *ad Senecam* iam mitto Antuerpiam: ipse venire imminente hieme, & attenuante valetudine, dissuadeor. Sed venio, non venio, mente & cogitatione adero: teque & tuam, mi Woueri, tam fideliter amabo, quàm æternum Numen me velim. Id porro cœpta tua secunder, & ferente aurâ in portu votorum tuorum nostrorumque sistat. Vale mi optime. Louanij, v. Kal. Octobr. postridie quàm Bruxellâ redij, vbi dies duos modò hæsi.

EPIST. LXXXIII.

Bruxellam.

ÆGIDIO MARTINIO *Syndico ciuitatis Bruxellensis.*

EPISTOLAM tuam fateor gratam mihi fuisse, sicut & sermonem, quem tecum ante menses duos circiter in hac vrbe ferebam. Vt enim in isto prudentia tua, & erga me ac parentem olim meum affectus, clucebat, ac iure capiebat: ita in litteris hæc ipsa exprimis, si nō clariùs, certè firmiùs, quanto conceptæ scriptioni maior esse fides & auctoritas, quàm extemporalis fermocinationi solet. Itaque meritò & rependo affectum tibi, &

bi, & in filium etiam, quem hîc habes, deriuo: quem si non causam, tamen occasionem huic amicitiae nostrae dedisse, videor posse affirmare. Enimuerò quid officij manare à me propriè in te possit, vix video: in filium fortassis aliquid, quem in hanc Academiam, velut ad mercatum optimarum artium, misisti: & dirigere hîc eum, atque etiam instruere, pro otij & virium mearum copiâ, aliquid possum, & volo. Ciuem enim patriæ amantem me profiteor: cui quid amplius conferre aut commodare possum, quàm vt liberos cùm ipse non habeat, alienos, & præsertim vestros talium, qui aliquando ad rempublicam ad mouendi sunt; formem ad eam ac concinnem? Adnitari equidem, aut potius tot annos iam adnissus sum, quâ scribendo, quâ docendo conatus meliorem & doctiorem reddere iuuentutem. Is enim, Deo teste, laborum meorum finis scopusque est: & Fama si sequitur, non magis huic laborauimus, quàm is qui in Sole currit, vmbrae causâ id facit. Sed de filio tuo, tantò libentiùs manum illi porrigam, quò magis beniuolentiæ tuæ nunc debeo; & quia ingenium atque indoles etiam eius inuitant, ad bonum honestumque facta. Gaude in tuâ stirpe, & solatia inter afflictæ patriæ turbas, è domo tuâ magis magisque (Deum ita precor) cape. Eundem, Vir Clariss^{me} & Prud^{me}, vt te reipublice, cui laudabiliter operam præbes, incolumem seruet. Louanij, v. Kal. Octobr. ∞. MDCIII.

EPIST. LXXXIV.

Antuerpiam.

IOANNI WOVERIO suo.

ET quando magis te meum ostendisti, quàm in hoc *Eucharistico*? à cuius lectione duplex affectus me habuit, læticia & pudor. Læticia iterum duplex. vel quia laudabar à te. gratum autem & optabile placere ijs, qui ipsi nobis placent: vel quia sic laudabar, id est scitè, doctè, discretè. Hæc enim qui in scripto tuo non agnoscit, aut liuor aut stupor eum habet, & in veruecum patriam à nobis relegetur. Quàm inuentiuncule multæ raræ, & argutæ sunt! quàm imagines sepositæ, & tamen appositæ! quàm ipse stilus sine tumore altus, sine affectatione eruditus! Mihi hæc sic visa, fateor; & placuerunt omnia, præter ar-

gumentum. Nam quòd me laudandum sumpſisti, quì laudem? Pudor ille retinet, quem dixi: qui etiam nunc habet, & pugnat iudicio, & tua cùm amem, damno. Non sum ille quem facis, & in sublimi sic locas: descendendo, & conscientia me detrahit, & nemo melius quàm ipse me noui. Quid tamen est? cùm tua relego, pudor iterum pænè exſulat, & videor aliquis esse, quia tam fortiter & impresse vis esse. Ita sentis quæ dicis, ita tibi approbas, vt me quoque in partes trahas, & credere adigas, quæ nec credo. Non plenè quidem credo. nam tangere te interiores meos affectus, qui de proximo nosti, non diffiteor: & laudabiles conatus exprimere, si non successus. Omnia cur reijciam?

— *aliquem mens spirat honorem*

Conſcia factorum.

Nam vt candidè tecum, & ſenili quadam libertate loquar, dona habui & exſerui, quæ non omnes mei ſtudij aut æui. Iudicium inprimis Deo acceptum reſero, & ab eo ordinem in ſcribendo & diſpoſitionem, vel paucis veterum vbique ſic uſurpatum. In ſparsâ quauis & confuſâ materiâ ſeruauì, & partiri ſemper aptè ſtudui: quod Socrates alibi apud Platone[m] *diuini uiri* cenſet, ego *diuini doni*. Et ab eo donum alterum adſcribo, Eloquentiam: quæ in ſermone aut ſtilo aliqua fuit, atque ea facilis & profluens: quod in ſtriſſâ & argutâ breuitate nec habeat quiuis, nec credat. Illa ipſa breuitas, quod imputo, ſine tenebris fuit: & multa paucis ſic dixi, vt influant & ſe diffundant, & vel plura videar dixiſſe. At tertium & præcipuum, quod iudicij, ingenij, eloquij, ſtili quidquid in me fuit, in publicum contuli, & uſui, non pompæ, volui ſeruare. Vide mea vel à iuuenilibus annis, ſemper ſcintillæ aliquæ ad Virtutem aut Prudentiam prælucentes: ſemper animus ille apertus, amans generoſi & honeſti. At grandior paulò, non iam occulto aut obliquo tramite, ſed palam & rectè illuc iui. Ego ad Sapientiam primus vel ſolus mei æui Muſas conuerſi: ego è Philologiâ Philoſophiâ feci. Vide *Conſtantiam* meam, dicet: vide *Politica*, idem: & hæc vtrumque opus eſt, cui vita fortalſe cum Latinis litteris manebit. Quid in *Tacito*, *Plinio*, *Epistoſis*, *Miltiâ*, *Admirandis*, *Senecâ*, nōnne finis idem & fructus apparet? Hæc ſunt, quæ in cenſum, ſed non à me deſero: ingratus ſum, niſi diuina dona agnoſcam, & gloriam ab

ijs

ijs etiam tribuam auctori. Sed ecce longius eo. scriptum tuum remittere tantum, & cum vero elogio volebam: de me siquid addidi, apud te licuit, mei sic immodicè amantem. Louanij, III. Nonas Nouembr. ∞. MDCIII.

EPIST. LXXXV.

Bruxellam.

MAXIMILIANO PLOIMIERIO.

LITTERAS quas daturum me dixeram ad Buissonium, ecce hîc habes. Mittere eas tuæ curæ erit, quam vltro tibi imposuisti, pro affectu quem in illum & me habes. In me certè, nuper in sermone largiter declarasti: & si non verba, ipse vultus & oculi tui fecissent fidem. Et si quid ambigerem? eadem vterque amamus, id est Bona & Honesta: ex quo sequitur & adhæret, vt inter nos etiam amemus. Senecæ nostri dictum est, è Porticu promptum: *Inter bonos viros amicitiam esse, Deo conciliante.* Est ea veritas. Deus, imò & natura, faciliè iungunt, studijs & voluntatibus iam iunctos. Itaque sicut credidi promptè & libens de tuo in me affectu, velim te pariter de meo: quem bonum, fidum, atque etiam firmum reperiens, nec nisi cum ego soluar soluendum. Id fortasse breui, vt ætas & valetudo mea sunt: tamen nec parvus circulus minus perfectionis quàm magnus habet, nec Amicitia tempore, sed veritate æstimatur. Vale mi Ploimicri. Louanij, VI. Kal. xbris. ∞. MDCIII.

EPIST. LXXXVI.

Lutetiam.

SEBASTIANO ROLLIARDO I^{to}.

BRUXELLAE & in Aulâ eram (ô sedem pro Lipsio!) cum tuas accepi. Gratas, suaues: quid opus me affirmare? semper vegeasco, & velut effloresco, cum aliquid à meo Rolliardo. Atquin & libelli tui adiuncti, dona Musarum: ille de Passertio, bonus, & pius, ac manibus eius ritè ac meritò à te factum. Vbi hodierna gratitudo? quid autem in mortuis speremus? vix viuus aliqua manuum applofio, & vocis fauentia: & irrisus aut pastoritæ οὐρανῶν excipiunt, & à tergo manus motæ. Ferenda hæc omnia, pro xui Genio, aut iter hoc famè deferendum. Nuper ego aliquid

aliquid *de Vestâ* : probare te gaudeo, etsi melius illud iam damus, & addimus quædam, & mutamus peccata *ἐξ ἀπεσοῦλας*. Etiam *Porticus Sophiam*, in duo volumina distinctam: sed tenue & argutum opus, & aliquis dicat *χελιδόνων μυστῆρα*. Æuo nostro obtinent iudicia, quæ olim calcata; & scis quàm diuersa tota hæc studiorum via. Sed tamen Senecæ causâ id quoque exantlandum fuit: feci, & gaudeo factum. Quod à vestro Autocratore vocatum me, & perhonestè, censet: ita est. nec tamen audiui-mus, & à patriâ, in hac ætate atque imbecillitate, nemo me com-moueat,

* Non mihi
si donet,
quantum
est cum pul-
mura artem.

* Οὐδὲ εἰ μοι τόσα δαίη, ὅσα ψάμαθός τε χάρις τε.

Apud te seriò dico. Labet hæc patria nostra, siue ruat: ego cum illâ ad discriminis aut fati metas eo. Ad easdem illas, & vltâ, te mi Rolliarde optime & doctissime amo. Louanij, viii. Kal. Febr. æ. 161111.

E P I S T. L X X X V I I.

Florentiam.

CVRTIO PICRÆNÆ.

ALTERAS tuas vidi, & Inscriptionem veterem adiunctam, fide exscriptam: sanè bonam & rerum veterum, de quâ iudicium meum ad Mercurialem vestrum iam perscripsi. Marcelli honori non esse positam opinabar, sed Caij aut Lucij Cæsarium: quò ratio magis, & æuum ibi notatum ducit. Felices vos in talibus istis curis, in altâ & beatâ pace: nos litui circumstrepunt, & in ipsâ hac studiorum sede, arma & miles. Tædet temporum; & nisi Philosophia subleuet, iamdiu iaceam, & in parentis magnæ sinu recondar. In Tacitum aliquid à te promiseras hisce Nundinis: librarius Syllabus negat, & nomen tuum non ostendit. Ego *de Vestâ* nuper aliquid, & nunc melius vberiusque damus: item *Stoicam Philosophiam* sex libris comprehensam. noli erigi, non est pro vestrâ Aulâ. Spinæ sunt, aut Paradoxa: & in re fortassis alta, in specie non videntur. Senecam adiungimus, & hoc sine Antuerpiam imus. de quo sic iudicare re, gratum mihi neque inopinatum fuit. Quæ bona mens aliter potest? ego autem etsi propiùs te, nec nisi ex scriptis, haud noui: tamen tam scio de sensibus tuis, quàm de meis, pænè dicam. Vides quid mihi vindi-

vindicem? nec faller me scriptorum tuorum character, in quo probitas & iudicii rectitudo comparent. Pauca verba facio, quia ab equi lapsu saucius & æger: ama me, seriò & constanter idem facturum. Louanij, III. Kal. Febr. ∞. IƆCIIII.

EPIST. LXXXVIII.

Veronam.

FRANCISCO POLAE I^{do} ex animo S. optat.

Tv verò Vir Cl^{me} non prouocas me ad amicitiam, sed adigis: nec amore solùm (cui meum quî negem?) sed iudicijs & beneficijs: sic enim *Elogia* tua iure debeo interpretari. Legi, amaui magis quàm probaui: nam quomodo tam honesta, vel magnifica potius, de me & ingenio meo possim? Mi Pola, veteres haud temerè Amori oculos clausurunt: affectu, non iudicio, videt: & habet pulchra atque haberi vult, quæ ipse censet. At sæpè fallitur: & tamen vel sic amandus est, quia ex sensu suo & candore, sine malâ fraude, agit. Tu verò is es, qui iudicio alibi & in alijs præstes, inò etiam in grauioribus causis præceas: sed verecundia mea & modestia sequi cunctantur & retractant, & de me ad me appellant. Quid tamen facio? quid ipse resisto, & te sisto? quin vela potius affectui tuo pando, & adspiro: & ama vel falsis me causis, dum ames. Hoc valdè cupio: de reliquis ætas sequês dicet, quæ Gratia aut Inuidia expers, ingenijs suum cuique pretium rependet. Ego affectui tuo serium affectum: per Genium Famæ iuro. Louanij, prid. Kal. Febr. ∞. IƆCIIII.

EPIST. LXXXIX.

Valentianas.

HENRICO D'OVLTREMANNO V. C. S. D.

Dii deæque, tuos versus! stupui simul, & rubui: illud in ingenio tuo, sic acuto, sic vario; istud in laudibus, quas supra modum is in me effusum. Non me fallis, ô amice: fontem à te, non à me habent: id est ab affectu tuo, non merito Lipsiano. Sed benè tamen, quòd versus sunt: & vel eo titulo præscribant, fidem non promitti. Ego aliquid subito in eos lusi, & hîc habebis: sed vix versus. ita humiles sunt, & languidum incedunt, vt vel recto oculo tuos vix ausint inspicere. Antuerpiæ iam fuif-

K

sem,

fem, nisi casus me tenuisset, & verè casus. Equuleum ex dono habeo, quo vehi soleo ad exercendum & ambulandum; alienis scilicet pedibus, ætate iam grauiore. Ille meus vector mecum lapsus est, & crus & tibiam, sed leuiter, adflixit. Ita domus me habet, non tamen lectus: & cùm iste, tum *Exsequias Lipsio licet ire.* adeò quies mihi inimica est, & gaudeo ac viuo motu. Bruxellæ etiam fui, & vidi Comitem Stabuli Castellæ, Principem iam olim in me affectum. Item in litteras. quas vtinam Deus & Æuum coli magis velint, quàm tristem hunc Martem! Sed heus, ecce Versus

* * * * *

Iam place tibi in tuis bonis, qui tam malos meos vides. Quæris quod è tam magnâ tuorum copiâ approbem imagini nostræ subscribi? istud, nec voto melius optari potest.

LIPSIADAE, velum est Timantis, imago. videri

Non nisi sub pice. à Sol quoque nube potest.

Hoc mihi & Modestie meæ amicum, vt omittam argutissimam inuentiunculâ. cetera bona, aut optima: sed Inuidiam habeant, me quidem viuo. Ne prouocemus: inter nos amemus, seriò, acriter, constanter. Louanij, Kalendis Februarijs, ∞. 16CIII.

E P I S T. X C.

Perusiam.

M. ANTONIO BONCIARIO S. corde D.

QUAS natali meo ad me dedisti litteras accepi, etsi ferius, imò tardiùs: neque enim serò ad me aut frustra tam amicæ litteræ possint peruenire. Amaui te meritò, vt primùm ex epistolâ & te, & affectum in me noui: & magis amare cogor, quò propius certiusque (Virtus hoc habet) noui. Nam & epistola hæc certè, optimi & pulcherrimi animi index, delectauit: & Carmen tuum ad DIVAM LAVRETANAM valdè opinionem de te meam auxit. An non faceret sic eleganter, doctè, altè, piè scriptum? Atque ipso tempore venit, quò ego in pari argumento eram, aut potius summam illi manum iam imponebam. Nam & ego, mi Bonciari, peculiari semper in Matrem-Virginem cultu & affectu, DIVAM HALLENSEM scripsi, & beneficia

cia eius ac miracula partim solutâ, partim strictâ oratione, sum complexus. Nihil expecta ad tuum Carmen: aliquid ad animum, quo erga Diuam nolo vinci. De *Senecâ* etiâ meo breui arbitraberis, fecerimne pretium operæ post Muretum, & Gruterum, & alios: quod profectò, vt rectè iudicas, arduum sit nec alicuius è populo præstare. Non me attollo, nec debeo: sed aliquid contulisse in Sapientiæ illum patrem, res, spero, apud te dicet. Libens autem (vt ad tuas iterùm litteras) legi de Carolo Emanuele Pio à Sabaudia, stirpe & ingenio & studio illustrissimo adolescente: quem quòd erga me etiâ affici scribis, gaudeo, & in beneficij loco hoc pono. A te, an ab illo accepti? nam & te iudicio aut testimonio aliquid contulisse, vel ad eliciendum, vel ad augendum affectum, pænè habeo persuasum. Et si talis illa indoles sponte etiam amat, & surgit ad complectendos, in quibus Honesti aliquas flammulas videt. Vt perseveret, à me cum roga, & mutuum facere affirma. Vt tu pariter, mi Bonciari, rogatus esto, ô inter paucos Italiae tuæ lumen. Louanij, XIII. Kal. Mart. ∞. IOCIIII.

EPIST. XCI.

Veronam.

ANDREAE CHIOCCO S. D.

A MOREM tuum variè & ἀφ' ὅλης ostendis, neque vlla epistola à te est, in quâ non illum nudum videam & expressum: idq; sine colore aut fuce. Non redamē te? sic facio, vt Deum me velim: & Deum ipsum testor. Scripsi ad te ante dies quindecim: & iterùm debeo, vel Bonciarij nostri causâ. Quàm ille de me benignè & * μεγαλέως? nimis, & vellem in publico temperasset. Nondum eò venimus, vt Sol noster umbram non habeat, & claritas aliqua non liuoris nubem. Sed ille verò fortiter, tamquam ego sim * τανύ πτερος ἐν ὄρει σκιαιετός: quod non eius amor, non tuo etiam credam. Nam & tu hîc * ὑπὲρ τὴν αἴαντα, & ad extrema laudum iuisti, me non sequente, & in terrâ etiam meâ hærente. Non sum aut ero ille * ὑπερομήνης. Sed ad ipsum Bonciarium scripsi, iam è litteris ad me & famâ notum, & certè à niueo isto petore (vt doctrinam omittam) amandum. Nec tu arbitrare de alijs Italis qui melioris & prisce, vt sic dicam, sanguinis sunt, me

K 2

dubita-

* magnificè.

* lati pennæ in aui-
bus, aquila.* super meritum.
* quicquam tangit.

dubitare. Fuerit vnus ille nescio quis hybrida, qui proteruiter in me immerentem: sed ab alijs quidni affectum expectem & exposcam etiam, quem scriptis dictisque meis omnibus in eos ostendi? Dabunt, & dabo: & crescentes istos ingenij flores mutuo fauore irrigabimus potius, quàm liuore amburemus. De * tecum sentio: acre ingenium, iudicium est vbi desideres, & addo maturitatem. Stemma illud, tuo commodo, vidisse velim. Ego pluscula nunc edo, *Ad Senecā* Notas perpetuas; item *Diuam Hellensem*, miraculis apud nos claram; item *Monita & Exempla Politica* libros duos, In gustum; item *De Magnitudine Hebræa* libros quattuor. Quid ais? cessauimus hac hieme? Cum tuo autem Pindaro, *χρὴ δ' ἐν ὡδελαις ἰδῶς σείχοντα μάκρας φωνῆς*. Vale Vir C^l^{me} & æternum meus. Louanij, prid. Idus Mart. ∞. IOCIII. De Ill^{mo} vestro nuper ad te, nunc ecce ad illum. At tu Flaminium nostrum Valerinum à me amplectere, & grates gratias pro scito Epigramatio redde. Coram ego hoc facere *ἡγχι ἔλκομαι ἥτορ*.

E P I S T. X C I I.

Lutetiam.

IO. VERGERIO AVRANO S. M. D.

GAVDIVM mihi ab aduentu tuo, & felici itineris metâ; sed maius gaudium ab affectu, quem purum & magnum in me ostendis. Et accipio equidem, & sine retractatione admitto. vel quia candorem tuum noui; vel quia à meo metior, qui talis talem poscit. Nihil mihi das, sed soluis. Perseuera tantum, & ipsum me, non quæ alij de me, vide. Ille * * cur mihi infensus, vel certè aduersus sit, nescio: nō meruisse, hoc scio, & vt alia mihi detrahat, vitum bonum sciat, & candidatum bonarum artium ac veræ Philosophiæ, neque aliud iacto. O miseri, quò rapimur ad æmulatiunculas aut calumnias, in alios Lyncei, in nos Homeri? Mi Vergeri, hoc inprimis vitare te hortor & rogo, in alios inquirere, te negligere: contrà fiat, benigni in omnes, seueri vel asperi in nos simus. Socratis præceptum vetus erat:

* Audibus
in proprijs,
quid velis
alindq̃ ge-
ratur

Ὅ, τί τοι ἐν μέγιστοι καὶ ὅν τ' ἀγαθόν τε τίτλη;

Hodie contrà fit, & emissitios omnes oculos habemus. At illi, vt volent, iudicent: ego in viâ rectâ constanter ambulo, ab æmulatione, ab ambitione prauâ auersus, & quò debeo versus, id est ad Sapien-

Sapientiam & Deum. De ipsâ Galliâ, scis quàm amem: sed non hos nouitios libros, quos mittis, leuium & exsultantium ingeniorum fœtus. Nihil in iis solidi, maturi, aut, non dicam vetere, sed nuperâ Galliâ digni. *MILES ille quidem palàm* ^{dementis, aut omninè} *φεγνεί, ἢ παντάπασιν ληρεῖ.* Alia de illo audieram: sed cùm legi, erorem meum, furorem illius vidi. A Thuano ipso Historiâ expecto, vetere amico nostro, & tum arbitror. De doctrinâ vel industriâ, non ambigo: sed, vt hoc æuum est, rarâ quadam prudentiâ opus ad placendum, vel potius non displicendum. Sed qui sapit, posteritati etiâ scribit. Nos in languore, plus solito, sumus: sed te, mi Vergeri, & acre tuum ingeniũ non languidè amamus: fac mihi idem, vel eo nomine merenti. Louanij, VII. Kal. Iul. œ. 15CIII.

EPIST. XCIII.

Lutetiam.

ABRAHAMO BIERANO Equiti Silesio.

ANTE paucas horas tuas accepi; vide quàm gratas: differre in diem responsum non potui, & animus adegit statim reponere & pariare. Pariare inquam, ab affectu quidẽ: quem puto me non tuo magis, quàm meritis & huic indoli debere; addâ etiam industriæ, à quâ magna ego quidẽ spero. Delectat in animo, cùm video Germaniam sic excoli, & has velut faces accendi, quæ magis magisq; illustrabunt. Perge amice, & me vel opinione futuri oblecta: nam rem vt videam, vix in valetudine hac sperem, quæ præcipitat, non iam labitur aut labat. Non sunt verba: tristior vobis fama vereor vt dicat. Nimirum eundem est, & faciendũ quod facere nati sumus. Benè, si non omnis mei sub terras memoria ibit. Viuat in vobis amicis aliqua; in te mi Bibrane, quem in hoc album nunc adscribo. Lapidem quem mittis, vidi cum admiratione aliquâ, & rarum, perrarum, exteris Regibus sic poni. Vix tamen est, vt supposuerit, nisi doctior aliqua manus: nec credo. Tamen ambiguum etiam reddunt, quæ in historiâ haud certa vndique notas: & examinanda sunt, neque temerè & de plano sententiam feram. Illud de plano promitto, amicum te mihi nouum, sed carũ esse: perseveremus quod cepimus, constanter. Louanij, XVI. Kal. Sextil. œ. 15CIII.

K 3.

EPIST.

I. LIPSIUS PETRO BRACHIO S. D.

O GRATVM mihi de te, quid ab ipso te? audire: quem ego quidem fuisse arbitrabar, & in beatis iam locis cum Amata tuâ perennare. Nam anni duodecim & ultra sunt, cum silentium à te fuit, nec nisi memoriâ Brachius apud me vixit. At epistola hæc tua amica, larga, elegans, te, amorem, ingenium, omnia viuere & vigere ostendit: atque vt diu sit, à propitio Numine veneror & precibus quæso. In me certè, idem amor tui: non vires aut ingenium, quæ fuerunt: & hac parte ruere me sentio, nec gradu sed cursu ad metam ire. Itaque & scripta hæc mea (non enim cessamus) senile illud & effæctum fortasse afferent: nec tu me cense flumen perenne (vt scribis) & inexhaustam fecunditatem esse. Do manus, & Valetudo vt corpus, sic animum libat: non tamen Sapientiæ illa decreta, quæ firma in ipso hærent. Dedi STOICA quædam nuper, & nunc SENECAM ipsum: haberes à me, nisi interualla hæc terrarum impediunt, & beneficium meum ex impendio onus reddant. Tuos equidem versus libens viderim: & vis sincerè? libentissimè Epistolas, quibus in tuâ linguâ vix est vt politius, & sine affectatione, maturâ quadam elegantia & alacritate suauius prodeat. Ita censeo. & à me, scio, quos melior Deus tali animo donauit. Hæc nunc pauca, in occasione mittendi subitâ: at via facta est, sæpè comמעemus. Me quidem & Iustitia adigit diligere sic diligentem. Vale V. C. Louanij, XVI. Kal. Sextil. ∞. MDCLIII.

EPIST. XCV.

Insulas.

IOANNI SEVRIO S. D.

FRATREM tuum vidi, litteras tuas vidi: illum & istas per-gratas. Casu incidit, vt cursor adesset ab Aulâ, qui dimittendus cum litteris fuit; & fratri non potuerim dare tempus, quod largum esse affectus meus volebat. Neque enim de eo ambigè. sum constans in amore, cuius caussa & solum, vt sic dicam, firmum est: superstruximus, & ædificium nimbus aut procella qualibet

quælibet non euerteret. Silui, fateor, etiam tu, sed amor in animo est, & cogitationibus suscitatur & uiuit. Hoc mihi factum, cerò scito: & de te idem spero, non cum ero solùm, sed cum hic non ero, id est verè ero. S T O I C A nostra uidisse te video: sed lege ut femina aliqua Bonæ Mentis, non ut totam messem colligas, & Æuum nosti. Nosti & valetudinem meam? languemus: Decreta bona sunt, & fortasse Iudicia: sed promere omnia, & decore producere, illa (Valetudo, inquam) & alia quædam verant. Vno verbo, volo quæ non possum. At tu fastidire mihi in munere tuo videris, quod alij multi ambiunt: quid causæ est? Si me audis, quietem specta, & illi aliquod fulcrum: cole deinde animum, & quæ amas ama. Homines sumus, multos imò omnes seruatus aliqua alligat, catenâ aureâ siue ferreâ, sed ligat. Nemo animum. ille cinicat, & euolat, & orbis terrarum ei est angustus. Cogita, in libertate es: & pone teneriores illas cogitationes, quas Imbecillitas aut Ambitio dictant. Ad motem vulgi si respicis, nusquam in tranquillo eris: appetes, aut fastidies: ad Naturam, id est Rationem, si te vertis, vbique portus & quies ostenditur: intra & nauim siste. Hæc nunc breuiter. Seneca meus plura diceret, sed ipse. nam ego breuis fui, nec vllò in scripto minùs libuit diffundi aut euagari. Cùm illum examino, quid addi potest? à nobis nihil, nisi aliquid ad lucem: ab Epicteto multum, quem tu robur & fulcrum iunge. Vale mi Scuri. Louanij, ix. Kal. Sextil. aa. IOCIIII.

E P I S T. X C V I.

Neapolim.

D. IO. ANDREAE PROCHNICIO Legato Ser^{mi}.
Regis Poloniae.

BONA fide fatebor, litteris tuis sic candidè & calidè scriptis, motum aliquem animi me sensisse, & ipsum quoque incensum esse ad redamandũ, & affectum reponendum, quem Iustitiæ quadam lege debebam. Quid enim æquius, verius, quàm amare qui amat, & quod sponte ac Naturæ quadam lege debemus (homo enim sociale animal) promptiùs fideliusque præstare, altero inuitante? Inuitas enim me, Ill^{me} Domine, aut trahis potiùs, coipso quo te ostendis. id est, dona animi atque ingenij
tui:

tui exferis, quæ vbertim magnus ille Deus in te contulit atque effudit. Non amem te appetentem? si nolis amem, modò ut norim: & ultro faciam, quod te video fecisse. Itaq; manus offero & iungo: parum est: offero animum & Vulcanio modo iungo, atque amicitiam inco, non nisi cùm soluar, soluendâ. Vteteres illi astorum quædam defluvia conciliare nos volebant: ego ad morum consensionem ingeniorumq; veriùs referam, aut certè propiùs: & qui eadem atq; honesta volunt, necessum est ut inter se etiam velint, atque ament. O quàm ego illum Honesti ardorem vestigijs litterarum tuarum colligo! beatus es, & insiste, coipso præmiu habiturus, quo amas. Me autem etiam amas, quia in ijsdem sensibus tecum putas: nec vanè, si de conatu vides: quia tendo ad optima, etsi multa retrahunt, & valetudo inprimis, quæ à viginti iam annis votiua non fuit. O quoties in viâ iam aut cursu retardauit, & ad optima pergentem, mihi alijsque vtilia, desistere coëgit & reduxit! Nunc magis, quàm antea: cùm ætas ingruascit, & illa incumbit, ego succumbo, etsi animo reductor, & illo solo sto etiam & sustento. At tu, quæ tua benignitas est, medicinam etiam promittis: quam auidè accipio, non equidem vitæ auidus, sed ut munera saltè mea fungi possim, dum viuo. Nam nunc profectò langueo, & in illis etiam deficio. atque ut artifex peritus, si citharam pulsat fidibus solutam aut dissonam, artem quidem tenet, non exercet: sic mihi fit, qui scio quæ non exsero, & animum attollentem se corpus deserit, aut humo affligit. Ignosce tu, & alij: inprimis autem, si sponte amasti me, nunc respondentem hoc perseuera & præsta: & me inter eos numera, quos ex asse (Deum testem aduoco) tuos dicas. Amicitia hæc, ut mundus, initium habuerit, non etiam finem. Vale Ill^{me} & Reu^{me} Domine. Louanij, vi. Kal. Sextil. ∞. MDCLIII.

E P I S T. X C V I I.

E V S T A T H I O W O L O V I C Z I O V. R. & N. Lithuano.

NVMQVAM mihi grata eueniant, nisi grata epistola tua obuenit. Quid ita? quia sic amanter scripta, quia ab homine & longinquis illis oris missa, ad quas vel L I P S I nomen peruenisse multum sit, quid affectum dicam? Nam de æstimatione & laudi-

laudibus, tibi remitto: etsi nec eæ ingrata, fateor. quia nec irride-
re, nec palpari te scio: ergo amare. Nam iste, iste affectus, est pa-
ter earum laudum. Velsero etiam nostro, inter multa, hoc de-
beo: qui pararium se & conciliatorem interposuit honesti nostri
amoris. Cuius viri usum-fructum panè equidem tibi inuideo:
in quo thesaurum earum rerum habes, quæ homini ingenuo ap-
perendæ sint, vel amandæ.

— illo se pectore multa vetustas

Condidit, & maior collectis viribus exit:

vetustas, inquā, vel artium vel morum: & utroque titulo in Eu-
ropā nostrā claret. Sed de me, venio in amorem tui candidè, fir-
miter: & vis sponsonem? Demetrium Solikouium (ô virum
magnum!) in ijs locis amisi: veni in locum, amabo vt amaui.
Vltrā non possum: si placet, responde. Munera, quæ ad me mit-
tere scribis, nondū vidi: & via longiuscula est: ego ad te DIVAM
meam HALLENSEM, amicitia tesseram: & sic admitte. Vale &
me ama, cūm ero: memento, cūm non ero. Louanij, III. Kal.
Sextil. ∞. IDCIII.

Litteras adiunxi à populari tuo, qui hîc nunc agit, sic rogante.

EPIST. XCVIII.

Augustam.

MARCO VELSERO.

IN laudes meas nuper ibas, & STOICA nostra, faciebas ADMI-
RANDA: nondum in accepti Codicē retuli; expungere licet, si
pœnites: & vereor, cūm legeris, iam fecisse. Primus aspectus, vt in
multis, solet imponere: illa æuū ferunt, quæ ad manum relata
possunt placere. Sed vtcumque est, animus meus vobis, & mihi
materies illa placuit: hoc etiam, quod absolui, & labore, suprà
quàm credat vulgus, sum defunctus. E latebris illa mihi educen-
da, & morosè disponenda fuerunt, vt corpus doctrinæ facerem:
& sic tamen (hanc legem mihi dixeram) vt nihil nisi ad Senecæ
lucem præcipuè esset. Sed edidi: abeant, & famam, quam Deus
& Genius dabunt, habeant. securus scriptorum sum, vt anxius
scribendorum. En hîc ad Wolouiczium, operā tuā nostrum: tu
autem merito tuo semper. Louanij, III. Kal. Sextil. ∞. IDCIII.

L

EPIST.

EPIST. XCIX.

Mechliniam.

NICOLAO OVDARTO.

SILENTII mei causâ, quòd DIVAM nostram expectabam, vnâ mittendam: sed operæ morantur, & tuum desiderium non fert moram, & scire vis de valetudine nostrâ. Cape non læta, mi Oudarte: & ea quoque silentij causâ. Tres menses iam, & ex quo vltimùm te vidi, sum in assiduo languore: nec releuor, et si omnia conatus. Vires abeunt animi & corporis: & ad marcorem, hydropem, an vtrumque imus? Vt Deo visum erit: nam de viâ parum est, modò ad optatam incram, id est ad ipsum. Corpusculum hoc est, vt putre & caducum ædificium: sæpè fulsi & sustinui, vndique nunc labat: & cogitandum est, nō quî seruem, sed quî exeam. Dolet de *Senecâ*, quòd vltimam inanum non licet imponere: atque illa est quæ decorem dat, & consummat. Hæc ita scribo, non quia desperem me posse resurgere; sed quia expedit sic opinari, & præsumere quidquid hominem inanet. Nauta in tempestate, & cùm mors ante oculos, omnia tamē facit, & fracto etiâ velo aut malo nâuigat: idem ego, facio faciamque omnia, & Deo euentum & me permittam. Is te mi optime & amicissime Oudarte post me seruet, quod mihi solatium & altera pænè vita erit. Louanij, III. Nonas Sextil. ∞. MDCLIII.

EPIST. C.

Antuerpiam.

I. LIPSIVS IOANNI WOVERIO suo S. D.

SILVI ad tuas nuper: neque rei multum erat, de quâ rescriberem; & ego languidus, vel cum illâ iustè fileam. Vt tibi dicam, non me reficio, nec in veterem statum gradumque repono: neque valdè nitor aut cupio, vt id quoque liberè promam. Quid opus est? si annos computo, satis diu vixi; si famam, satis; si voluptatem aut molestias, illam gustavi & his satur sum:

Cur non, vt vitæ plenus conuiua, recedam?

Si etiam ea, quæ vitæ meæ genus & professionem spectant, intueor; piget videre quæ video, & tempus, antequam alia video, abire. Litteræ vanitas fiunt; malignitas, acerbitas, pugnae fiunt:
vides

vides cottidiana, & à magnis, exempla. Remedium quid demus? ne consilium quidem, aut monitum: partes & religio intercedunt. Tu Modestia, tu Sapientia, quid nisi nomen estis? Atqui & ego prouocor in hunc campum, & publici iam libelli volant. quid censes? spectaculum me fore? Ingenuus sum, & nullum auctoramentum ducet ad hos ludos. Neronis potius mihi votum illud sit, *Nescire litteras*. Reum me facere aliquis potest, nemo nocentem: & ad loquendum cum iniuria prouocer, arcet & cohibet non ratio solum, sed natura. Ego ita sum, facilius culpam quam proteruiam admisero; & damnari, quam malo more vindicari. Scilicet ego rescripto meo alogias aliis excutiam; scilicet me maiorem aut meliorem, quam sim, faciam, & posteritati iudiciorum legem aut modum donec. Nugæ. & si à magnitudine animi aliquid sumendum sit, iactare me malo, quam defendere. Ego inter mei sæculi ingenia gloriam, si non palmam, fero: & hoc amicis meis volentibus dicam, consentientibus etiam qui non amici. Et ab aliquot libellis, siue etiam epistolis, æstimemur: sanæ doctrinæ, & fortasse eloquentiæ sumus, nec à melioris æui laude nimium segregandi. Quorsum ista? familiariter, & apud amicum: denique *gloriosa est virtus*, a it quispiam, *nec ostendit se solum, sed ingerit*. Ad rem redeo: neque viuere nunc valde appeto, & pugnare etiam fugio, in quemcumque, à quacumque causâ. Cum volumus, initia à nostrâ manu sunt; cum cœpimus, non est finis, & extra lineas res abit. Quisquis aliter, ipse viderit. æui prioris euentus adhuc me docuit, neque scripta ista perennare, neque scriptores in gloriâ esse: & malo apud posteros modesti, quam acris ingenij, censeri. At tu amicū me, vt semper, cense mi Woueri. Louanij, VI. Idus Maijas. ∞. 1606.

A P P R O B A T I O.

Hic liber Epistolarum Clarissimi quondam IUSTI LIPSI diligenter examinatus, nihil repertus est habere contra fidem Catholicam, aut bonos mores. poterit ergo ad multorum vtilitatem imprimi. Quod testor
20. Decemb. 1606.

Egbertus Spitholdius S. T. L. Canonicus
& Plebanus Antuerpiensis.

P R I V I L E G I U M C Æ S A R E V M.

R V D O L P H V S S E C V N D V S diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatia, Scлаuoniæ Rex, Archidux Austriæ, Dux Burgundiæ, Stiriæ, Carinthiæ, Carniolæ & Wirtembergæ, &c. Comes Tirolis, &c. Nostro & Sacri Imperij fidei dilecto I V S T O L I P S I O gratiam nostram: Cæsaream. Postquam inter alia, quæ D E V S immortalis hominibus liberali manu dedit dona, illustria inprimis illa & quasi diuina sunt, quæ in litteris liberalibus, quæ disciplinis consistunt, quibus scilicet homines non tantum ab animalibus ceteris rationis expertibus, sed & rudetiam & imperito hominum vulgo ita distinguuntur, ut tanquam Dij quidam splendescere in terris videantur: rem sanè præclaram scique dignam illi præstant, qui diligentem iis ipsis in litteris ac disciplinis operam ponunt, præclarissimam verò & Reipub. vtilissimam, qui eas ita excolunt, ut aliorum menti docendo scribendo lumina præferant, eosque ex ignorantie tenebris quasi manu educant. Quos excitare, quos amare atque animare, ad dignitatis nostræ munus, ad quod Diuino vocati beneficio concessusque sumus, inprimis pertinere existimamus. Cum itaque ab iis, quorum nobis spectata fides, quique iudicare de Litteris possint, acceperimus, insignes te animi ingeniique tui dotes tibi à natura insitas à primis temporibus ætatis tuæ ita litterarum ac disciplinarum studiis excoluisse atque exornasse, ut olim iuuenilibus adhuc annis præclara florescentis minimeque vulgaris eruditionis specimina præbueris, dum obscura in antiquis scriptoribus loca, quæ quedam tanquam lustra erant, illustrasti, quæque in iis iniuria temporum deprauata & corrupta fuerunt, restituisi, dum vetusta Latinæ antiquitatis rudera in nouam subinde structuram singulari artificio eleganter conuertisti: ad exquisitam adeo & raram doctrinam, quæ magnam de te apud doctos quosque viros opinionem excitavit, peruenisse, eamque variis abs te libris acri & graui cum iudicio scriptis atque in lucem editis ostendisse, ut in eo quod tam feliciter tractes descriptionis genere paucos tibi pares hodie reperire sit: iam verò matura te ætate virum, viro magis magisque digna, & viris doctis grata ac Reipub. vtilia scribere, quæque à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortus, in quibus assidue verseris, flores colligere, concinnare, quibus Lectores misericè recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te satis ipse animatus sis, animandum magis patrocinioque nostro defendendum pro benigna nostra in te suscipere voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, accepimus, Diplomate hoc nostro priuilegioque te & Typographum tuum aduersus quorumcumque fraudem, qui lucri causa, quod fieri solet, eadem excudere aut typis imitari forent velint, munitos cupimus. Quamobrem pro auctoritate nostra Cæsarea decernimus, statuimus, vetamusque, ne quis Typographorum, Bibliopolarum,

aut

aut aliorum, qui librariam negotiationem exercent, eos libros, quos tu editurus es, quocunque modo, charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq; ac Dominiorum nostrorum hæreditariorum fines, triginta annis proximis à primo editionis die computandis, absque tuo tuorumve hæredum consensu audeat: Hac autem lege addita, ut tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, eum non solum cuiusmodi libris, tibi, hæredibusve tuis, auxilio Magistratus, ubicunq; reperi fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratori, fraudis vindici; alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quam Politicis, cuiuscunque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiamve exercent, ne quemquam hoc Priuilegium nostrum impune violare, spernere aut negligere patiantur: Sed, si quos contumaces compererint, constituta à nobis multa, eos puniri & quibuscunque modis coerceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti, Anno Domini Millesimo, Quingentesimo, Nonagesimo secundo: Regnorum nostrorum Romani decimo septimo, Hungarici vigesimo, & Bohemici itidem decimo septimo.

Subsign.

RVDOLPHVS.

Iacobus Curtius à Senftenaw.

Ad mandatum sacra Cæsarea M^{te} proprium.

Io. Baruitius.

Additum sigillum Cæs. M^{te} in cerâ tubâ.

SVMMA PRIVILEGII REGIS CATHOLICE.

PHILIPPVS Dei gratia Hispaniarum, &c. Rex Catholicus, diplomate suo sanxit, nequis, IUSTI LIPSI Historiarum in alma Vniuersitate Louanienſi Profeſſoris, & item Historiographi ſui libros quoscumque, à Cenſoribus legitimis approbatos, præter ipſius, heredumve eius, voluntatem, intra triginta annos à prima ſingulorum librorum editione computandos imprimat, aut alibi terrarum impreſſos, in has inferioris Germania ditiones importet, venaliſve habeat. Qui ſecus faxit, præter librorum conſiſcationem triginta marcharum auri puri illatione mulſabitur. Vti latiùs patet in litteris, datis Bruxella, XIV. Febr. M. D. XCVII.

Signat.

Verreycken.

SVMMA PRIVILEGII REGIS CHRISTIANISSIMI.

HENRICVS Dei gratia Galliarum & Nauarra Rex Chriſtiſſimus, ſingulari privilegio ſanxit, nequis per vniuerſos Regnorum ſuorum fines, IUSTI LIPSI, quos vel hætenus edidit, vel in poſterum editurus eſt libros, excudere intra decennium præter voluntatem ipſius poſſit. Qui ſecus faxit, præter librorum conſiſcationem, ter mille florenorum illatione mulſabitur; vti latiùs patet in litteris, datis Pariſiis, XIII. Iulij, M. DC. V.

Signat.

Perrochel.

Tibi IOANNES MORETE, pro amicitia quæ mihi cum Plantino (heu, quondam meo) & Plantinianis eſt ac fuit, tibi, inquam, permitto, vti EPISTOLARVM mearum CENTVRIAS typis tuis excudas ac diuulges. Nequis alibi alius præter te, cupio ſiue iubeo, ex lege quam magnus Cæſar & Reges dixerunt.

Iuſtus Lipſius.